

4834 A B 1-7

LES
CHARACTERES
DES
PASSIONS.

*Par le Sr DE LA CHAMBRE,
Conseiller du Roy en ses Conseils, &
son premier Medecin ordinaire.*



A PARIS,

Chez IACQUES D'ALLIN, rue Saint Iacques;
à l'Image Saint Estienne.

M DC. LXII.
AVEC PRIVILEGE DV ROY.





A

MONSEIGNEVR
SEGVIER
CHANCELIER
DE FRANCE.



MONSEIGNEVR.

Ce ne vous est pas vne chose nouuelle
de voir les effets & les desordres que cau-
sent les Passions , puisque la Iustice que
vous rendez, n'a point de plus ordinaire

occupation que de les entendre & de les
condamner: Mais c'est vne chose inouïe
que l'on vous en demande la protection;
qu'on les vueille autoriser par vous mes-
me; Et que l'on se serue de vostre nom
pour les faire passer dans le Public, & leur
donner vne approbation generale. C'est
pourtant, MONSEIGNEVR, ce que
ie fais aujourd'huy en vous dédiant cet
Ouurage: ie vous rends le Protecteur des
excez que i'y represente: ie dis mesme que
vous en estes en quelque façon l'Auteur,
puisque vos commandemens les ont fait
naistre: Et par vne hardiesse qui n'a point
d'exemple, j'employe l'illustre nom DES
SEGVIERs pour estre l'appuy des
vices, & les fais paroistre au jour avec le
mesme auantage dont la vertu se tiendroit
fort honorée. Il est vray qu'ils ne sont pas
de la nature de ceux qui corrompent les
mœurs & qui craignent la seuerité des Loix:
Ce n'en sont que les Images & les Figures,
qui peuuent estre receuës comme celles des
Monstres & des Tyrans, & qui ne vous

doient pas estre moins agreables à voir,
que les Portraits des vaincus ont acccûtu-
mé de l'estre aux vainqueurs. Mais quoy
que ma temerité deuienne par là moins
odieuse, ie voy bien qu'elle n'en est pas
plus excusable : Et que vous me blasmeriez
toufiours d'auoir prophané vostre Nom,
enle meslant parmy tant de deffaux: d'auoir
exposé à vos yeux des choses dont l'art n'est
gueres moins vicieux que la matiere : Et
d'auoir creu que ie pouuois vous dire quel-
que chose de nouveau sur vn sujet dont
vous n'ignorez rien que le mauuais vsage.
S'il plaist neantmoins à vostre Grandeur de
se souuenir qu'elle est l'objet de toutes mes
pensées: que ie ne puis rien faire qui ne
porte les marques de ses bien-faits: Et que
mesmes les Tempestes que ie fais voir icy,
sont les effets du calme & de la tranquillité
qu'elle m'a procurée : Elle verra bien
que c'est autant par necessité que par
élection, que ie luy consacre ce petit Ou-
urage : Et que me trouuant obligé de pu-
blier le resentiment que j'ay de faueurs ex-

trêmes dont elle m'a comblé, ie deuois apprendre dans les Passions violentes la maniere d'exprimer celle que i'ay d'estre toute ma vie,


MONSEIGNEVR,

De Vostre Grandeur,

Le tres-humble, tres-obeïssant;
& tres-fidelle seruiteur,
LA CHAMBRE.



Avis nécessaire au Lecteur.

 E que ie te donne icy, n'est qu'une petite partie d'un grand dessein, où ie veux examiner les Passions, les Vertus & les Vices, les Mœurs & les Coûtumes des Peuples, les diuerses Inclinations des Hommes, leurs Temperamens, les Traicts de leur visage; en un mot où ie pretends mettre ce que la Medecine, la Morale & la Politique ont de plus rare & de plus excellent. Je sçay bien que tu penses desia, qu'il y a de la temerité dans cette entreprise, qu'elle est au dessus de mes forces, & qu'il n'y a pas d'apparence que ie puisse venir à bout d'un Ouvrage, dont les moindres pieces ont estonné les plus grands Hommes des siècles passez. Mais ie te prie, Lecteur! de considerer que ie ne suis qu'au commencement, & que ie ne veux pas passer outre, sans sçauoir tes sentimens & sans prendre tes aduis: Car si cet Essay ne te contente pas, & si tu crois qu'une si riche Matiere demande de plus adroites & de plus sçauantes mains que les miennes, ie suis prest d'abandonner mon travail, & de le finir par où ie l'ay commencé: Pour le moins j'auray la satisfaction d'auoir eu le soin de te plaire, & d'auoir trouué pour ton diuertissement un Dessein qui pourroit passer pour le plus grand & le plus beau qui ait iamais esté conceu, s'il estoit bien executé. Et afin de t'en donner une plus particuliere connoissance, ie t'en veux dresser le Plan, & te faire voir que les mauuais Architectes ne laissent

pas d'avoir de beaux caprices, & de se former quelques fois de nobles desseins.

Celuy donc que ie me suis proposé, est de te donner
L'ART DE CONNOISTRE LES HOMMES,
qui contiendra cinq Regles generales. La premiere est fondée
sur les Caractères des Passions, des Vertus & des Vices;
Et fait voir que ceux qui ont naturellement le mesme Air
qui accompagne les Passions, ou les actions des Vertus & des
Vices, sont aussi naturellement enclins aux mesmes Passions
& aux mesmes actions. La seconde est tirée de la Ressem-
blance que les Hommes ont avec les Animaux, & apprend que
ceux qui ont quelque partie semblable à celles des Bestes,
ont aussi les mesmes inclinations qu'elles. La troisieme est
fondée sur la Beauté des Sexes, & montre que les Hommes
qui ont quelque chose de la Beauté feminine, sont naturelle-
ment effeminez, & que les femmes qui ont quelque chose de
la Beauté virile, participent aussi aux inclinations des
Hommes. La quatrième se tire de la Ressemblance que les
Hommes d'un climat ont avec ceux d'un autre: Ainsi ceux
qui ont le nez camus, les levres grosses, les cheveux crespez
& le teint bazané, comme ont les Mores, sont sujets aux mes-
mes vices auxquels ils sont enclins. Enfin la cinquieme
& la dernière s'appelle Sylogistique, parce que sans se servir
des signes particuliers qui ont accoustumé de designer les
mœurs des personnes, elle les découvre par discours & par
raisonnement. Ce qui se fait par deux moyens principaux:
Le premier est la connoissance des Temperamens; car sans
sçavoir les signes de l'Inclination que l'on a pour la Colere,
pourveu que l'on connoisse qu'un homme est bilieux, on peut
dire qu'il est enclin à cette Passion: Le second est le plus in-
genieux, & se tire de la Connexion & de l'enchaînement
qui

que les Passions & les Habitudes ont entr'elles : Ainsi quand on sçait qu'un homme est timide, on peut assurer qu'il a inclination à l'avarice, qu'il est artificieux & dissimulé, qu'il a accoustumé de parler avec douceur & soumission, qu'il est soupçonneux, incrédule, mauvais amy & autres semblables. Et bien que l'on ne remarque point de signes particuliers de toutes ces dernières qualitez, on ne laisse pas de juger qu'elles s'y trouvent, parce que l'on a connu le principe d'où elles prennent leur origine.

Voilà les premiers traits sur lesquels il faut conduire le Plan de ce grand Ouvrage que nous desseinons : Car comme toutes ces Regles sont fondées sur le rapport que les Hommes ont avec d'autres choses, il est impossible de s'en bien servir, si on n'a la connoissance de ces choses-là ; Et il est inutile de dire que quelqu'un est enclin à telle passion, parce qu'il en a le Caractere, si on ne sçait quel est ce Caractere. Il faut donc faire autant de Traitez qu'il y a de fondemens de ces Regles generales, & diuiser tout cet Ouvrage en sept Parties.

La I. traitera des Caracteres des Passions, des Vertus & des Vices.

La II. de la Nature des Animaux qui peuuent servir à cette science.

La III. de la Beauté des Hommes & des Femmes, & des inclinations qui les suivent.

La IV. de la difference des Corps & des Mœurs des peuples.

La V. des Temperamens & des effets qu'ils causent dans l'Ame & sur le Corps.

La VI. de la Connexion que les Passions & les Habitudes ont entr'elles.

*La VII. mettra en ordre tous les signes qui auront esté
puisez de ces grandes sources, en apprendra l'usage, &
donnera enfin L'ART DE CONNOISTRE LES
HOMMES.*

*Après cela, Lecteur ! tu verras bien pourquoy j'ay
entrepris les Caracteres des Passions, & pourquoy
j'en fais l'entrée & le frontispice de mon Ouvrage. Mais
parce que j'y tiens un ordre assez particulier, ie croy qu'il
est encore à propos de te dire les raisons qui m'ont obligé
à le suiure.*

*Je suppose donc que les Passions sont des mouuemens
de l'Appetit, par lesquels l'Ame tasche de s'approcher du
bien & de s'éloigner du mal : Et qu'il y a deux Appetits
dans l'Homme, le Sensitif & l'Intellectuel qui est la Vo-
lonté. Toutes les actions de l'Appetit Sensitif sont ap-
pellées Passions, dautant que l'Ame est agitée par elles
& que le Corps pâtit & s'altère sensiblement dans ses
mouuemens : Mais toutes les actions de la Volonté quoy
que ce soient des mouuemens, ne portent pas le nom des
Passions : Car elle en a de deux sortes, les vnes qui ne
se font pas pour celuy qui agit, mais pour autruy, comme
sont les actions justes & injustes : Les autres qui se font
seulement pour celuy qui agit, telle qu'est l'Amour, la
Haine, l'Orgueil & les autres mouuemens de la Volonté.
Les premieres sont simplement nommées Actions ou Ope-
rations : Les autres sont appellées Passions, à cause de la
ressemblance qu'elles ont avec les émotions de l'Appetit.
En effet les mouuemens que la Volonté fait pour le bien
& pour le mal qui la regardent, sont tout à fait sem-
blables à ceux de l'Appetit, si on ne considere point l'al-
teration du corps qui accompagne ces dernieres, & qui*

point partie de l'essence de la Passion, n'en estant que l'effet: Car la Volonté aime & haït, se réjouit & s'attriste, craint & espere de la mesme façon que l'Appetit, & a comme luy sa partie Concupiscible & Irascible. Quoy qu'il en soit, les Passions Humaines, soit qu'elles s'éleuent dans la Volonté, soit qu'elles se forment dans l'Appetit sensitif, sont de deux sortes: Car les unes sont Simples qui ne se trouvent que dans la partie Concupiscible ou dans l'Irascible: Les autres sont Mixtes qui procedent des deux ensemble.

Les Simples qui appartiennent à la partie Concupiscible, regardent le bien ou le mal, sans considerer s'il y a de la difficulté à le rechercher ou à le fuir, & sont

L'Amour.	La Hayne.
Le Desir.	L'Auersion.
Le Plaisir.	La Douleur.

Celles qui appartiennent à l'Irascible, considerent la difficulté qu'il y a à poursuivre le bien ou à s'éloigner du mal, & sont

L'Espérance.	Le Desespoir.
La Hardiesse.	La Crainte.
La Colere.	

Les Passions Mixtes les plus considerables sont

La Honte.	L'Emulation.
L'Impudence.	La Jalousie.
La Pitié.	Le Repentir.
L'Indignation.	L'Estonnement.
L'Enuie.	

Car la Honte est un meslange de la Douleur & de la Crainte que donne l'infamie. L'Impudence se fait du Plaisir & de la Hardiesse que l'on a de faire des choses deshonnestes. L'Indignation vient de la Colere & de la

Douleur que l'on a de voir arriver du bien ou du mal à ceux qui en sont indignes. La pitié procede de la Tristesse que les maux d'autrui nous font ressentir, & de l'Apprehension de tomber aux mêmes afflictions. L'Envie vient de la Douleur, & de quelque desespoir de posséder le Bien qui arrive à quelqu'un. Pour l'Emulation, elle naît du regret de n'avoir pas les perfections que l'on reconnoît aux autres, & de l'esperance d'y arriver. La jalousie est une confusion d'Amour, de Hayne, de Crainte & de Desespoir. Le Repentir vient de la Tristesse que l'on ressent d'avoir mal-fait, & de l'esperance du pardon. Enfin l'Estonnement est mêlé de Surprise, de Crainte, de Douleur & de Desespoir, comme ie feray voir dans les Caractères de chacune de ces Passions.

Suivant cette methode, ie traiteray premierement des Passions Simples, & ensuite de celles qui sont Mixtes: Et parce qu'entre les Passions Simples, il y en a qui tendent au bien, d'autres qui attaquent le mal, & d'autres qui le fuyent; i'ay creu qu'au lieu de les ranger comme on fait ordinairement avec leurs contraires, il estoit plus à propos de les examiner en cet ordre: parce que naturellement elles le gardent en leur production, & que celles d'un même genre se tiennent ordinairement compagnie: Et parce que leurs mouvemens ayant beaucoup de convenance ensemble, se font connoître l'un l'autre, & forment ainsi des Idées de chaque Passion plus parfaites que si on les mêloit avec leurs contraires. Tu verras donc icy les Passions qui ont le bien pour objet, sçavoir est l'Amour, la Joye, le Riz, le Desir, & l'Esperance: Car ie ne considere pas le Riz comme un pur

effet corporel ; mais i'y comprends l'émotion de l'Ame qui le cause , & en cette consideration il peut passer pour une passion particuliere , & pour une espece de la Joye. Ne t'arreste pas pourtant à cela , il est indifferent pour mon dessein que c'en soit une , ou que ce n'en soit que l'effet : Il y a beaucoup de choses que ie n'examine pas icy avec la sèuerité de l'Escole : Ie distingue quelques-fois celles qu'elle n'a point séparées ; ie confonds souvent celles qu'elle croit estre differentes. Celane m'arriue pourtant iamais que ie n'y sois contraint par la necessité de mon sujet qui ne me permet pas tousiours de m'estendre, ou par deffaut de nostre langue qui se trouue pauvre & sterile dans les discours Dogmatiques. Tu verras bien les endroits où ie trahis sa pureté & son élégance par les termes de la Medecine qu'elle n'a pas encore autorisez , & dont i'ay esté contraint de me servir.

Au reste chaque Passion sera diuisée en quatre Parties principales. La premiere en fera voir la description. La seconde montrera quelle est sa nature. La troisième quel mouuement elle cause dans les esprits & dans les Humeurs. La quatrième découurira les causes de tous ses effets. Il y en aura une cinquième dans l'Amour où ie cherche la Nature de la Beauté en general, & pourquoy elle se fait aymer. Peut-estre que là & en beaucoup d'autres endroits , tu ne trouueras pas toute la satisfaction que tu t'en seras promise, & que tu me blasmeras d'auoir obscurcy des choses qui semblent si claires , par des difficultez dont on ne s'estoit point encore aduisé. Mais auant que de me condamner, souuiens-toy que ce que nous pensons le mieux scauoir, est souvent ce que nous connoissons le moins ; que la

desordres de l'Ame & du Corps prennent leur origine : Et qui voudra considerer tout ce grand nombre de maladies dont la vie des Hommes est à tous momens attaquée, & ces différentes manieres par lesquelles elle a de coûtume de se perdre, n'en trouuera gueres qui n'ait pour premiere cause quelque'une des Passions de l'Ame : De sorte que ie puis dire que les plus utiles parties de la Sageſſe & de la medecine, n'ont pas esté jusques icy exactement traittées ; Et que si ie leur ay voulu donner quelque partie de mes soins & de mon petit travail, ie ne me suis pas si fort éloigné de mon deuoir & de ma profession, comme quelques-uns se pourroient imaginer. Enfin quelque succez que puisse auoir mon entreprise, elle merite à mon aduis quelque approbation ou quelque excuse : Et, Lecteur ! il me faut l'une ou l'autre pour m'obliger à la poursuivre. En un mot, si ton jugement m'est favorable, il me va donner bien de la gloire & bien de la peine.





LES CHARACTERES DES PASSIONS.

CHAPITRE PREMIER.

*Quels sont les Caracteres des Passions
en general.*



A Nature ayant destiné l'homme pour la vie Ciuile, ne s'est pas contentée de luy auoir donné la langue pour descourir ses intentions; elle a encore voulu imprimer sur son front & dans ses yeux les Images de ses pensées; afin que s'il arriuoit que sa parole vint à démentir son cœur, son visage peust démentir sa parole. En effect quelques secrets que soient les mouuemens de son ame, quelque soin qu'il prenne de les cacher, ils ne sont pas plustost formez qu'ils paroissent sur son visage; Et le trouble qu'ils y causent est quel-

quefois si grand, que l'on peut dire que ce sont véritablement des tempestes qui sont plus violentes au riuage qu'en pleine mer ; Et que celuy qui donnoit aduis de consulter son miroir dans la cholere, auoit raison de croire que les passions se deuoient mieux connoistre dans les yeux que dans l'ame mesme. Mais ce qui est de plus merueilleux, les **ACTIONS** que la vertu & le vice font naistre se decouurent de la mesme sorte ; Et bien que la bonté & la malice qu'elles ont, semblent n'auoir point de commerce avec le corps, elles luy en laissent pourtant ie ne sçay qu'elles images ; Et sans que l'ame s'apperçoie mesme de ce qu'elle fait, elle dispose les parties en telle maniere, que par le maintien & la contenance qu'elles prennent, on peut iuger si les actions sont bonnes ou mauuaises. Enfin l'Entendement ne sçauroit agir si secretement que les sens ne s'en apperçoient : S'il esleue ses pensées, s'il se recueille en luy-mesme ; le regard deuient fixe, l'oreille n'entend point, il se fait enfin vne generale suspension des sens & du mouuement : Et soit que l'ame ne puisse vacquer en mesme temps à des fonctions si differentes ; soit que la partie inferieure respecte & ne veille pas détourner sa maistresse, on connoist que celle-cy est occupée quand l'autre ne travaille point.

C'est donc vne chose certaine, que le corps s'altere & se change quand l'ame s'émeut, & que

celle-cy ne fait presque point d'actions qu'elle ne tuy en imprime les marques, quel'on peut appeller Caracteres, puis qu'ils en sont les effets, & qu'ils en portent l'image & la figure.

Or parce que la premiere regle de la Physionomie est fondée sur ces Caracteres, & qu'elle s'en sert pour descouvrir les inclinations, assurant que ceux qui ont naturellement le mesme air & la mesme contenance qui accompagnent les actions Morales, sont enclins aux mesmes actions : Le dessein que nous auons pris veut que nous propositions icy les Caracteres particuliers de toutes les Passions, & en suite ceux des Vertus & des Vices. Mais auparavant il faut sçauoir en quoy consistent ces Caracteres, & quelles en sont les causes.

LES CHARACTERES des Passions & des habitudes estans les marques des mouuemens & des desseins de l'ame en sont aussi les effets, comme nous auons dit : mais parce qu'il y a deux sortes de ces effets, ceux qui se font en l'ame, & ceux qui se font sur le corps : Il y a aussi deux sortes de Caracteres, dont les vns sont *Moraux*, & les autres *Corporels*. Car si l'on considere vn homme qui est en cholere; la violence paroist en toutes ses actions, ses paroles sont pleines d'injures & de menaces, il crie, il court, il frappe, la raison & les remontrances l'offencent, & il ne connoist plus d'amis que ceux qui fauorisent sa passion. D'un autre costé son

visage s'enflamme, les yeux estincellent, son front se ride, les paroles s'entrecourent, sa voix devient affreuse, son regard farouche, & tout son maintien furieux. Voila donc deux sortes d'effets & deux sortes de Caracteres, dont les vns consistent aux actions Morales, & les autres au changement & en l'alteration du corps.

Il faut voir maintenant quelles sont ces Actions & quel est ce Changement: car toutes les Actions Morales ne peuvent pas servir de Caracteres, autrement il y en auroit qui seroient les Caracteres d'elles-mêmes, puisque les Passions & les Vertus sont des Actions Morales.

Pour leuer cette difficulté, il faut remarquer que l'essence des Actions humaines, consiste dans l'émotion interieure que l'objet forme dans l'appetit, & que toutes les choses qui se font en suite, ne sont que des ruisseaux qui découlent de cette source. Ainsi la Cholere n'est rien qu'un appetit de vengeance; Et en suite de cette émotion l'ame produit les actions exterieures qui peuvent servir à ce dessein, comme les menaces, les coups & les autres violances que nous appellons Caracteres, parce qu'elles expriment & decouvrent l'alteration & le mouvement interieur de l'appetit.

Mais il y a encore icy une autre chose à considerer; c'est que quand nous parlons des Passions, des Vertus ou des Vices, nous ne les conceuons pas

comme des qualitez ou des actions simples ; mais comme des qualitez & des actions completes , qui sont accompagnées de beaucoup d'autres , & qui toutes neantmoins tendent à vne fin principale que l'ame s'est proposée. Car bien que l'Amour , à proprement parler , ne soit qu'une simple émotion de l'ame , par laquelle elle s'vnît à ce qui est aymable : Ce n'est pas là pourtant l'idée entiere que nous nous en formons : Nous la considerons comme vne Passion qui a pour objet la Beauté , & qui pour la posséder employe le desir , l'esperance , le plaisir , &c. De mesme la Iustice est vne ferme volonté de rendre à chacun ce qui luy appartient ; mais pour l'effectuer elle se sert de la Prudence qui luy fait considerer la qualité des personnes , le temps , les lieux & les autres circonstances : Elle se sert de la Tempérance & de la Force pour moderer les Passions qui viennent souuent trauerser son dessein : Et bien que ce soient des actions qui ne luy appartiennent pas precisément , elle ne laisse pas de se les approprier , parce qu'elles seruent à sa fin principale. Or toutes ces actions empruntées & posterieures sont encore partie des Caracteres Moraux , parce qu'elles designent la Passion ou l'habitude principale qui est la source & la premiere cause d'où elles deriuent

Il y a bien plus de difficulté à dire en quoy consistent les *Caracteres Corporels* , & qu'elle inten-

tion a la Nature en les formant. On void bien que chaque Passion apporte ie ne sçay quel Air sur le visage, & que la vertu fait couler dans ses actions vne certaine grace & vne contenance agreable qui ne se trouue pas dans les vicieuses. Mais comme on a toûjours appellé cela *Le ie ne sçay quoy*, il semble qu'on ait aussi voulu enseigner que l'on ne pouuoit dire ce que c'est. Car ie suppose, comme il est veritable, que les Caracteres que nous cherchons, ne sont autre chose que *l'Air* d'ont nous venons de parler: Or il se trouue en tant de choses differentes, qu'il est presque impossible de marquer ce qu'elles ont de commun, où l'on puisse establir son essence. Car il se rencontre le plus souuent dans le mouuement des parties; & quelques-vns ont creu que l'Air n'estoit rien que ce mouuement: Mais il est bien certain qu'il y a vn Air fixe & naturel, où les parties ne se meuuent point & qui n'est pas vneffet des émotions de l'ame. Ainsi il y auroit plus d'apparence que cét Air ne fût autre chose qu'un certain rapport des parties entr'elles, qui vient de la situation qu'elles prennent quand elles se meuuent ou qu'elles se reposent. Mais cela ne suffit pas encore, puisque la couleur qui n'est point comprise dans ce rapport, fait partie de l'air du visage; & que la rougeur est vn des principaux Caracteres de la honte, comme la pâleur l'est de la crainte. Cecy mesme accroist la difficulté; puisqu'en defi-

nissant la Beauté, on dit que c'est vne juste proportion des parties accompagnée d'une couleur agreable & de la grace; & que l'on considere la couleur & la grace comme deux choses differentes: Car la Grace n'est autre chose qu'un Air agreable, voire mesme l'usage l'applique souuent à celuy qui ne l'est pas, quand on dit qu'un homme a mauuaise grace; & en ce cas la Grace est vne mesme chose que l'Air.

Pour sçauoir donc quel est cét Air merueilleux où la serenité & les orages de l'ame paroissent; Il faut premierement remarquer que l'Air des personnes se reconnoist dans leurs portraits; que la grace d'un beau visage se laisse exprimer par les couleurs; & qu'il faut par consequent que ce soit quelque chose qui s'arreste & qui ne fuye point, puisqu'il n'y a que les choses stables & permanentes sur qui la Peinture ait du pouuoir, & que de tous les objets visibles, il n'y a que le mouuement qui ne s'assujettisse point au pinceau. Or il est impossible de trouuer quelque chose de stable qui soit commun aux choses viuantes & à leurs portraits, que la figure & la couleur des parties: & partant il semble que c'est là où l'Air doit estre placé. Mais parce qu'il y a encore quelqu'autre chose dans la Grace où la Peinture ne sçauoit atteindre, & qu'il y a vne certaine viuacité qu'elle ne peut arrester sur sa toile; Il y a raison pour croire que le mouuement sert encore à la grace, que c'est luy qui rend la beauté viuë &

picquante, & que sans luy elle est fade, morte & sans attrait. En effet on ne peut douter que le mouuement des parties ne fasse quelque chose de cette viuacité, puisqu'il fait partie de leur perfection. Mais parce qu'après qu'il est cessé, il y a encore vn ie ne sçay quoy qui demeure sur le visage; & que l'on void briller dans les yeux vn certain esclat qui ne dépend point de leur figure, de leur mouuement ou de leur couleur; Il faut asseurement adjoûter à tout cela quelque secrette influence qui se jette dans les yeux, & qui se répande sur les parties du visage. Et sans doute apres auoir bien recherché ce que se peut estre, on trouuera que ce sont les esprits que l'ame enuoye continuellement en ces lieux, & qui y laissent l'éclat de la lumiere naturelle qu'ils ont. Et de fait il y a des visages qui de pres semblent auoir la couleur assez bonne, qui de loing paroissent l'auoir fort mauuaise; parce que les esprits ne l'animent pas & que l'éclat qu'ils luy donnent est si foible, que les especes n'en peuvent estre portées bien loing & laissent ainsi celles de la couleur plus ternies

La *Grace* se trouue donc dans la couleur, dans la figure & dans le mouuement des parties & des esprits : mais cela ne veut pas pourtant dire que toutes ces choses soient la *Grace*; car si elles estoient en d'autres sujets que dans l'homme, elles ne seroient pas agreables; & la couleur verte qui est
la

la plus parfaite de toutes , feroit vne difformité affreuse si elle se trouuoit sur vn visage. Il faut donc que comme les Sons ne sont pas agreables d'eux-mesmes , mais entant qu'ils sont en certaine proportion ; toutes ces choses aussi ne soient agreables à la veuë , que parce qu'elles sont dans vn certain rapport & vne certaine conuenance qui plaist aux yeux & qui contente l'ame.

Pour connoistre cette conuenance , il faut sçauoir qu'il y a deux sortes de Beauté en l'homme , l'Intelligible & la Sensible. La premiere n'est autre que la perfection interieure , c'est à dire , le juste assemblage de toutes les facultez qui sont necessaires à l'homme , pour faire les fonctions ausquelles il est destiné : Et la Beauté sensible consiste aux dispositions que doiuent auoir les Organes pour seruir à ces facultez. De sorte que ce qui rend la figure , la couleur & le mouuement agreable , est la conuenance que ces choses ont avec la Nature de l'homme : Car quelque belle couleur , quelque parfaite figure qu'ayent les parties , quelques reglez qu'en soient les mouuemens ; s'ils ne sont conformes à la Nature , ils ne sçauroient faire Beauté ny Grace , au contraire ils causeront de la difformité & rendront le corps des-agreable. Or quoy qu'il n'y ait peut-estre que Dieu seul qui connoisse le principe de cette conformité , & pourquoy les formes ont plus d'inclination pour vne figure , pour vne couleur ,

ou pour tel autre accident que pour vn autre : Il y a neantmoins dans nostre ame des semences secretes de cette connoissance , qui sont cause qu'elle se plaist en ces objectz sans qu'elle en sçache la raison : tout de mesme qu'elle les trouue des-agreables , quand la conuenance & la proportion qu'ils doiuent auoir ne s'y rencontrent pas.

On dira peut-estre que ie confonds icy la *Grace* avec la *Beauté*, mettant la Grace dans la proportion des parties & dans la Couleur, qui dans la definition ordinaire de la Beauté sont separées de la Grace. Mais j'estime qu'il n'y a point d'inconuenient en cecy, & qu'il est vray que tout ce qui est beau est agreable, & que la proportion des parties estant belle, il faut qu'elle plaise aux yeux & partant que la Grace s'y trouue. Et de fait les Anciens qui estoient plus sçauans que nous en ces choses, n'ont point fait cette difference, & ont toûjours mis les Graces par tout où ils ont placé la Beauté. Car bien qu'Aristote ait dit que les Petits pouuoient estre gentils & agreables, mais que l'on ne pouuoit les appeller Beaux : C'est qu'il parloit de la Beauté entiere & parfaite qui ne se peut trouuer dans les petits corps, à cause qu'ils n'ont pas cette juste grandeur qui conuient à la perfection de l'homme.

Il y a pourtant quelque fondement de la difference que l'on a mise depuis entre la Beauté & la Grace : Car comme la matiere & la forme entrent en la

composition de l'homme, on a mis la Beauté dans la figure & dans la couleur qui appartiennent à la matiere; & la Grace dans les mouuemens qui sont les effets de l'ame. Ce n'est pas que la Grace ne se trouue dans la couleur & dans la figure; ou que la Beauté ne soit dans les mouuemens: Mais parce qu'elle est plus excellente en ceux-cy, à cause que l'ame qui en est le principe, est plus parfaite que la matiere, & que l'action est la derniere perfection des choses; on a donné le nom de *Grace* à la Beauté qui deuoit estre la plus agreable: quoy qu'en effet il doie estre commun à tout ce qui est Beau; & que la couleur, la figure & le mouuement ayant chacun leur Beauté, doiuent auoir aussi chacun leur Grace particuliere.

Mais pour retourner à nostre sujet, la *Grace* est vne sorte d'Air & ne dit rien dauantage que cette conuenance & proportion dont nous auons parlé: Car quand l'*Air* est accompagné de cette proportion, il est agreable. De sorte que l'*Air* en general se trouue dans les mesmes choses que la Grace, & on le peut definir, *Vne certaine qualité exterieure & sensible qui naist de la figure, couleur & mouuement des parties.* Que si l'on y adjoûte, que ces trois choses sont proportionnées & conformes à la perfection de l'homme, ce sera la definition de la Grace.

Il faut neantmoins remarquer que l'*Air* en

certaines rencontres paroist dauantage en l'une de ces trois choses, qu'aux autres : Car celuy qui est fixe & naturel, vient principalement de la figure & de la situation des parties : Celuy qui accompagne les Passions depend plus du mouuement & de la couleur : Celuy des actions vertueuses est quelquefois dans le repos, parce que la raison empesche les mouuemens qui ne seroient pas conuenables à la moderation & à la quietude qu'elle recherche : Telle est la mine graue & modeste ; telle est la contenance d'un homme qui medite & qui pense à de grandes choses : Et il y a de l'apparence que les vices qui sont dans l'excez, ont un Air actif & turbulent, & que ceux qui sont dans le défaut l'ont tout au contraire : Ainsi un homme ardent & precipité est toujours en action, & le paresseux est immobile.

De plus, l'*Air* paroist quelquefois plus en vne partie qu'en vne autre ; & bien qu'il soit plus remarquable au visage qu'en aucun autre lieu, il y en a pourtant quelqu'un qui appartient au marcher, l'autre aux bras, & l'autre à tout le corps. Nostre langue a esté plus heureuse à exprimer ces differences que quelqu'autre que ce soit : Car elle ne s'est pas contentée de l'*Air* & de la *Grace*, elle y a adjoûté la *Mine*, la *Contenance*, le *Maintien*, le *Geste* & le *Port*. La *Mine* appartient principalement au visage ; le *Port* au marcher ; le *Maintien*

& le *Geste* aux bras ; *l'Air*, la *Grace* & la *Contenance* à tout le corps : Et comme le *Port* & le *Geste* marquent le mouvement, la *Mine*, le *Maintien* & la *Contenance* s'accommodent mieux avec le repos : mais *l'Air* & la *Grace* sont communs à tous les deux. Quoy qu'il en soit, *l'Air* qui se trouue dans les Passions & dans les Actions Morales, vient principalement du Mouuement. Mais il faut sçauoir qu'elle est la cause de ce Mouuement : car de cette connoissance dépend la plus grande partie de ce que nous dirons en suite : Et parce que cela paroitra mieux dans les Passions, ce sera par elles que nous en commencerons la recherche.

Noys auons dé-jà dit, & nous serons souuent obligez de le repeter ; Que les Passions ne sont rien que des émotions de l'appetit par lesquelles l'ame se porte vers le bien & s'éloigne du mal : Et comme elle a diuers organes qui peuvent seruir à cette fin, elle les employe aussi & les fait mouuoir conformément à son intention. Or les Esprits sont sans difficulté les premiers dont elle se sert, à cause qu'ils sont les plus mobiles, & qu'ils prennent leur naissance au lieu mesme, où elle forme ses desseins : de sorte qu'il ne faut pas s'estonner s'ils sont les premiers à les executer, puis qu'ils semblent estre les premiers qui en ont connoissance.

L'ame porte donc les esprits au dehors, & les

répand sur les parties exterieures, si c'est pour accueillir le bien ou pour s'opposer au mal : Mais quand celuy-cy est trop puissant, & qu'elle ne se sent pas assez forte pour luy resister, elle les retire au dedans & les renuoye au cœur. Or ce flux & ce reflux apportent deux grands changemens, parce que les humeurs estans entraînées avec eux, leur abord enfle & agite les parties & les peint de la mesme couleur qu'elles ont : Au contraire leur fuite les abat, les fait pâlir & les rend immobiles.

Il ne seroit pas peut-estre inutile d'examiner icy si chaque Passion a vn particulier mouuement d'esprits ; & si la Cholere les émeut autrement que la Honte, l'Amour, la Joye & les autres qui les portent au dehors : Si la Peur les fait retirer au dedans d'une autre façon que la Haine, l'Auersion, & la Douleur. Car si cela estoit veritable, & que l'on peût connoistre ces differences, il y auroit bien plus de facilité qu'il n'y a à decouvrir les causes de l'alteration qu'ils produisent. Pour moy ie tiens, que puis qu'en chaque Passion l'appetit a vne émotion & vne fin particuliere, il faut que les moyens dont il se sert soient aussi particuliers ; & que le mouuement des esprits soit conforme à l'intention qu'il a, & à l'agitation qu'il s'est donnée ; Et partant que celuy qui se fait en vne Passion soit different de ceux qui se font dans les autres. De sorte qu'il est fort vray-semblable qu'en l'une ils se jettent avec

impetuosité & à gros boüillons comme les torens ; qu'en vne autre ils coulent doucement comme font les riuieres ; Que l'une les fait desborder, l'autre les retient dans leurs bornes : Que tantost leur cours est droit, & tantost inégal : Qu'enfin on peut dire que l'Amour les dilate, le Desir les élance, la loye les répand, l'Esperance les tient fermes, l'Audace les pousse, & que la Cholere les jette à gros boüillons, & ainsi des autres comme nous verrons plus particulièrement dans les discours des Passions. Bien qu'à dire le vray, i'estime que nostre esprit n'est pas assez clair-voyant pour discerner exactement toutes ces differences, & qu'en ce cas la fenestre de Momus luy seroit bien necessaire.

Quoy qu'il en soit, l'ame ne se contentente pas dans les passions d'agiter les esprits & les humeurs de cette sorte, elle fait encore mouuoir les parties qui sont capables du mouuement volontaire, comme estant celles qui sont les plus puissantes pour rechercher ou pour embrasser le bien, & pour repousser ou pour fuyr le mal. Et pour en parler veritablement, ce mouuement des Esprits est souvent vn secours bien inutile à l'ame, & qui sert plus à marquer sa precipitation & son aueuglement, qu'à obtenir ce qu'elle s'est proposé. Car quand ils se jettent sur le visage, elle se figure que c'est elle-mesme qui y accourt ; & que quand ils se retirent au cœur, c'est elle aussi qui s'y va cacher ;

Quoy qu'elle soit desia au lieu où elle veut aborder, & qu'elle n'abandonne point celuy d'où elle pense s'esloigner. Et que sert à l'animal que les esprits & le sang aillent à la rencontre d'une chose agreable, puisque l'ame ny le corps ne s'en approchent pas de plus pres, qu'ils ne s'vnissent pas dauantage à elle, & que les sens sont les seuls qui doiuent faire cette vnion? On en peut dire de mesme de la resistance qu'elle pense faire aux maux qui se presentent: Car quel rapport y a-t'il entre les esprits & vne injure; Et quel effort peuuent-ils faire pour repousser vn mal qui n'est le plus souuent que dans l'opinion, qui quelquefois n'est plus, ou qui mesme n'est pas encore fait?

Mais il n'en est pas ainsi du mouuement volontaire; Car en effet les mains attirent & prennent ce qui est vtile; le corps se porte vers ce qui est aimable; Il s'esloigne veritablement de ce qui est mauuais; il fuit ou chasse ce qu'il'incommode.

Il est vray qu'il y a quelques-vns de ces mouuemens où l'ame se trompe aussi bien qu'en celuy des Esprits: Combien de pas perdus, de postures ridicules & de paroles inutiles dans les Passions? Que leur peuuent seruir ces diuers mouuemens de teste, ces differentes figures que le front, les yeux, le nez & la bouche y forment? Il y a bien quelque rapport avec le dessein que l'ame s'est proposé, puis qu'il est certain qu'elle abbat les yeux dans la Honte comme
fi

si elle vouloit se cacher ; Qu'elle les esleue dans la Cholere comme si cela seruoit à repousser l'injure ; & qu'elle hausse le nez dans le Mespri, comme si elle vouloit chasser ce qu'elle dédaigne. Mais il est aisé de voir aussi qu'elle se trompe , & que l'aveuglement & le trouble où elle est , luy fait employer des moyens qui ne seruent de rien à obtenir ce qu'elle desire.

Ce n'est pas pourtant à dire qu'il la faille condamner en tous ces mouuemens : Il y en a beaucoup qui arriuent sans qu'elle ait dessein de les faire ; & quoy qu'ils ne soient pas contre son intention , ce n'est pas neantmoins elle qui en est la cause : C'est par vne certaine necessité qu'ils viennent en suite des mouuemens que l'ame excite au dedans. Car on ne peut dire avec raison qu'elle se propose dans la Cholere d'empescher la respiration & la parole, d'enflammer le visage, & de rendre les yeux estincelans : Mais ce sont des effets qui viennent en suite de l'agitation des esprits , qui se jettent impetueusement aux parties exterieures , comme nous dirons.

Il est aisé de voir par ce discours non seulement quelles sont les causes des mouuemens que les Passions excitent ; mais encore qui sont ceux qui sont les Caracteres Moraux & ceux qui sont les Corporels. Car ceux que l'ame employe par vne connoissance claire & distincte pour obtenir la fin

18 LES CHARACT. DES PASSIONS, CAP. I.
qu'elle pretend en chaque Passion, font les Chara-
cteres Moraux : & ceux dont elle se sert par vn pur
instinct, ou qui suruiennent sans qu'elle ait inten-
tion de les faire, font les Caracteres Corporels :
Car ces derniers sont de deux sortes, les vns se font
par le commandement de l'ame, & les autres par
necessité ; comme on verra plus particulierement
dans les discours suiuaus.





LES CHARACTERES DE L'AMOUR.

CHAPITRE II.

L'AMOUR n'est pas seulement la source de toutes les Passions, elle l'est encore de tous les biens & de tous les maux qui arriuent aux hommes. Sans elle les sciences ne seroient point au monde, la vertu seroit sans sectateurs & la société Civile seroit vn bien imaginaire. C'est elle qui fait naistre en nous le desir des belles choses, qui nous les fait posseder, & qui par vn merueilleux enchantement, nous change & nous transforme en elles. Nous luy deuons tous les biens que nous possedons, elle nous peut donner ceux qui nous manquent ; Et si elle ne chasse les maux que cette vie entraîne necessairement avec soy ; pour le moins elle les adoucit,

elle les rend mesmes agreables , & en fait les instrumens de nostre felicité.

Mais aussi c'est elle qui corrompt les vertus , qui ruïne les societez , qui fait mépriser les Arts ; Et s'il est vray qu'elle ait mis au monde ces excellentes choses , il semble que ce ne soit que pour les en chasser. Cette noble vigueur qui porte l'esprit aux belles actions ; Ce feu diuin dont on dit que l'ame est reuestuë & qui l'esleue naturellement vers le Ciel , languit & s'éteint sous le poids des choses basses & terrestres où cette passion la tient arrestée. C'est elle enfin qui forme toutes les tempestes dont nostre vie est agitée ; Il n'y auroit point de Douleur, de Crainte ny de Desespoirs s'il n'y auoit point d'Amour : Et qui voudroit considerer de pres toutes les Passions , pourroit facilement croire que ce ne sont que de diuers mouuemens qu'elle se donne , & de differentes figures qu'elle prend.

Or comme il n'y a gueres d'objets dont l'ame puisse estre touchée , qui ne soient capables d'exciter cette Passion ; Que les Richesses, les Honneurs, les Plaisirs , en vn mot tous les biens faux & veritables la peuuent émouuoir : Nous ne voulons pas icy débrouïller ce grand Chaos , & nostre dessein ne nous permet pas de parler d'une autre sorte d'Amour que de celle que la Beauté fait naistre dans l'appetit.

Ce n'est pas pourtant vne petite entreprise, quel-

que secours que nous ayent donné ces grands Hommes du temps passé, & quelque effort que nous ayons desia fait pour en decouvrir l'origine, nous sommes contrains d'auoir qu'il y a quelque chose de diuin en elle où nostre esprit ne scauroit atteindre, & que la Pureté qui se trouue comme on dit à sa naissance, se rencontre aussi dans nos pensées quand nous en voulons parler. Que s'il estoit mesme necessaire d'en marquer tous les effets, on conteroit plutôt les vagues de la mer que les mouuemens qu'elle forme dans l'ame; Et la chaleur ne produit & ne corrompt pas plus de choses au monde que l'Amour y cause de bonnes & de mauuaises actions.

En effet c'est l'instrument de cet Art diuin que la nature a trouué pour conseruer ses plus excellens ouurages; sans elle il y a long-temps que l'on ne parleroit plus de familles, de Peuples ny de Republiques; Et celles que l'on a estimées les plus fleurrissantes n'auroient esté que des assemblées de quelques animaux farouches & sauuages, si l'Amour ne les eût adoucies & civilisées. Car c'est elle qui nous forme à la vie Civile qui est la veritable vie des hommes; puis qu'elle nous fait deuenir liberaux, courtois & genereux; qu'elle nous apprend à estre discrets, obeissans & fideles; qu'elle nous rend diserts, éloquents & ingenieux. Et c'est pour cette raison que le plus sage homme de l'Antiquité a dit

autresfois qu'il estoit ignorant en toutes choses excepté en l'art d'aymer, parce qu'il estimoit que l'Amour est l'Ecole de l'honneur & de la vertu, & que par tout où elle regne elle y apporte la Paix, l'abondance & la felicité.

Et veritablement si elle n'avoit point esté alterée par les hommes elle ne produiroit jamais d'autres effets que ceux-là, & l'on ne seroit pas obligé d'adjouster à ses Eloges les crimes dont on l'accuse, & les maux qu'elle a fait de tous temps par toute la terre. Mais comme le feu, quelque pureté qu'il ait, esleue des fumées puantes & dangereuses s'il se prend à des matieres corrompues; Il ne faut pas s'estonner si cette flamme diuine se nourrissant parmy les vices dont la Nature de l'homme est infectée, ne produit que de sales desirs, ne forme que de mauuais desseins; Et si au lieu des biens qu'elle deuroit apporter aux hommes, elle ne leur cause que des troubles, des soucis & des malheurs.

Nous n'auons pas entrepris de tenir icy compte de tous ses desordres, & nous ne voulons pas soüiller ce discours du sang, du poison & de l'infamie qu'elle a porté dans les familles & dans les Estats, & des sacrileges dont elle a violé les choses les plus saintes: Ce sera assez de dire que c'est le plus dangereux ennemy que puisse auoir la Sagesse: Parce que de toutes les Passions qui la peuuent troubler, il n'y a que l'Amour contre qui elle n'a point de

deffence. Celles qui entrent subitement & impetueusement dans l'Ame n'y durent presque qu'un moment, & la raison trouue ses excuses dans leur precipitation : Pour les autres qui viennent peu à peu, elle les sent venir, & leur peut fermer les passages ou les chasser dans la foiblesse qu'elles ont : Mais l'Amour y coule si secretement qu'il est impossible d'en remarquer l'entrée ny les démarches : Comme un ennemy masqué elle s'auance & se saisit de toutes les principales parties de l'ame avant qu'on la puisse reconnoistre, & pour lors il n'y a plus de moyen de la faire sortir ; Il faut qu'elle triomphe, & que la Sagesse & la Raison deuiennent ses esclaves. Et c'est à mon aduis ce que les Anciens ont voulu dire quand ils ont feint tantost que l'Amour estoit le maistre des Dieux, tantost que c'estoit un Demon qui les faisoit descendre du ciel en terre : Par ce qu'il est certain que cette passion se rend maistresse des plus sages hommes du monde ; Et que ce n'a pas esté sans sujet que Laïs s'est autresfois vantée de voir plus de Philosophes chez elle que d'autres sortes de gens. Mais laissons aux Amans ces matieres pour entretenir leurs plaintes ; Et sans nous interesser dans le blasme ou dans la loüange de l'Amour, considerons du port où nous sommes les orages qu'elle excite dans l'ame & dans le corps.

La premiere blesseure que la beauté fait en l'ame

est presque insensible ; Et bien que le venin de l'amour y soit desia & qu'il se soit mesme respendu en toutes ses parties , elle ne croit pas pourtant estre malade, ou pour le moins elle ne pense pas que ce soit d'un si grand mal. Car comme on ne donne point aux Abeilles le nom qu'elles portent , sinon lors qu'elles ont leur aiguillon & leurs aisles : Aussi l'Amour ne s'appelle Amour que quand il a des traits , & qu'il peut voler , c'est à dire quand il est picquant & inquiet. Auparavant on le prend pour vn simple agrément & vne complaisance que l'on a pour vne personne aymable : On se plaist en sa presence , on ayme à en parler , le souuenir en est doux , & les desirs que l'on a de la voir & de l'entretenir sont si tranquilles , que la Sageesse avec toute sa feuerité ne les scauroit condamner , elle les approuue mesme & les fait passer pour des ciuilités & des deuoirs necessaires. Mais ils ne demeurent pas long-temps en cét estat , ils s'augmentent peu à peu , & enfin par la frequente agitation qu'ils donnent à l'ame , ils allument le feu qui y estoit caché , & font croistre la flamme qui la brusle & qui la déuore. Alors cette Image agreable qui ne se presentoit à l'esprit qu'avec de la douceur & du respect , deuiant insolente & imperieuse , elle y entre à tous momens , ou pour mieux dire elle ne l'abandonne iamais , elle se mesle parmy ses pensées les plus serieuses , elle trouble les plus agreables,

bles, elle prophane les plus saintes : Elle se glisse mesme parmy ses songes, & par vne perfidie insupportable elle s'y represente seuere & cruelle quand il n'a rien à craindre, ou l'abuse d'une vaine esperance quand il est dans vn veritable desespoir. Alors l'Amour qui n'estoit auparavant qu'un Enfant, deuient le pere de toutes les Passions; mais vn pere cruel, qui n'en a pas plustost produit vne, qu'il ne l'étrouffe pour donner le iour à vne autre qu'il n'épargne non plus que la premiere : Il fait naistre & mourir en mesme temps cent sortes de desirs & de desseins ; Et à voir l'Esperance & le Desespoir, la Hardiesse & la Crainte, la Ioye & la Douleur qu'il fait succeder continuellement l'une à l'autre, le Despit & la Cholere qu'il fait éclater à tous momens, & le meslange qu'il fait de toutes ces passions ; il est impossible que l'on ne se figure quelque grande tempeste, où la fureur du vent esleue, abbat & confond les vagues, où les éclairs & les foudres rompent les nuées, où la clarté & les tenebres, le ciel & la terre semblent retourner en leur premiere confusion.

Mais comme il y a des temps où les orages sont plus violans & plus ordinaires, il y a aussi des rencontres où cette tempeste d'Amour est plus forte & plus frequente : Les principales à mon aduis sont la Presence & l'Absence de la personne aymée, son Amour & sa Hayne, & la concurrence d'un

Riual. Et l'on peut dire que ce sont là les cinq Actes où tous les Accidens & tous les Intrigues de cette Passion sont representez : Pour le moins s'il y en a d'autres, ils se passent derriere le Theatre & hors la veuë des spectateurs.

S'il arriue donc qu'un Amant soit *Absent* de l'objet àymé, alors l'inquietude & le chagrin le suiuent par tout, il n'a pas plus d'amis qui ne l'importunent, les diuertissemens qui luy estoient les plus agreables luy sont ennuyeux, il n'y a rien enfin dans la vie qui ne luy déplaise, excepté le silence & la solitude. Comme s'il estoit atteint de ces estranges maladies qui font hayr la lumiere & les hommes, il n'ayme que les tenebres & les deserts; là il entretient les bois, les ruisseaux, les vents & les astres; Ils n'ont rien à son aduis qui ne soit conforme à l'humeur de celle qu'il ayme, & à la peine qu'il endure, il les appelle insensibles comme elle, il les trouue en perpetuelle agitation comme luy; Et apres s'estre long-temps tourmenté l'esprit de semblables Chimeres, il vient à penser à ces heureux moments qu'il reuera cet objet agreable, qu'il luy pourra parler, & luy rendre compte des soupirs & des larmes qu'il aura jettées en son absence. Tantost il medite les plaintes dont il doit amolir sa rigueur, les remerciemens dont il payera ses faueurs, & les sermens qui confirmeront les vœux de sa seruitude.

Tantost il met la main à la plume, il écrit, il efface, il déchire, & s'il y a quelques pensées qui puissent demeurer en seureté sur son papier, ce sont celles qui parlent de l'excez de son amour & de sa fidelité. Apres cela quels artifices n'employe-t'il point pour faire rendre ses lettres ? quelles extrauagances ne fait-il pas quand il en reçoit ? ou quand mesmes quelques choses qui ont seulement touché la personne qu'il ayme tombent entre ses mains ? il les tient tousiours colées à ses yeux ou à ses levres, il en fait ses Idoles, & ne les voudroit pas changer avec des sceptres & des couronnes. Enfin on peut dire que l'Absence est la Nuiët veritable des Amans, non pas seulement à cause que leur Soleil ne les éclaire plus comme ils disent ; mais encore parce que tous leurs plaisirs ne sont qu'en songe, & que tous leurs maux s'irritent & s'augmentent en ce temps-là.

Mais considerons le Iour qui succede à cette Nuiët, c'est infailliblement la *Presence* de la personne aymée : En effet, vn Amant ne l'appelle point autrement ; Il croit quand il l'aborde que toute la Beauté du monde se descouure à ses yeux, il sent vne nouvelle chaleur qui se respand en son ame, & vn certain meslange de joye & d'estonnement luy cause vn trouble si agreable, qu'il en est rauy & comme hors de luy-mesme. Alors quelque super-

be, hardy, & éloquent qu'il soit, il faut qu'il s'humilie, qu'il craigne, & qu'il perde la parole; il ne luy sert de rien d'avoir préparé son courage & ses discours, ce sont autant de songes & de phantosmes qui s'évanouissent à la veuë de cette lumiere: Il n'y a que ses yeux qui parlent pour luy, & qui font reconnoistre par leurs regards quel est l'excez du plaisir & du respect que cette rencontreluy donne. Or quoy que l'on die que c'est là le langage particulier de l'Amour, il y en a toutesfois vn autre qui luy est bien plus estrange que celuy-là. Car bien qu'il y ait des Passions aussi violentes que celle-cy, il n'y en a pourtant point qui inspire comme elle des paroles si extrauagantes & si ridicules, puis qu'un Amant ne profere pas vn mot qui soit vray-semblable; quelque soin & quelque interest qu'il ait de faire croire ce qu'il dit, tous ses discours & ses écrits sont de perpetuelles hyperboles; Il brusle, il languit, il meurt; Il ne parle que de prison, de fers & de tourmens; Il nomme celle qu'il ayme, son soleil, son cœur, son ame & sa vie; Il jure qu'il a plus d'amour tout seul que tous les hommes ensemble, que sa passion est infinie & qu'elle sera eternelle. Enfin toutes ses paroles sont au dessus de la verité, ses desseins & ses promesses au dessus de son pouuoir, & toutes ses actions au dessous de son courage: Car il n'y a point de soumission si lasche qu'il ne fasse, il n'y a point de seruice si bas & si vil

qu'il ne rende, il n'y a point de sujettion parmy les esclaves qui soit si assiduë, si soigneuse & si empressée que la sienne : Il faut souvent qu'il adore vne personne qui le dédaigne, qu'il fasse la cour à vne confidente qui le trahit, qu'il caresse des valets qui se moquent de luy : Il faut qu'il traite ses ennemis avec respect, ses amis avec indifférence, & tout le reste du monde avec mépris : Il faut qu'il souffre sans se plaindre, qu'il craigne tout, qu'il desire beaucoup, qu'il espere peu : En vn mot, il faut qu'il ayme son mal & qu'il se haïsse soy-mesme. Je laisse à part les profusions qu'il fait, & les dangers qu'il court, pour tirer seulement vne parole ou vn regard favorable ; Les transports de ioye qu'un bon accueil luy donne, l'excez de douleur & de desespoir qu'un dédain luy cause, & les fureurs que la jalousie luy inspire, quand un Rival vient traverfer sa poursuite. Comme nous parlerons de ces Passions en particulier, ce sera lors aussi que nous ferons voir le reste des extravaigances que l'Amour fait faire. Quoy qu'à la verité ie ne pense pas qu'on les puisse dire toutes ; Car outre qu'il n'y a point de déreglemens aux autres Passions qui ne se trouvent en celle-cy, qu'elle est capable de toutes les folies qui peuvent entrer en un esprit égaré ; Elle a tant de faces & de differens visages, qu'il est impossible de les pouvoir dépeindre : Tantost elle est violente & impetueuse, tantost elle est douce & paisible ; Elle

est en quelques vns plaisante & enjouée , aux autres elle est chagrine & seuer ; D'autres l'ont hardie & insolente , d'autres l'ont timide & modeste ; Il s'en void d'ingenieuses & de stupide , de fantasque , de volage , de furieuse , & de cent autres façons ; qui ont à mon aduis esté cause que quelques-vns ont feint que l'Amour estoit fils du Vent & de l'Iris , pour montrer la merueille & la diuersité qu'il y auoit en cette Passion , & pour nous apprendre que l'origine en est aussi cachée que celle de ces deux sortes de Meteores. Mais auparauant que d'entreprendre de la decouurir , voyons les changemens qu'elle fait au visage.

Je ne croy pas que celuy qui le premier peignit l'Amour avec vn bandeau sur les yeux , eût dessein de marquer l'aveuglement qui se trouue en cette Passion ; mais que par l'impuissance ou par le priuilege de son Art , il fut obligé de cacher ce qu'il ne pouuoit pas dépeindre. En effet qu'elles couleurs , voire mesmes qu'elles paroles pourroient exprimer tous les changemens que l'Amour cause dans les yeux ? Comment pourroit-on représenter cette Humidité éclatante que l'on y void briller ? Cette Inquietude modeste , cette Tristesse riante , & cette Cholere amoureuse que l'on y apperçoit ? Tantost vous les voyez se mouuoir d'un costé & d'autre , tantost s'esleuer doucement , s'abaisser peu

à peu & se tourner pitoyablement vers l'objet aymé: Par fois ils s'arrestent sur luy comme s'ils y estoient attachez; par fois ils s'en destournent comme s'ils en estoient esbloüis. Tantost leurs regards sont vifs & prompts, tantost ils sont doux & languissans; tantost ils sortent en liberté, tantost ils se déroben & s'échapent d'entre les paupieres qui semblent se vouloir fermer: En vn mot tous les mouuemens dont les yeux sont agitez dans les autres Passions se remarquent en celle-cy: On y void tousiours le riz ou les larmes qui quelquefois mesmes s'accordent & se meslent ensemble. Quoy qu'ils deuiennent caues & enfoncez, ils ne se dessechent & ne se diminuent pas pour cela, au contraire, ils paroissent plus grands & plus humides qu'ils n'estoient auparavant: Si ce n'est apres vne longue tristesse & vn extreme desespoir, car alors ils deuiennent secs, obscurs, abbatus & immobiles. Le front se reserre rarement en cette Passion, au contraire il semble qu'il s'étende, & si la tristesse l'abbat quelquefois, les rides n'en rompent presque point l'égalité. C'est là où commence à paroistre la rougeur que l'Amour fait souuent monter au visage, & lors mesmes que les autres parties sont pasles, celle-cy retient tousiours quelque chose de sa premiere couleur. Tantost les levres y sont rouges & humides, tantost pasles & seiches, & elles ne se meuent presque iamais qu'elles ne forment quelque souris

agreceable: Quelquefois on void celle de dessous qui tremble & qui blanchît d'une écume subtile: Quelquefois la langue s'avance sur elles, & par un léger tremouffement qu'elle se donne, elle les flatte & les chatouille: Si elle veut former quelques paroles elle begaye, & l'humidité que le desir fait monter à la bouche les naye & les estouffe. Enfin les oreilles ne seruent presque de rien à un Amant, il n'entend pas la moitié de ce que l'on dit, s'il répond c'est avec confusion, & ses discours sont à tous momens interrompus par de grands & de longs soupirs que le cœur & les poulmons exhalent sans cesse. S'il parle de sa Passion c'est avec une voix tremblante & adoucie qu'il fléchît à tous coups par ces accens passionnez, que le desir, la douleur, & l'admiration ont accoustumé de former. Il devient pâle & maigre, il perd l'appetit, il ne peut dormir; Et si quelquefois la tristesse & la lassitude l'assoupissent, son sommeil est sans cesse interrompu par les songes, qui donnent souvent plus de peine à son esprit, que les maux veritables qu'il endure. Quand la personne aimée se presente à ses yeux, quand on la nomme seulement, ou quand quelque chose luy en réveille le souvenir, au mesme instant son cœur s'esleue & s'agite, son poux se rend inégal & déréglé, il devient inquiet & ne peut plus demeurer en place. Tantost les frissons le saisissent, tantost la chaleur allume tout son sang;

sang ; par fois il se sent animé d'un courage & d'une force extraordinaire, par fois il se trouve abbatu & languissant, quelquefois mesme il tombe en deffillance. Enfin il se sent frappé d'une maladie qui se rit de l'art des Medecins, & qui ne trouve point de remedes que dans la mort ou dans l'Amour mesme. Mais ne passons pas outre, & finissons ce discours par l'artifice du Peintre qui l'a commencé : Cachons ce que nous ne pouvons pas décrire, & nous contentons de chercher les causes des effets que nous venons de marquer, dans l'essence & la nature de cette Passion.

*DE LA NATURE DE L'AMOUR.**II. PARTIE.*

NE des plus grandes merueilles qui se rencontre dans l'Amour, est que cette Passion estant si commune & si generale, & dont on peut dire que tous les sçauans hommes ont esté touchez ; il ne s'en est point encore trouué qui ait bien clairement découuert sa nature & son origine. Car apres auoir veu tout ce qu'ils en ont écrit, on peut asseurer que l'Amour des Philosophes est aussi bien auégle que celui des Poëtes ;

Et que celuy qui disoit que c'estoit vn ie ne sçay quoy, qui venoit de ie ne sçay où, & qui s'en alloit ie ne sçay comment, n'est pas vnde ceux qui a le plus mal rencontré. Or quoy que ie ne veuille pas examiner toutes les definitions que l'on en a données, les bornes que ie me suis prescrites, estans trop estroites pour souffrir vn si long discours; Il y en a pourtant quelques-vnes qui passent pour les plus raisonnables, dont il faut que ie marque les deffauts, si ie veux bien establir celle que ie dois proposer. Car on pourroit s'estonner de ce que ie n'approuue pas celle de Socrate, qui a esté plus sçauant en Amour que tous les Philosophes de l'antiquité; ny celle de Saint Thomas qui a mieux entendu la Morale qu'aucun qui ait esté apres luy: De sorte que ie suis obligé de dire les raisons qui m'esloignent de leurs sentimens, & qui me font prendre vn autre chemin que celuy qu'ils ont pris.

Pour ce qui est du premier qui a definy l'Amour *vn desir de la Beauté*, il confond deux Passions en vne, voire mesme il les détruit toutes deux; veu que le Desir ne se porte qu'aux choses que l'on n'a pas, & qu'il s'éteint quand on les possède; quoy que l'Amour se conserue dans la possession, & s'y rende mesme quelquefois plus violante: Et pour lors si l'Amour est vn Desir, ce ne sera plus Amour, puis que l'on ne peut desirer ce que l'on a; & par

la mesme raison le Desir ne sera plus Desir. Je sçay bien que l'on me dira qu'il n'y a point de possession si pleine & si entiere où le Desir ne puisse trouuer sa place ; Et que quand il n'y auroit que la continuation du bien dont on jouït, ce seroit assez pour l'occuper & pour le rendre inseparable de l'Amour. Mais cette fuite est inutile, car si la possession n'est pas entiere, elle suppose quelque partie dont on ne jouït pas encore : Et qui souhaite la continuation d'un bien, ne le considere plus comme present ; mais comme vne chose qui est à venir : Et partant il forme vne nouvelle idée du bien qu'il possede, & a vn motif different de celuy que sa presence luy donne. Et cela suffit pour causer deux diuerses passions, autrement il faudroit confondre encore l'Amour avec l'Esperance, voire mesme avec tous les autres mouuemens de l'ame qui se forment souuent par vn seul objet, selon que l'on le considere en diuerses manieres.

Pour Saint Thomas qui dit que l'Amour est *vne Complaissance de l'Appetit en la chose aymable* : où bien il prend le mot de Complaissance pour l'agréement que l'appetit trouue dans l'objet que l'imagination luy propose ; ou bien pour le plaisir & la ioye que cet objet luy donne : Si c'est l'agréement, il se forme auant l'Amour ; Si c'est le Plaisir il suruient à l'Amour. Car il est certain que lors que l'imagination ou l'entendement ont jugé

qu'une chose est bonne, la première chose que fait l'appetit est de l'aggréer & de consentir au iugement qu'ils en ont fait. Et quoy que cela paroisse plus clairement dans la volonté que dans l'appetit sensitif, parce que la volonté est libre de consentir ou de refuser ce que l'on luy propose, & que le Consentement semble estre vn acte qui luy soit particulier; Il y a pourtant dans l'appetit quelque image de cette action, & il est vray-semblable qu'il approuue ce que l'imagination luy presente avant qu'il s'émeue & se porte vers luy: Et cette approbation & aggréement est la Complaisance dont nous parlons, qui n'est rien autre chose que la satisfaction & le repos que prend l'appetit à la veüe des objets qui luy sont conformes. Ainsi la lumière réjouit les yeux auparavant mesme que l'appetit soit ému, & le plaisir qu'ils reçoivent en cette rencontre, n'est pas vne passion ny vn mouuement; mais vn certain repos qui vient de la conformité de l'objet avec la puissance: Le mesme arriue à l'appetit quand l'imagination luy propose quelque chose d'aymable; Il l'aggrée & s'émeut apres pour la posseder: De sorte que l'aggréement va deuant l'Amour, & la ioye vient apres comme nous verrons en suite.

Pour former donc vne definition de l'Amour qui n'ait point ces difficultez & ces deffaux; On doit premièrement supposer la difference qu'il y

a entre l'Amour qui est vne habitude, & celle qui est vne passion. Car la passion estant vn mouuement, quand ce mouuement cesse, la passion finit aussi, & l'on peut dire qu'il n'y a plus d'Amour; mais l'habitude ne laisse pas d'y estre encore, qui n'est rien autre chose que l'impresion de l'objet aymable qui est demeuré dans l'ame, & qui fait qu'à toutes les fois que la pensée le propose à l'appetit, il s'émeut & forme la passion dont nous parlons. La Passion d'Amour est donc vn mouuement, & parce que les mouuemens tirent leurs differences de la fin où ils tendent, il faut voir quelle est la fin de celuy-cy. Or commel'appetit nes'émeut que pour posséder le bien & pour fuir le mal, il ne faut pas douter que la possession du bien ne soit la fin de l'Amour; Et comme on ne peut posséder quelque chose sans s'unir en quelque façon à elle, il s'ensuit necessairement que l'Amour est *vn mouuement de l'appetit par lequel l'ame s'unit à ce qui luy semble bon*. Il est vray que d'abord cecy ne semblera pas veritable à cause que le plus souuent dans l'Amour, l'objet aymable est absent, avec lequel il n'est pas vray-semblable que l'ame s'unisse: Mais quand on considerera que les objets se peuvent unir aux puissances par leurs especes & par leurs images, ou par leur estre veritable; Et qu'il y a par consequent vne vnion réelle & vne qui ne l'est pas que l'Escole appelle *Intentionelle*, & que

l'on peut nommer *Ideale* : On verra que l'vnion qui se fait de l'appetit avec l'objet que l'imagination luy propose , est de cette derniere sorte ; parce que l'estre veritable des choses n'entre point dans l'imagination , il n'y a que leur idée & leur image. Et cette vnion est la seule qui conuient naturellement à l'appetit, ne pouuant à son égard s'vnir autrement au bien qui luy est présenté. Que s'il se porte à quelque autre sorte d'vnion, ce n'est pas pour luy qu'il l'a recherche ; mais pour les autres puissances qui peuuent s'vnir réellement à leurs objets. Car l'appetit est vne faculté politique qui ne traueille pas pour elle seule ; mais pour toutes les autres qui sont au dessous d'elle ; Et comme l'imagination est le centre de tous les sens, l'appetit l'est aussi de toutes les inclinations qui se trouuent dans les parties : De sorte que l'imagination ou l'entendement luy proposant ce qui leur est conuenable , il le recherche pour elles & tasche de les en faire jouir : Et alors si elles sont capables de s'vnir réellement avec leurs objets , il en souhaite l'vnion : Mais cela n'empesche pas qu'il ne s'vnisse auparavant avec eux par l'vnion qui luy est propre, & qui est comme le principe & la source de toutes les autres vnions qui conuiennent à l'Ame.

On dira peut-estre que l'Entendement & l'Imagination s'vnissent de la mesme sorte à ce qui leur est conuenable , & partant que l'Amour s'y peut

former aussi bien que dans l'appetit. Mais il y a bien de la difference; parce que les objets viennent & entrent dans l'entendement & dans l'imagination, & la connoissance qu'ils en ont se fait plutôt par le repos que par le mouvement, comme dit Aristote: Tout au contraire de l'Appetit qui se porte vers son objet, & sort comme hors de soy-mesme pour s'vnir à luy. De sorte que l'vnion qui se fait dans l'entendement & dans l'imagination, est purement passiue sans aucun mouvement de ces facultez; Mais celle de l'Appetit est actiue & se fait avec agitation. Ioint que l'vnion qui se fait par l'appetit est plus parfaite que celle qui se fait par la connoissance; D'autant que l'ame peut auoir auersion à vne chose qu'elle a conçeuë, qui est vne sorte de separation; Et partant l'vnion n'en est pas si parfaite comme celle de l'Appetit qui ne peut souffrir cette diuision, & qui par consequent est la plus accomplie qui se puisse trouuer dans les actions vitales.

Mais si l'Amour est vn mouvement de l'ame pour s'vnir à ce qui est aymable, il semble que lors qu'elle sera vnue avec luy, il n'y aura plus de mouvement ny par consequent plus d'Amour: Et comme l'vnion s'en peut faire en vn moment, parce qu'il n'y a rien qui le puisse empescher, il semble aussi que ce mouvement se doit faire en vn instant,

& partant que l'amour ne doit pas durer dauantage; qui seroit vne proposition bien estrange & contraire à la verité.

Pour respondre à cette objection, il faut remarquer qu'il y a des choses qui se meuuent pour arriuer à quelque fin separée de leur mouuement; Et qu'il y en a d'autres qui trouuent dans le mouuement mesme la fin qu'elles recherchent. Les premiers cessent de se mouuoir quand elles ont atteint leur but & leur fin: Mais celles qui n'en ont point d'autre que le mouuement, ou pour le moins qui soit separée du mouuement, ne pretendent jamais à se reposer: Et comme le repos est vne perfection en celles-là, c'est vne imperfection en celles-cy. Or l'Appetit est de ce dernier genre, il se meut veritablement pour s'vnir au bien, mais l'vnion qu'il recherche ne se peut faire que dans le mouuement; & quand il cesse, elle se perd: De sorte que pendant que l'objet aimable est present, il faut qu'il s'agite sans cesse pour obtenir la fin qu'il desire, qui est de s'vnir avec luy: Et s'il vient à se reposer, cela procede de ce que cet objet ne luy est plus present, ou pour le moins de ce qu'il ne luy est plus offert comme bon. L'Amour est donc vn mouuement & vne vnion de l'Appetit à ce qui est aimable, present ou absent; par ce que son absence n'empesche pas que l'imagination n'en propose l'idée à l'Appetit, qui est la seule avec qui il se puisse naturellement vnir.

vnir. Il est vray que trauaillant pour les autres puissances, comme nous auons dit, il ne s'arreste pas à cette simple vnion; Il recherche encore celle qui leur est conuenable; il desire pour la veüe & pour l'ouïe, que leurs objets soient en vne distance raisonnable; Il veut pour le goust & pour le toucher que les leurs soient vnies immédiatement à leurs organes; enfin en autant de manieres quë les choses se peuvent vnir, l'appetit & la volonté souhaittent pour elles l'vnion qui leur est propre. Et il faut auoïer que le concours de tous ces mouuemens fait la passion d'Amour complete & entiere, & que le premier, dont nous venons de parler, quoy qu'il contienne toute son essence & sa forme, n'en a pas toute l'estenduë; on peut dire que c'en est la source & que les autres sont des ruisseaux qui la grossissent.

Voyons maintenant quelle est l'agitation particuliere que l'appetit se donne pour faire cette vnion, & en quoy elle est differente de celle qui se trouue dans la joye, dans le desir, & dans l'esperance, par lesquelles, aussi bien que par l'Amour, il semble que l'ame se veüille vnir au bien qui luy est representé. Car ce n'est pas assez pour la parfaite connoissance des Passions, de dire que ce sont des mouuemens, si on ne marque les differences de ces mouuemens, & si on ne fait voir les dif-

ferentes impressions , & les diuers progresz que la diuersité des objets cause dans l'appetit.

Il faut donc supposer qu'il y a quelque rapport entre les mouuemens de l'ame & ceux du corps , & que les differences qui se trouuent en ceux-cy, se rencontrent en quelque façon aux autres: Car puis-que les effets sont semblables à leurs causes , les mouuemens du corps qui sont des effets de l'ame , doiuent estre les images de l'agitation qu'elle se donne. En effet on dit que l'Entendement se porte droit vers son objet, qu'il se réfléchit & se replie sur luy, qu'il rentre en soy-mesme, qu'il s'égaré & qu'il se confond: Qui sont toutes façons de parler tirées des mouuemens sensibles , & qui doiuent faire croire qu'il se fait quelque chose de pareil en l'ame, & principalement en sa partie appetitiue , par ce que c'est par elle qu'elle s'esmeut & s'agit en effet. Et il ne sert de rien de dire que ce ne sont pas de veritables mouuemens, & qu'ils sont seulement metaphoriques: Car outre qu'il faudroit alors confesser que toutes les definitions des passions , où le mot de *mouuement* est tousiours employé , sont metaphoriques; Il est certain que cela n'empesche pas qu'il n'y ait de la ressemblance entre les vns & les autres, quoy qu'ils soient de diuers genres. Mais ie dy bien plus , à considerer exactement les mouuemens corporels , on peut dire que ce ne sont pas de si parfaits & de si veritables mouuemens que

ceux de l'ame, & que ce n'en sont que des images grossieres & imparfaites ; Puisqu'il est vray que dans l'ordre des choses, celles qui sont inferieures, sont plus noblement & plus parfaitement dans les superieures ; & que toutes ne sont que des coppies tirées les vnes des autres, dont l'original est en la souveraine Idée de tous les Estres.

Quoy qu'il en soit, puisqu'en definissant la passion en general on se sert du mot de *mouvement*, il faut de necessité pour marquer les differences des passions, y employer les differences du mouvement, & trouver en chacune d'elles quelque agitation particuliere qui ait de la conuenance & du rapport avec quelqu'un des mouuemens sensibles.

Pour decouvrir donc celuy qui est propre à l'Amour, il faut premierement sçauoir où est l'Image du bien ; & si elle demeure dans l'imagination, ou si elle s'écoule dans l'appetit ; estant certain que si l'appetit la va chercher hors de soy, il doit s'agiter d'une autre sorte que s'il la rencontre en luy-mesme. Il est vray que cela n'est pas aisé à decider, & quelque party que l'on puisse prendre, il s'y trouue des inconueniens qui semblent inéuitables. Car si l'image du bien ne sort point de l'imagination, l'appetit qui est une puissance aveugle, ne la peut pas connoistre ; & partant il ne doit pas se mouuoir pour s'vnir à elle, ne sçachant pas qu'elle y soit. De dire aussi qu'elle en sorte & qu'elle s'écoule dans l'appe-

tit, elle y sera inutile pour la même raison ; puisqu'elle ne sert que pour représenter les choses & en donner la connoissance , dont l'appetit n'est pas capable. Joint qu'il est mal-aysé de concevoir, comment cette image peut couler de l'imagination en vne autre puissance ; parce qu'outre que les accidens ne peuvent passer d'un sujet à l'autre, elle est le terme & l'effet formel d'une action immanente, qui a cela de propre de ne sortir jamais de la faculté où il a esté produit.

Pour éviter cet embarras & ne s'engager pas plus avant dans les doutes de l'Escole ; Il faut dire que l'image qui est dans l'imagination, ne sort point en effet hors d'elle, pour la raison que nous venons d'apporter: Mais comme à la présence des corps lumineux, la lumière se produit dans l'air qui les environne ; Aussi quand cette image s'est formée dans l'imagination, elle se multiplie dans toutes les parties de l'ame, elle les éclaire, & excite après celles qui sont capables d'estre émeuës. Il y a même grande apparence que c'est en effet quelque lumière raffinée & purifiée, puisque les images des choses corporelles qui frappent nos yeux, ne sont autre chose que des lumières, comme nous auons démontré en son lieu ; Et qu'il n'y a rien qui soit plus conforme à l'esprit, que cette qualité qui est comme le milieu ou l'Orizon des choses spirituelles & des corporelles. Quoy qu'il en soit on ne doit pas douter que ces ima-

ges, ne se multiplient aussi bien que celles des corps; puisqu'elles sont plus excellentes qu'elles, & que nous en auons des preuues asseurées dans les effets de la memoire & de la vertu formatrice qui doit necessairement estre imbuë de ces images, pour former les parties conformément au dessein que l'imagination luy propose, bien souuent contre sa conduite ordinaire.

Mais s'il est vray que ces Idées ne sont propres qu'à représenter les choses, & en donner la connoissance, que seruiraient-elles aux facultez qui ne connoissent point, comme sont celles dont nous venons de parler? Il faut répondre qu'il y a deux sortes de connoissance, l'une est claire & distincte qui appartient aux sens, à l'imagination & à l'entendement; l'autre est obscure & confuse qui se trouue dans l'appetit & dans toutes les autres puissances, qui ont vne connoissance naturelle de leurs objets & de ce qu'elles doiuent faire.

Il est donc certain que l'Image du bien est dans l'imagination comme vne lumière qui répand ses rayons dans l'appetit, qui l'éclaire & l'excite apres à se mouuoir pour s'vnir à elle: Car bien qu'elle se soit multipliée, & que l'appetit soit tout plein de l'éclat qu'elle jette; il ne se contente pas de cette influence, il tasche de s'vnir au centre & à la source dont elle est découlée; comme on void qu'il arriue au fer, qui ayant receu la vertu Magnetique, se

porte vers l'Aimant qui en est le principe & la source, afin de s'vnir plus estroitement à luy.

De sorte qu'il est fort vray-semblable que pour former la passion d'Amour, l'appetit se porte droit vers l'idée du bien qui est dans l'imagination ; & que ce mouuement est semblable à celuy de toutes les autres choses naturelles qui se meuuent ainsi vers ce qui leur est conforme.

Mais cecy fait naistre de grandes difficultez : Car bien que l'on puisse conceuoir cette sorte de mouuement dans l'Appetit sensitif, à cause qu'il est placé en vn organe different de celuy de l'imagination, & qu'il y a quelque espace entre deux, où l'on peut se figurer que ce mouuement se fait : Cela ne peut auoir lieu dans l'Amour qui se forme dans la partie superieure de l'ame, où la volonté n'est point séparée de l'entendement, & vers lequel par consequent elle ne se porte point, puisqu'elle est tousiours naturellement vnie avec luy. Je dy bien plus : quand il ne seroit question que de l'Appetit sensitif, il est bien difficile de comprendre comment il se peut mouuoir ainsi : Car il n'y a pas d'apparence qu'il sorte hors de son siege & de son organe pour se joindre à celuy de l'imagination, puisque tous ses mouuemens sont des actions immanentes : S'il n'en sort point aussi, comment s'vnira-t'il à cette idée qui est dans l'imagination ?

Pour leuer ces difficultez & respondre à ces raisons qui semblent assez pressantes, il faut se souuenir que les mouuemens de l'ame, bien qu'ils ayent de la conuenance avec ceux du corps, ne leur sont pas tout à fait semblables, & que s'ils participent à quelque chose de leur nature, ils n'en ont point les defaux : Car ils ne demandent point cette succession de temps, ny ce changement de lieu qui se trouue tousiours en ceux-là, & qui sont des suites necessaires de l'imperfection de la matiere. Ils se font en vn moment & en mesme endroit, pour le moins ne sortent-ils point de la puissance où ils se forment. Car il ne faut pas s'imaginer que l'Appetit en s'approchant du bien, ou en s'éloignant du mal, quitte ses bornes naturelles & qu'il passe d'un lieu à l'autre, à la maniere des corps animez : Toutes ses agitations se font en luy mesme, & comme l'eau qui est enfermée en vn gouffre, se peut mouuoir en diuerses façons, sans en sortir, aussi cette puissance qui est comme vn abyssme dans l'ame, peut estre diuersement agitée dans ses propres bornes ; & par le different transport de ses parties, venir tantost heurter ses limites, tantost se retirer vers son centre, en vn mot faire tous les mouuemens qui se remarquent dans les passions. Il n'est donc point necessaire que la volonté soit separée de l'entendement, & qu'il y ayt quelque espace entr'eux deux pour faire le mouuement dont nous parlons :

S'agitant en elle mesme & poussant ses parties vers l'idée du bien qui luy est représenté par l'entendement, elle s'vnit à elle autant qu'elle peut, & fait ainsi la passion d'amour. Il en est de mesme de l'Appetit sensitif; car bien que son principal organe soit éloigné de celuy de l'imagination, il ne faut pas croire que ces deux facultez soient toutes renfermées en ces parties, elles se respendent par tout le corps, & sont tousiours jointes ensemble, comme nous monstrerons plus amplement au discours de la Ioye. De sorte que le mouuement qui s'y fait, est semblable à celuy de la volonté, & en l'un & l'autre l'Amour n'est rien qu'un mouuement de l'appetit, qui se porte droit vers l'idée du bien & qui s'vnit à elle: Ce qui ne se fait pas dans les autres passions, comme nous ferons voir.

Voilà donc ce que c'est que l'Amour en general, dont il est facile de marquer les differences par les differences des objets qui le peuuent émouuoir: Car comme il y a des Biens de l'ame, du corps & de la fortune, & que chacun d'eux est honeste, vtile ou delectable; il est certain qu'encore que les mouuemens par lesquels on ayme toutes ces choses, soient de mesme nature, & qu'ils ayent en general vne mesme fin, qui est d'vnir l'appetit à ce qui est bon; ils sont neantmoins differens entr'eux à cause que ces biens sont differens: Ainsi il y a vn Amour
des


des richesses, des plaisirs, des honneurs, & des vertus : en vn mot, autant qu'il y a de sorte de biens faux ou veritables, il y a autant de sortes d'Amour, dont nous n'auons pas fait dessein de parler icy, parceque la plus-part de ces especes sont comprises dans les vertus & les vices dont nous traiterons en suite, & parce que nous nous sommes restrains à l'Amour que la Beauté fait naistre dans l'appetit.

Cét Amour se peut definir *vn mouuement de l'Appetit par lequel l'ame s'unit à ce qui luy semble Beau*. De sorte que toute la diuersité qu'il y a en cette definition & celle de l'Amour en general, consiste dans la Beauté. C'est pourquoy nous auons deux choses à examiner, premierement ce que c'est que la Beauté; en second lieu, pourquoy elle donne de l'Amour. Mais parce que cette recherche est extremement haute & difficile, & qu'elle pourroit rompre la suite de ce Discours, nous l'auons mise à la fin de ce Chapitre, pour parler des effets que l'Amour cause dans les humeurs & dans les Esprits.



*QUEL EST LE MOUVEMENT
que l'Amour cause dans les Esprits & dans
les humeurs.*

III. PARTIE.

 **P**UISQUE dans les Passions les mouve-
mens des Esprits & du sang, sont con-
formes à ceux que l'ame ressent en elle-
mesme ; il n'y a point de doute que
l'Amour vnissant l'appetit à l'idée du bien qui luy est
representé, ne produise aussi dans les Esprits quel-
que sorte de mouvement qui seconde son dessein,
& qui rende cette vnion plus forte. Mais comme
les sens ne nous seruent de gueres pour connoistre
la difference de ces mouuemens, il faut que l'En-
tendement supplée à leur defaut, & que le discours
fasse voir quel est ce mouvement d'esprit qui est le
plus vnitif, puisque c'est celuy qui doit accompa-
gner cette passion.

A cét effet, il faut supposer deux choses tres-
veritables ; La premiere, que le cœur est le princi-
pal organe de l'appetit sensitif ; La seconde que le
cerueau est celuy de l'imagination. Or comme
l'idée du bien se forme dans l'imagination, & que
le mouvement des esprits commence au cœur ; il

faut de nécessité que l'ame ayant dessein de les venir au bien qu'elle a conçu, les transporte du lieu où ils commencent à se mouvoir vers celui où ils doivent rencontrer cet objet : Et parce que la première naissance de l'Amour se fait par cette union intérieure de l'appetit dont nous avons parlé ; il faut aussi que le premier mouvement que souffrent les esprits, les pousse au cerveau, où il semble que cette union se doit faire : Car l'idée ne sort point de la faculté qui la produit, comme nous avons montré. Et d'autant que les esprits portent avec eux la chaleur & le sang, de là vient que l'imagination des Amans s'échauffe, & fait après tant de belles productions, & des extravagances mêmes, si le mouvement & la chaleur ont trop de violence. L'on peut dire encore que la pâleur qui leur est si ordinaire, vient en partie de ce transport d'esprits au dedans du cerveau, qui abandonnant ainsi le visage, le laissent sans chaleur & sans éclat. Mais s'il se rencontre que l'objet aimable se présente aux sens, alors la plus grande partie de ces esprits accourent aux parties extérieures, & les peignent de la couleur du sang qu'ils entraînent avec eux, & qui est le plus pur qui soit dans les veines, comme nous dirons tantost. Il est vray qu'il y a des passions qui se meslent avec celles-ci, & qui causent souvent dans les humeurs un mouvement contraire à celui que nous venons d'exprimer ; mais nous ne considérons icy que les

effets qui sont propres à l'Amour, & non ceux qu'elle emprunte des autres. C'est pourquoy nous pouuons conclure que le premier effet de l'Amour sur les esprits, est de les faire sortir du cœur, & de les transporter au cerueau & aux parties exterieures.

Mais cela ne suffit pas encore, il faut voir si dans ce mouuement ils coulent avec liberté ou avec contrainte, c'est à dire s'ils se dilatent ou s'ils se resserrent; Car il semble que ce soient là les deux premieres differences du mouuement local. Or comme il n'y a que deux rencontres qui puissent obliger l'ame à tenir les esprits serrez en leur mouuement, sçauoir est quand elle attaque le mal, ou quand elle le fuit; parce qu'en l'une elle a soin de se fortifier, & pour ce sujet de ramasser & reünir les esprits; Et qu'en l'autre la fuite se fait avec empressement, qui les precipite & les confond ensemble: Il est certain qu'elle n'a aucun de ces motifs en cette passion, & que ne considerant autre chose que la bonté de son objet, elle ne void point d'ennemy qu'elle veuille assaillir ou qu'elle doie craindre: C'est pourquoy elle agite les esprits avec liberté, elle les dilate, & semble les ouurir, pour mieux receuoir le bien qui se presente, & pour s'vnir ainsi plus parfaitement à luy.

Passons encore plus auant , & voyons si ce Mouuement est inégal , & s'il se fait avec vehemence, comme celuy qui suruient dans les passions impetueuses : Il est certain que la cholere émeut les esprits & les humeurs , avec plus de confusion & de desordre que ne fait l'Amour , à cause des diuers & frequens efforts que l'ame est contrainte de faire pour chasser le mal ; Et qu'il en est de mesme que des Torrens dont les vagues se precipitent les vnes sur les autres, & font vn courant tout plein de bouillons & d'écume ; Mais que l'Amour fait couler les esprits & le sang dans les veines de la mesme sorte que l'eau court dans les canaux des fontaines , ou dans les riuieres dont le lit est large & vny : Car l'ame qui dilate les esprits, élargit à proportion les vaisseaux, & leur donnant ainsi plus de liberté, elle rend leurs cours moins turbulent & moins confus. Mais la principale raison de l'égalité qui s'y trouue, vient de ce que l'Amour n'a point pour l'ordinaire de passions à sa suite qui ayent des mouuemens contraires, comme a la cholere que la douleur accompagne tousiours, & qui retire les esprits vers le cœur au mesme temps qu'elle les pousse au dehors. Car bien que la ioye, le desir, & l'esperance qui sont presque tousiours avec l'Amour, remuent diuersement le sang, elles ne luy impriment pas pourtant des mouuemens tout à fait opposez, comme nous montrerons. C'est pourquoy il n'est pas sujet au

choc, ny à cette agitation inégale que la contrariété des mouuemens cause dans les corps fluides : Mais de quelque violence qu'il soit poussé, toutes ses parties coulent également & sans confusion. Et il ne faut point douter que cette ioye secrete que ressentent les Amans, sans penser mesme à l'objet aymé, ne vienne de cette sorte de mouuement, dont l'impression est demeurée dans les humeurs, apres que l'agitation de l'ame est cessée : Car comme la nature ayme l'ordre & l'égalité en toutes ses actions, quand elle void que le mouuement du sang est conforme à son inclination, elle ressent vne certaine ioye, dont l'image ou l'ombre se presente à nostre esprit, & nous rend gais, sans que nous en sçachions la cause. Et ie croy pour la mesme raison que si les humeurs estoient tousiours agitées de ce flux & reflux que les passions opposées ont accoustumé de causer, il n'y auroit aucun moment dans l'Amour qui fût exempt de chagrin & d'ennuy, & que l'on n'y sentiroit iamais cét excez de ioye qui s'y rencontre si souuent ; par ce que l'ame ne peut souffrir de mouuemens contraires qu'elle ne souffre en mesme temps quelque peine & quelque sorte de douleur. Mais que dirons-nous donc quand ces passions turbulentes, telle qu'est la cholere, la peur, & le desespoir, se meslent avec l'Amour ? Doit-elle leur quitter la place, quand elles entrent dans l'Ame, & mourir quand elles naissent, puisque

leur mouuement est contraire au sien ? Certainement ie croy que l'habitude de l'Amour demeure tousiours ; mais que la passion cesse, quand il y en a vne autre qui détruit son mouuement , principalement si elle est violente : Et de fait vn homme qui est en cholere , ou qui est saisi de la peur , ne pense pas à l'objet aymé ; pour le moins les pensées qu'il en a, sont étouffées par celle de la vengeance ou du peril qu'il veut éuiter. Il est vray que comme ces passions entrent promptement dans l'Ame , elles en sortent ordinairement bien viste, & au mesme temps la premiere y retourne, l'impression de l'objet aymé fournissant de nouuelles idées qui réueillent l'appetit, & y causent vne nouuelle émotion. Ce qui n'est pas difficile à croire , si l'on considere que l'appetit & les esprits s'agitent plus facilement que l'air ; & que leur mouuement est en quelque façon semblable à celuy des éclairs, qui percent les nuées en vn instant, qui se suiuent coup sur coup, & qui ne laissent apres eux aucune trace du chemin qu'ils ont fait. Que si ces passions sont foibles , elles peuuent veritablement compatir avec l'Amour ; mais elles en diminuënt l'ardeur , parce que l'esprit qui se partage à diuers objets , ne peut se donner tout entier à celuy qui est aymable , & parce que l'agitation que celle-cy cause dans les humeurs , est empeschée par le flot des autres qui s'opposent à son cours.

Voyons maintenant quelle est la vehemence qui accompagne ce mouuement d'esprits , & si elle est aussi grande en cette passion qu'elle est dans la cholere , dans la peur , & dans quelques autres : Car il est certain qu'il y en a quelque-vnes qui de leur nature ne sont pas si violentes ; telle qu'est l'esperance & la compassion, où l'on ne remarque jamais ces extremes transports que l'on voit en celles-là. Or il ne faut pas croire que l'Amour soit comme ces deux dernieres , & qu'il ait toujours la moderation qu'elles ont. Les saillies qu'elle fait & les tempestes qu'elle excite , sont quelques-fois si grandes qu'elles renuersent l'esprit ; Et l'alteration que souffre tout le corps en ces rencontres , montre éuidemment que les humeurs sont émeuës avec grande impetuosité. A la verité les commencemens en sont doux , & l'on peut dire qu'ils sont semblables à ces vents paisibles qu'une foible chaleur éleue , & qui se changent apres en tourbillons quand elle est deuenüe plus forte : Car comme dans la naissance de cette passion l'idée de l'objet aymé ne fait pas grande impresion sur l'esprit, n'y estant , s'il faut ainsi parler, que legerement & superficiellement empreinte, elle ne fait aussi qu'une legere émotion dans l'appetit : Mais quand elle s'est insinuée au fonds de l'ame , & qu'elle s'est renduë maistresse de l'imagination, alors elle souleue puissamment toutes les facultez motiues, &
cause

cause ces grands orages qui font souvent perdre la raison & la santé.

Je ne veux pas pourtant dire que quand l'ame est venue à cet excez, l'appetit & les esprits soient continuellement agitez avec cette violence: Je sçay que la tempeste n'en est pas tousiours égale, qu'elle se relasche bien souvent, & que mesme elle se dissipe; soit que les diuers desseins que cette passion inspire, détournent l'ame de sa premiere & principale pensée; soit que toutes les choses de la nature ne puissent pas long-temps demeurer en vn estat violent, & que l'esprit se lasse d'estre tousiours tendu vers vn mesme objet; d'où vient que les plus fortes passions deuiennent à la fin languissantes & s'apaisent d'elles-mesmes. Et à la verité ces grands transports dont nous parlons, ne se font que lorsque l'objet aymé se presente à l'imagination avec quelque puissant attrait, comme il arriue dans les premieres pensées qu'elle en a, ou quand il paroist inopinément aux sens, ou quand l'esprit s'y figure de nouuelles perfections, & forme de nouueaux desseins pour les posséder: Car alors l'ame qui est surprise par cette aymable nouveauté, s'ébranle tout à coup, & pousse les esprits comme vn grand flot qui la doit porter vers le bien qui se presente.

Mais quoy? si l'Amour émeut ainsi les Esprits, il faudra qu'elle produise les mesmes effets que la ioye, & que sa violence esteigne la chaleur des

entrailles & cause des defaillances & des syncopes, comme fait celle-cy. Il semble mesme que de necessité ces accidens s'y doiuent rencontrer, puis-que ces deux passions ont vn mesme objet, qu'elles ne se separent gueres l'une de l'autre, & qu'elles ont de mesmes accroissemens; car quand l'Amour est extrême, la ioye le doit estre aussi. Et neantmoins on n'a point remarqué aucun de ces symptomes dans l'Amour dont nous parlons: Pour le moins s'il est arriué quelque chose de pareil aux Amans, il est certain que l'excez de ces deux passions n'en a pas esté la cause; mais que ç'a esté la douleur, le desespoir, ou quelqu'autre semblable. Comment se peut-il donc faire que l'Amour de la Beauté ne produise pas les mesmes effets que la ioye; ou que la ioye ne cause les mesmes accidens en cette passion qu'elle cause souuent toute seule?

Pour decouvrir ce secret, il faut premierement supposer que ces desordres n'arriuent pas souuent, qu'on ne les a remarquez qu'aux vieillards & aux femmes, & que la ioye qui les a excitez, a esté causée, ou par le gain de quelque victoire inespérée, ou par la rencontre de quelque objet fort ridicule, ou par la decouverte de quelque grand secret dans les sciences, qui sont choses dont la jouissance appartient seulement à l'esprit. En effet, comme les choses spirituelles ont cela pardessus les corporelles, qu'elles sont plus nobles & qu'elles

entrent dans l'ame toutes entieres & sans se partager, la possession en doit estre plus parfaite & la ioye plus rauissante : C'est pourquoy il est vray-semblable que les syncopes, qui doiuent estre les effets d'une passion violente, suiuent les ioyes spirituelles, comme les plus grandes & les plus fortes, & qu'ils suruiennent plutôt aux natures foibles, qu'à celles qui sont robustes & capables de leur resister. L'ame se trouuant donc surprise à l'abord de ces objets, & s'agitant avec precipitation pour s'vnir à eux, les Esprits qui suiuent ses mouuemens, sortent du cœur & s'élancent avec tant de violence aux parties superieures, qu'ils perdent l'vnion qu'ils auoient avec leur principe, en la mesme sorte que l'eau se diuise, estant poussée avec trop d'impetuosité. Or parce que le cœur doit continuellement inspirer sa vertu aux parties, & qu'il n'y a que les esprits qui la leur puissent porter ; quand ils viennent à se desvnir d'avec luy, il faut que cette influence s'arreste, & que les actions sensitiues & vitales qui en dépendent, cessent jusques à ce qu'ils s'y soient réunis : Et parce que l'ame est alors toute rauie dans la jouissance d'un bien qu'elle estime excellent, elle n'a pas le soin de remedier à cette interruption qui s'est faite dans les esprits, ny de ramener ceux qui se sont écartez, ou d'en enuoyer d'autres pour remplir les vuides qui s'y sont faits : C'est pourquoy ces deffaillances durent long-

temps, & causent quelquesfois la mort; la chaleur s'éteignant tout à fait, & la nature n'ayant pas la force de reparer ses pertes, ny de se remettre en son premier estat.

Mais ce desordre ne peut arriuer dans l'Amour dont nous parlons; dautant que l'on ne possède iamais entierement la Beauté corporelle, & qu'il y a tousiours quelque chose qui entretient le desir, l'esperance & la crainte; C'est pourquoy l'ame se partageant à diuers desseins & ne se laisât pas transporter si puissamment comme elle fait dans la joiïissance des biens spirituels, les esprits ne se jettent pas avec tant de precipitation ny d'impetuosité, & ne sont pas sujets à cette diuision qu'ils souffrent quelquesfois dans la ioye, & qui est la cause des synco pes dont nous venons de parler. Nous toucherons encore à cette matiere en d'autres lieux: Voyons quelle est la chaleur que cette passion excite, & quelles humeurs elle émeut particulièrement.


Il est certain que l'Amour, la ioye & le desir, répandent par tout le corps vne chaleur humide & agreable, dautant que les esprits remuent en ces passions les humeurs les plus tempérées, dont les vapeurs sont douces & humides: Mais ces humeurs y sont plutôt émeuës que les autres, parce que les esprits qui ont vne grande conuenance avec les plus pures & les plus subtiles parties du sang, comme estant celles dont ils tirent leur origine, doiuent se

mesler & s'unir plus facilement avec elles qu'avec les autres qui sont plus grossieres & qui sont éloignées de leur nature: Et partant il ne faut pas douter que quand ils s'agitent, ils n'entraînent premièrement ces parties du sang, auxquelles ils sont plus fortement attachez, & qui estans les plus subtiles, sont aussi les plus faciles à se mouvoir. Joint que l'ame à qui les humeurs seruent d'instrumens pour arriuer à la fin qu'elle se propose, employe les vnes ou les autres, suivant qu'elles ont des qualitez propres à executer ce qu'elle veut: d'où vient que dans les animaux venimeux elle agite le venin pendant la cholere, & dans tous les autres elle excite la bile & la melancholie, parce que ce sont des humeurs malignes qui peuuent détruire le mal qu'elle attaque. De sorte que n'ayant point d'ennemis à combattre dans les passions dont nous parlons, elle ne doit point émouvoir d'autres humeurs que celles qui sont conformes au bien qu'elle veut accueillir: C'est pourquoy il n'y a que le sang le plus doux & le plus pur qui s'agite ordinairement dans l'Amour, & qui cause cette chaleur douce & vaporeuse qui se répand par tout le corps.



*QUELLES SONT LES CAUSES
des Caractères de l'Amour.*

IV. PARTIE.

 A I s il est temps d'arriuer au but que nous nous sommes proposez : Il faut que nous tirions des principes que nous venons d'establiir, les causes des Caractères de cette Passion. Examinons donc premierement les Actions Morales.

Comme il n'y a point de Passion qui produise tant de differentes actions, ny qui fasse tant d'extravagances que celle-cy, ce seroit vne chose bien ennuyeuse de faire la recherche de toutes, & qui mesme seroit inutile, puisque la pluspart procede des autres Passions qui l'accompagnent, dont il nous faut parler en particulier. C'est pourquoy nous ne toucherons icy que les principales qui sont à mon aduis : *La pensée continuelle d'un Amant à l'objet aimé ; La haute estime qu'il en fait ; Les moyens qu'il employe pour le posseder ; Et l'extravagance des paroles dont il se sert pour parler de sa passion.* Car il n'y a gueres d'actions dans l'Amour, qui ne se puissent rapporter à quelqu'une de ces quatre.

Pour ce qui regarde la premiere, quoy que ce soit vne chose commune à toutes les passions d'occuper fortement l'esprit, & de le tenir tendu vers l'objet qui les entretient; il n'y en a pourtant point qui le fasse plus puissamment & plus longuement que l'Amour: Car, ou elles sont impetueuses & turbulentes, ou bien elles sont lentes & dociles; les premieres se dissipent incontinent, & l'on peut appaiser ou détourner les autres par la force du discours, voire mesme par d'autres passions. Ainsi les fâcheuses s'adoucissent par les plaisirs, les agreables se diminuënt par les afflictions, & toutes se peuuent changer en d'autres plus fortes, s'il se presente des objets plus puissans que ceux qui les ont excitées; car vne grande douleur en fait oublier vne legere, & vne ioye excessiue oste le sentiment d'une mediocre. Mais il n'en va pas ainsi dans l'Amour, elle a cela de propre qu'elle est vehemente & de longue durée, qu'elle n'écoute point la raison, & que rarement elle peut estre changée ou diminuée par l'effort de quelque passion que ce soit. Dautant que l'imagination est tellement blessée, qu'elle n'estime pas qu'il y ait de plus grand bien à posseder, & qui luy puisse donner plus de contentement que l'objet aymé: C'est pourquoy il n'y en a point d'autre, quelque excellent qu'il soit, qui puisse détourner son inclination, & l'attirer à luy; parce que l'ame ne quitte iamais vn plus grand bien, pour en

rechercher vn moindre. Il en est de mesme du dé-
plaisir; car si l'on est aymé, il n'y a point de peine ny
de douleur qui ne se dissipe par le contentement
que l'on en reçoit; Et si on ne l'est pas, comme
l'ame ne connoist point de plus grand mal que celuy-
là, tous les autres sont trop foibles pour luy en oster
la pensée: C'est pourquoy elle considere continuel-
lement le bien dont elle est priuée, elle le desire sans
cesse, & cherche en sa possession l'unique remede
qui peut guerir tous ses déplaisirs. Mais la premiere
origine de tous ses effets est la puissante impressi-
on que la Beauté fait en l'ame, de sorte qu'en faisant
voir pourquoy les objets des autres passions ne la
peuvent faire si forte ny si profonde, on fera voir
aussi pourquoy elle est de plus longue durée, &
pourquoy elle tient l'esprit plus tendu que pas vne
des autres.

C'est vne verité bien asseurée qu'il y a en nous
vne secrete connoissance des choses qui seruent à
nostre conseruation; Et il est vray-semblable que
cette connoissance se fait par le moyen de quelques
idées que la Nature a imprimées au fonds de l'ame,
& qui estans comme cachées, & enseuelies dans
ses abysses, s'excitent & se releuent à l'abord de
celles que les sens y apportent, & causent apres
dans l'appetit l'Amour ou la haine, le desir ou l'a-
uersion. Or comme il n'y a que deux choses qui
seruent à nostre conseruation, la recherche du
bien

bien & la fuite du mal, il est bien certain que la nature pense plustost à chercher le bien qu'à s'esloigner du mal : Et comme il y a encore des biens qui sont plus excellents & plus viles que les autres, qu'elle a plus de soin de ceux-là que de ceux qui ne le sont pas tant, qu'elle en forme vne idée plus exacte, & que l'impresion qu'elle en fait, est plus forte & plus profonde. Cela estant, il ne faut pas douter que la conseruation de l'espece estant vn bien plus general & plus excellent que tous les autres qui ne regardent que le particulier, n'ait obligé la nature d'en donner à l'ame vne connoissance plus efficace & vn desir plus ardent que de quelqu'autre que ce soit ; Et qu'elle ne luy ait par conséquent imprimé puissamment l'idée de la Beauté, puisque c'est la marque qui luy fait connoistre ce bien-là, & l'attrait qui l'excite à sa possession. De sorte que la Beauté exterieure entrant dans l'imagination, & rencontrant cette idée generale que la nature y a grauée, s'vnit avec elle, excite & réueille ce secret & puissant desir qui l'accompagne, & l'applique à l'objet qu'elle luy presente. Et c'est de là d'où vient cette forte attention qui attache continuellement l'esprit d'un Amant à la personne aymée, & qui luy cause apres l'Amour du silence & de la solitude, le dégoust de tous les diuertissemens qui luy estoient les plus agreables, & toutes les visions qu'une vie solitaire inspire à vne ame agitée de crainte &

d'esperance, en vn mot blessée de la plus cruelle de toutes les passions.

Nous auons maintenant à chercher la source de cette haute estime que l'on fait de l'objet aymé; car c'est d'elle que découlent les respects, les soumissions, les seruices, & la pluspart de ces façons de parler dont les Amans se seruent. Et certainement c'est vne chose estrange & qui seroit incroyable, si on ne la remarquoit tous les iours, de voir les Roys soumettre leur Couronne & leur Puissance à la beauté d'une Esclauue, les plus sages adorer vne personne vitieuse, & les plus courageux s'assujettir à des Ames foibles, basses & dignes de mépris. D'où peut venir ce puissant charme qui fait méconnoistre ce que l'on est, & ce que l'on ayme, & qui nous donne vne si mauuaise opinion de nous-mesmes, & vne si auantageuse de ce que nous aymons? Il ne faut pas douter que l'imagination ne soit la principale cause de cette erreur; comme elle a le pouuoir d'agrandir les images qu'elle reçoit, & de les charger mesme de nouveaux phantômes qui déguisent les choses & les font paroistre tout autres qu'elles ne sont, elle fait sur l'image de la Beauté qui luy est représentée, ce qu'elle a accoustumé de faire dans les songes, où sur vne legere idée qu'elle a de l'humeur qui s'agite, elle forme cent sortes de chimeres qui ont quelque conformité avec cette

humeur : Car l'imagination receuant l'image de l'objet aymé, la forme sur le modelle de cette idée generale de la Beauté que la nature luy a imprimée, la pare des mesmes graces qu'elle a, la confond avec elle, & se represente ainsi la personne aymée, beaucoup plus parfaite qu'elle n'est en effet. Et l'on peut dire encore qu'il en arriue icy comme dans ces maladies de l'esprit, où l'erreur particuliere qui le tient en desordre, altere & corrompt toutes les pensées qui ont quelque rapport avec elle, celles qui en sont éloignées, demeurans assez raisonnables: dautant qu'un Amant peut bien conseruer son iugement libre dans ce qui ne concerne point la personne qu'il ayme ; mais si-tost qu'elle y est interessée, il faut qu'il soit esclau de sa passion, & qu'il iuge des choses suiuant cette agreable erreur qu'elle luy a inspirée. En effet c'est vne merueille qu'un visage difforme, & que l'on viendra de iuger tel, paroisse incontinent apres plein d'attraits, comme si l'imagination l'auoit fardé, ou qu'elle en eût effacé tous les defaux ; mais le fard ou la perfection qu'elle luy donne, vient de cette idée dont elle est toute remplie, & que la nature luy a donnée, pour l'obliger à rechercher le plus grand bien qui luy puisse arriuer.

Quoy qu'il en soit, l'ame estant abusée dans le iugement qu'elle fait de la Beauté, & la prenant pour vn bien tres-excellent, dont la possession la

doit rendre plus parfaite, se soumet entièrement à elle, & ne la considère plus que comme vne Reine qui luy doit commander: Car le bien a cela de propre, qu'il se communique avec empire, & qu'il se rend maistre des choses qui le reçoivent: D'autant que c'est vne perfection qui tient lieu d'acte & de forme, comme la chose qui le reçoit, tient lieu de puissance & de matiere: Or c'est vne Maxime assurée que la forme se rend maistresse de la matiere, autrement elle ne la perfectionneroit pas; Et par consequent il faut que la Beauté ait cette qualité dominante, & que l'ame qui en est touchée, s'assujettisse à son empire. Et de là viennent en suite toutes ces soumissions & ces respects, tous ces termes de seruitude & de captiuité qui sont si ordinaires aux Amans; dont il est aysé de tirer les raisons du principe que nous venons d'établir. Voyons maintenant les moyens que l'Amour a inuentez pour posséder le bien où elle tend.

Bien que l'Amour puisse subsister dans la seule vnion qui se fait de l'appetit avec l'idée de l'objet aymé, on peut dire pourtant que cette vnion & cette amour ne sont pas parfaites, que l'ame ne s'arreste pas là, & qu'elle tasche tousiours de s'vnir réellement avec la chose aymée. Or elle ne peut s'vnir réellement que par la communication des pensées & par la presence actuelle que les sens de-

mandent : L'Ame sortant en quelque façon hors d'elle-mesme par la parole, & les sens seruans de canaux par lesquels les objets coulent dans l'imagination ; De sorte qu'elle croit que par le moyen du discours elle s'vnit fortement à la personne aymée, & que celle-cy s'vnit avec elle par le moyen des sens. Et de là vient que les Amans souhaitent continuellement de voir ce qu'ils aiment, de l'entendre & de l'entretenir : Le baiser mesme où ils mettent vne de leurs plus grandes felicitéz, n'a point d'autre but que d'vnir leur ame avec celle de l'objet aymé ; C'est pourquoy il n'y a que les parties par lesquelles il semble qu'elle se communique dauantage, qui le donnent & qui le reçoient : Comme la bouche, parce que c'est la porte des pensées ; Les yeux, parce que ce sont les canaux par où les passions s'écoulent au dehors, & les mains, parce que ce sont les principaux organes de ses Actions.

Mais entre tous les moyens que la Nature a enseignez pour arriuer à cette vnion parfaite, il n'y en a point de plus considerable que l'Amour reciproque ; parce que l'vnion supposant deux choses, l'amant & l'objet, il faut pour estre accomplie, que l'un & l'autre s'vnissent réellement ensemble : Or si l'objet aymé est capable d'aymer, il ne peut s'vnir autrement que par l'Amour, dautant que l'ame ne s'vnit avec les choses qui sont hors d'elle, que par cette passion. C'est pourquoy le premier soin d'un

Amant est de se faire aymer, & pour ce sujet de se rendre agreable : D'où vient en suite qu'il s'accommode aux inclinations de la personne aymée, qu'il change d'humeur & de vie, qu'il deuiant liberal, courtois, propre, en vn mot qu'il fait tout ce qu'il pense le pouuoir faire aymer.

Il ne nous reste plus qu'à chercher la cause de cette façon de parler extrauagante qui est si particuliere aux Amans. L'on peut dire en general que l'ame se portant hors d'elle-mesme en cette passion, porte aussi les choses au de-là de ce qu'elles sont, & en forme des pensées qui passent l'expression naturelle qu'elles deuroient auoir : D'où vient que le bien & le mal qu'elle conçoit, ont toûjours quelque excez ; Et si la nature de la chose ne le peut souffrir, elle la charge de quelque idée étrangere pour en accroistre la signification, & fait ainsi ces Metaphores audacieuses qui donnent à l'objet aymé, le nom des plus belles & des plus nobles choses du monde ; qui font d'vne douce chaleur, vn feu brûlant ; d'vne legere inquietude, vn tourment & vn supplice ; d'vne petite soumission que la Beauté demande, vne captiuité, des prisons & des fers, & ainsi des autres. A quoy contribuë beaucoup l'erreur de l'imagination, qui estant toute remplie de cét instinct violent qu'elle a pour la Beauté, pense qu'il n'y a

point de plus grand bien ny de plus grand mal que ceux qu'elle attend dans l'Amour: C'est pourquoy elle se les represente tousiours extremes, & se sert en suite de termes plus extrauagans qu'elle ne fait en aucune autre passion. Ioint que les Amans qui n'employent d'ordinaire en leur entretien que fort peu de pensées, & qui ne se lassent iamais de les redire, sont obligez d'en diuersifier les termes, afin qu'elles en soient moins ennuyeuses: Ce qu'ils ne peuuent faire que par beaucoup de Metaphores qui sont à la fin extrauagantes, n'en trouuant pas assez de raisonnables pour suffire à la varieté qu'ils recherchent.

Outre ces raisons generales, il y en a encore de particulieres pour quelques Mots qui sont presque tousiours en la bouche de ceux qui aiment; Comme quand ils nomment la personne aymée, *leur Cœur*, *leur Ame* & *leur Vie*, qu'ils l'appellent *Ingrate*, *Homicide* & *Cruelle*, & qu'ils disent si souuent qu'ils *Meurent d'amour*. Car bien que toutes ces façons de parler semblent extrauagantes, elles viennent neantmoins d'un principe qui les rend en quelque sorte veritables: D'autant que l'Amour tenant tousiours l'ame tenduë vers l'objet aymé, & la transportant hors d'elle-mesme pour s'vnir à luy, la separe aussi moralement du sujet qu'elle anime, & luy oste en effet le souuenir & le soin de tout ce qui la regarde: De sorte que l'on

peut dire en cet esgard qu'elle ne vit plus en luy , ny pour luy , estant toute dans la personne aymée ; Qu'un Amant a raison de l'appeller *son Cœur & son Ame* , puisque ses desirs & ses pensées qui font la plus noble partie de sa vie , sont en elle seule ; Et qu'il est veritable qu'il *meurt* , voire mesme qu'il *est mort* , puisqu'il ne vit plus en luy. Or comme il n'y a que l'Amour reciproque qui le puisse faire reuiure , d'autant qu'alors la personne aymée se transforme en luy , & luy communique aussi son Ame & sa Vie : S'il est malheureux iusques à ce point qu'il ne puisse estre aymé , il semble qu'il a sujet de l'appeller *Ingrate , Cruelle & Homicide* : Puisque se donnant tout à elle seule , elle est obligée de reconnoistre cette haute liberalité ; Qu'en separant son ame de luy-mesme , elle le tuë ; Et qu'il y a de la cruauté de le laisser mourir , luy pouuant donner la vie. Il est vray que pour en parler sainement , l'on peut dire qu'il n'y a qu'une ombre fort leger de verité en toutes ces paroles ; Que l'ame fait icy comme dans les songes ; Et que la Philosophie Platonique qui a approuué ces visions , a esté d'intelligence avec cette passion , ou qu'elle a voulu consoler les Amans dans les maux qu'ils endurent. Laissons la dans un si beau dessein , & cherchons les causes des Caractères corporels que nous auons décrits.

Au reste nous ne voulons pas icy examiner d'où vient

vient cette grande diuersité qui paroist en cette passion, & qui fait qu'aux vns elle est enjouée ou chagrine, aux autres paisible ou turbulente, qu'en vn mot il ne s'est peut-estre iamais trouué deux personnes où elle ait esté tout à fait semblable. Car il est certain que cela vient des diuerses inclinations que le temperament ou la coûtume a fait couler dans l'ame, qui entraînent les passions dans le penchant qu'elles prennent, & leur font suiure le mesme cours qu'elles ont accoustumé d'auoir. Le meslange des autres passions y contribuë aussi, ne se pouuant faire que l'Amour soit gaye, quand elle se trouue avec la tristesse ou la cholere, ny qu'elle soit feuer, quand l'esperance ou la ioye luy tiennent compagnie. Mais toutes ces diuersitez sont faciles à comprendre : Passons à nostre principal dessein.

Pour suiure la methode que nous auons establie; il faut mettre icy deux sortes de ces Caracteres : Les vns qui se font pour quelque fin; les autres qui arriuent par vne pure necessité. Les premiers se font par le commandement de l'ame qui les iuge necessaires pour executer sa passion, quoy qu'ils luy soient souuent inutiles, comme nous auons dit. Les autres sont purement naturels & se font sans dessein, n'estans rien que deseffets qui par vne suite necessaire viennent du trouble & de l'agitation qui se fait au dedans.

Ceux du premier ordre sont les mouuemens des yeux & du front, le tremouffement de la langue, l'addouciffement & les diuerfes inflexions de la voix, le ris & le maintien du corps: Tous les autres sont purement naturels.

Pour ce qui est du *mouuement des yeux*, il y en a de tant de sortes qu'il est presque impossible de les pouuoir marquer: Car comme toutes les passions peuuent naistre de l'Amour & compatir avec elle, & chacune faisant mouuoir les yeux diuerfement; il arriue aussi que tous leurs mouuemens se rencontrent icy: De sorte que le Plaisir les fait petiller, le Desir les auance en dehors, la Tristesse les abbat, la Crainte les rend inquiets, le Respect les abaisse, le Dépit les allume: & ainsi du reste, dont nous déduirons les causes dans le discours de chaque Passion.

Tout ce que nous pouuons faire en celle-cy, est de chercher quels sont *les Yeux & les Regards Amoureux*, & ce qui oblige l'ame à les faire: d'autant qu'il y a grande difficulté en l'un & en l'autre.

Pour le premier, il y en a qui croient que les Yeux Amoureux, sont ceux dont les regards sont vifs & prompts, & qui se iettent en vn moment d'un costé & d'autre; d'autant qu'Aristote parlant des yeux Lascifs; qu'il appelle *Μαρτυρῆς*, quelques Traducteurs les ont nommés, *Insanos*, qui sont

proprement les yeux égarez & qui sont en perpetuel mouuement. Mais outre que ce n'est pas là le sens d'Aristote, & qu'il a voulu designer ceux qu'ils nomment, *deuorantes*, dont nous allons parler, il est certain que les yeux égarez ne conuiennent point à l'Amour, & qu'ils sont plus propres à la cholere, à l'inquietude & à la legereté d'esprit; qu'à cette passion. D'autres pensent que ce sont ceux dont la prunelle s'eleue en haut & se cache à demy sous la paupiere, qui sont les yeux Mourans; parce que ceux qui meurent, les ont ordinairement ainsi; comme Aristote a remarqué dans ses Problemes, où il adjouste que cela arriue aussi en quelques actions d'Amour; Mais pour lors l'ame n'a point de dessein de causer ce mouuement, & c'est vn effet purement naturel qui suit l'excez du plaisir, comme nous dirons en son lieu. Hors de là, cette sorte de regards est vne marque de douleur & de langueur. On pourroit dire encore que ce sont ces regards Pressans, par lesquels les yeux semblent se ietter sur leurs objets, & les vouloir deuorer, comme l'on dit; que les Latins nomment si heureusement *Instantes, procaces, deuorantes*; mais nous auons desia dit qu'ils naissoient du desir & non pas de l'Amour.

Pour moy ie pense que les yeux dont est question, sont ceux que les Latins appellent *Patos*, & qu'ils ont pour ce sujet donnez à Venus: Car ils sont rians

& font sortir leurs regards comme à la dérobée, les paupieres s'abaissant doucement & se fermant à demy. En effet il n'y en a point qui ayent tant de correspondance avec la nature de l'Amour que ceux-cy; d'autant que par vn seul regard ils font connoistre tous les principaux mouuemens qui se trouuent en cette passion: Car nous auons montré quel Amour consistoit principalement dans l'vnion interieure de l'appetit avec l'objet aymé; que le plaisir l'accompagnoit tousiours; que la Beauté inspiroit la soumission & le respect; qu'aymer n'estoit rien que mourir; Et que si vn Amant ne possede la personne aymée, le desir l'en sollicite sans cesse. Or le regard dont nous parlons, fait paroistre tous ces mouuemens; car le Riz est vn effet de la Ioye; le Respect & la soumission abaisse les paupieres; la prunelle qui se tourne doucement vers l'objet aymé, marque la langueur amoureuse que l'ame ressent; & les regards qu'elle iette sur luy, font connoistre les desirs qui la pressent. Enfin quoy que les yeux se ferment à demy; parce que le Riz fait resserrer les muscles des paupieres, on pourroit neantmoins dire qu'ils se ferment ainsi, comme si l'ame vouloit retenir l'Image qu'ils viennent de recevoir & la considerer plus attentiuement, & que mesme elle les fermeroit tout à fait, s'il ne s'en-presentoit à tous momens vne nouuelle, qu'elle ne veut pas perdre & qui l'oblige à partager ainsi ses

soins, comme elle fait souuent dans la Peur & dans la Cholere, où il semble qu'elle veut en mesme temps voir & ne voir pas le mal qu'elle fuit ou qu'elle dédaigne.

Le Front est toujours riant & serein dans l'Amour, & il semble qu'il s'ouure & qu'il s'estende, qui est vne marque de flatterie; c'est pourquoy le chien qui est vn animal flatteur, l'a tousiours ainsi, quand il caresse quelqu'un, comme dit Aristote: Or le mot de flatterie ne signifie icy autre chose que la complaisance & les caresses, & non pas ce vice qui est la peste de la Cour & de l'amitié. Il ne faut pas donc s'estonner, si l'Amour estant flatteuse & complaisante, dispose le Front de la sorte; mais la premiere cause de cet effet, est la Loye qui accompagne toutes ces passions, & qui a cela de propre, de rendre le visage ouuert, tranquille & riant, comme nous dirons en son lieu.

Passons à vn autre effet dont la cause est extrêmement cachée; c'est le *Mouuement de la Langue* qui tremousse souuent entre les levres & qui semble les chatoüiller. Or cela arriue dans vn grand excez d'Amour, soit que l'ardeur que cette passion allume, desseche les levres & oblige l'ame de les humecter; soit que les Esprits qui petillent par tout, causent en cette partie la mesme agitation qui paroist en toutes les autres qui sont fort mobiles;

soit enfin que cela vienne de la vehemence du Desir ; car le mesme effet arriue souuent à ceux qui regardent manger quelque chose qu'ils desirent ardemment. Et il semble mesme qu'il conuienne mieux à l'appetit des viandes qu'à quelqu'autre desir que ce soit , aussi bien que l'Humidité qui monte à la bouche , comme nous dirons , par ce que le Mouuement de la langue & l'Humeur dont elle s'abreuue , seruent à gouster les alimens & à les faire descendre dans l'estomach : Mais comme l'ame n'a pas vne connoissance distincte de ce qu'elle fait , & que la violence de la Passion la trouble & la fait esgarer , il arriue aussi qu'elle employe les moyens qui sont necessaires pour vn dessein , en vn autre où ils sont inutiles , & fait ainsi dans le desir de la Beauté ce qu'elle ne deuroit faire que dans celuy des alimens.

L'adoucissement de la voix marque le respect & la soubmission d'un Amant : Et quoy que ce soit vn effet necessaire de la crainte , qui estreussant les passages & rendant le mouuement des poulmons plus lasche , fait que la voix est molle , douce & languissante ; Si est-ce que bien souuent , sans que cette necessités y trouue , l'ame a dessein de la former ainsi , afin de tesmoigner sa modestie & son respect : Parce qu'elle sçait que la voix forte & vehemente est vn effet de la hardiesse , & que celle

qui est rude & aspre, suit vne humeur farouche ; qui sont des qualitez incompatibles avec l'Amour, & qu'un Amant doit cacher, si la nature ou l'accoustumance les luy a données.

Pour ce qui regarde toutes les *Inflexions de la voix*, elles procedent des diuers mouuemens qui agitent l'ame, soit que l'admiration la rauisse, soit que la douleur la presse, soit que le desir la transporte, ou que quelques difficultez s'opposent à son contentement ; parce qu'en toutes ces rencontres elle charge la voix d'accens particuliers, tantost l'éleuant avec exclamation, tantost l'abaissant avec langueur, tantost la coupant ou l'allongeant, suivant la nature des Passions qu'elle souffre.

Le Riz estant vn effet de la joye, doit estre examiné dans cette passion, où nous parlerons amplement de sa nature & de ses causes. De sorte que nous n'auons plus que *le Geste & le Maintien* qui semble nous deuoir arrester : Mais si l'on y prend garde, il n'y en a point qui soit particulier à l'Amour ; Et celuy qui s'y remarque & qui est si changeant, suit les diuerses passions qui accompagnent celle-cy : Car tantost le respect le rend modeste, la joye & la crainte le rendent inquiet, la tristesse le rend abbatu & languissant : Tantost vn Amant est en posture de suppliant, de content ou de desesperé ; par fois il marche viste, lentement, ou de-

meure ferme, suivant que le desir, l'estonnement ou la douleur le saisit: De sorte que tous ces mouuemens estans du ressort des autres passions, ne nous obligent pas d'en faire icy l'examen; mais nous deuons le remettre au discours que nous ferons de chacune en particulier. Faisons maintenant celuy des Caractères qui sont purement Naturels & Necessaires, & où il semble que l'ame n'a point de part.

Les yeux sont *Brillans* dans l'Amour à cause de la quantité d'esprits qui y accourent: Car on ne sçauroit douter que ce ne soit d'eux que vienne cette viuacité éclatante que l'on void en cette partie; puis qu'elle la perd, quand ils s'en retirent, ou qu'ils se dissipent, comme il arriue à ceux qui sont saisis de crainte, ou à ceux qui meurent. Mais ce qui aide à augmenter cet esclat qui paroist dans les yeux, c'est que la membrane qui les enuironne, estant enflée & tenduë par l'abord des vapeurs & des esprits, deuient plus vnïe & par conséquent plus brillante; Et qu'il y a toujours dessus vne certaine humidité où la lumiere resplendit & estincele.

Mais d'où peut venir cette *humidité*? Est-ce point que la Chaleur & l'agitation que les esprits causent dans le cerueau, liquefient & font couler
les

les humeurs sur les yeux, car les larmes se font ainsi dans la ioye; où plustost que les vapeurs subtiles du sang que l'ame pousse avec impetuosité, sortent dehors & s'espaisissent incontinent par la froideur des membranes & de l'air. Et de fait les yeux sont icy caues & enfoncez, quoy qu'ils paroissent toujours grands & humides; ce qui n'arriueroit pas, si cette humidité venoit des humeurs qui tombent du cerueau; car elles enfleroient les parties qui sont à l'entour de l'œil, & le tiendroient élevé: Et partant il faut que cette humidité vienne du dedans, & que les muscles & les parties charnuës qui l'environnent, se flestrissent: Car comme leur substance est molle & se fait d'un sang fort subtil, elle se resout incontinent & s'abbat, d'où vient que l'œil s'enfonce: Mais le corps en demeure toujours plein, humide & estincellant, à cause des vapeurs & des esprits qui y accourent sans cesse. Si ce n'est qu'à la fin la longueur du mal, la Tristesse & le Desespoir esteignent la chaleur naturelle, qui fait que les yeux perdent leur éclat & leur viuacité, & demeurent obscurs, arides & immobiles, comme nous montrerons dans le Chapitre de la Tristesse, où nous rendrons encore raison des larmes qui sont si ordinaires aux Amans.

La *Rougeur* que l'Amour fait si souuent paroistre sur le front, a vne cause assez difficile à trouuer.

Car bien qu'il soit ayſé de dire que le ſang monte au viſage dans toutes les paſſions où l'ame pouſſe les eſprits au dehors; neantmoins il y en a qui le portent en vne partie plûtoſt qu'en vne autre: La rougeur qu'excite la cholere, commence par les yeux: celle de la honte par les extremitéz des joües & des oreilles; & celle de l'Amour par le front; Et c'eſt dans cette diuerſité que la cauſe de cét effet eſt tres-difficile à rencontrer. Le penſe pourtant que l'on peut dire pour ce qui regarde la cholere, que les yeux eſtans les premiers où les paſſions ſe font reconnoiſtre, ſe reſſentent auſſi les premiers du mouuement des eſprits: Or comme le ſang boüillonne dans la cholere, & que la tempeſte qui l'agit, le pouſſe avec deſordre & conſuſion aux parties exterieures, de là vient que les eſprits qui courent aux yeux, y entraînent les flots de ce ſang agité, qui enfle leurs veines & les fait paroître toutes rouges; au lieu que dans les autres paſſions, ils n'y portent que les plus pures & les plus ſubtiles parties du ſang qui ne peuuent cauſer cét effet. Et partant il eſt vray que la cholere fait plûtoſt monter la rougeur au viſage que quelqu'autre paſſion, & qu'elle commence à la faire paroître dans les yeux; parce que le ſang ſuit les eſprits qui abordent en cette partie plûtoſt qu'à toutes les autres. Pour ce qui eſt de la honte, il faut ſçauoir que l'ame qui en eſt émeuë, forme en meſme temps le deſſein d'atta-

quer & de fuir le mal, & l'on peut dire qu'elle le veut attaquer en fuyant. C'est pourquoy elle pousse le sang au visage pour le chasser; mais la crainte le fait en mesme temps retirer en arriere, d'où vient que les extremités des jouës & des oreilles rougissent, comme nous ferons voir plus amplement en son lieu. Examinons maintenant la rougeur que l'Amour porte sur le front. Viendroit-elle point de la ioye, dans laquelle les esprits, apres s'estre vnïs au bien que l'ame conçoit, se débordent sur les parties voisines? Car si cela est, le front s'en doit ressentir le premier; ou bien que l'imagination estant placée au deuant du cerueau, cette partie s'échauffe par la continuelle agitation des esprits, & communique apres son alteration au front avec lequel elle a grande sympathie, comme la Medecine enseigne. Et de fait, puisque la pâleur qui se rencontre sur le reste du visage, vient souuent du transport des esprits au dedans du cerueau, il y a grande apparence, ou qu'il s'en fait vn reflux sur les parties les plus proches, ou qu'elles se ressentent de la chaleur qu'ils y causent; d'où vient qu'elles sont moins ternies & moins palles que les autres. Au reste quoy que cette rougeur soit particuliere à l'Amour, celle des autres passions ne laisse pas de s'y rencontrer; Et il peut arriuer qu'un Amant rougira de honte, de cholere, de ioye ou de desir, suivant que ces passions se mesleront avec celle-

cy. Mais ce n'est pas icy le lieu d'en parler.

Les *Levres* sont souvent rouges & humides par l'abord du sang vaporeux qui se jette sur le visage, & qui teint facilement ces parties, à cause qu'elles sont molles & qu'elles ont la peau fort delicate. Et cecy arriue principalement au commencement des émotions qui sont si frequentes en cette passion: Car à la fin ces parties se desseichent & pâlisent; soit que l'ardeur consume les plus subtiles & les plus douces parties du sang; soit que les esprits en se retirant, les remportent au dedans, & laissent ainsi sur les levres la pâleur & la seicheresse.

Mais d'où vient que *celle de dessous tremble* quelquefois? Il ne faut pas penser que ce soit vn effet de la crainte ou de la cholere, puisqu'il suruiend dans la plus grande ardeur de l'Amour. Il est donc vraysemblable que les esprits que la violence du desir pousse avec empressement, petillent en ces lieux & font tremousser cette partie qui est fort mobile & qui n'est point soutenüe cōme les autres. Et c'est dās cette rencōtre qu'elle *blanchit* par fois d'une écume subtile; l'humidité qui monte à la bouche & qui se répand sur les levres, estant agitée par ces esprits.

La *Langue begaye*, parce que l'ame qui est distraite par l'excez de la passion, ne pense pas aux paroles qu'elle doit former, & retire les esprits qui deuroient seruir à cette action aux lieux où elle est

occupée ; d'où vient que la langue s'arreste ou se meut laschement : Et dans cette impuissance on perd la parole ; ou bien si l'on parle , c'est avec peine & en begayant. A quoy contribué aussi la quantité d'humeur dont la bouche se remplit par le desir , car elle empesche que la langue ne se remuë facilement, & qu'elle ne frappe nettement la voix. Au reste la distraction dont nous venons de parler , est aussi cause de ce que les Amans n'entendent pas la moitié de ce que l'on dit , & que leurs discours sont ordinairement confus & extrauagans.

Les *Soupirs* mesmes qui les entrecouparent à tous momens , doiuent leur premiere origine à cette grande attention d'esprit qui détourne l'ame , & luy fait perdre le souuenir des actions les plus necessaires à la vie : Car n'enuoyant pas suffisamment des esprits pour faire la respiration , les poulmons se meuuent foiblement , & le cœur ne tire pas le secours qu'il attendoit de leur seruice , d'autant qu'ils ne luy fournissent pas assez d'air pour temperer le feu que cette passion y allume , & qu'ils ne le déchargent pas assez souuent des vapeurs & des fumées que l'agitation des humeurs y eleue. Apres donc que ce desordre a continué quelque temps , & qu'à la fin il pourroit ruiner toute l'œconomie naturelle, l'ame pressée par la necessité, se réueille & tasche de suppléer à son defaut par ces grandes &

extraordinaires respirations : Et de fait les soupirs naissent principalement au sortir de quelque pensée qui a fortement arresté l'esprit , & non pas durant qu'il y estoit occupé.

Le *Visage*, devient *Palle* ; Soit parce que les Esprits se retirent au dedans du cerueau , comme nous auons desia dit ; Soit parce que dans le progres de cette passion l'estomach s'affoiblit & le sang s'altère. Car puisque la diuersion des esprits détourne aussi la chaleur & la vertu qui deuroient couler dans l'estomach pour faire la digestion , il ne faut pas s'étonner s'il devient languide , si les aliments se changent en cruditez , & si le sang qui s'en fait , est impur , puisque les dernieres coctions ne corrigent point le defaut des premieres. Mais ce qui ayde encore à ce desordre , est la continuelle ardeur que cette passion allume dans le sang , & les diuerses agitations que la peur , la tristesse & la cholere y excitent à tous moments : Car cela fait que les esprits se dissipent , que les facultez deviennent languissantes , & que les humeurs s'enflamment & se corrompent ; D'où vient à la fin cette maladie Erotique que la Medecine met au rang de la folie & de la fureur. Le sang estant donc en cét estat , n'a plus sa vertu ny sa couleur naturelle ; Il devient inutile à la nourriture des parties , & ne leur communique plus cét agreable vermillon qu'il leur

donnoit auparavant : Et en cette sorte il faut qu'elles deuiennent pâles , maigres & flestries.

L'Appetit se perd pour les mesmes raisons , parce que l'objet aymé occupant toutes les pensées de l'ame , luy oste le soin de toutes les fonctions de la vie : les Esprits estans aussi destournez , ne portent plus dans l'estomach le sentiment qui cause l'appetit : Enfin le desordre qui est dans les humeurs & dans toutes les parties naturelles , empesche que celle-cy ne puisse faire sa fonction.

Le *Sommeil* estant vn repos du sens commun & des Esprits , se rencontre rarement dans les passions violentes , puisqu'elles tiennent l'ame & le corps en vne continüelle agitation : Mais l'Amour le souffre encore moins que les autres , parce qu'oultre la tempeste qu'elle excite , elle corrompt à la fin le sang dont les vapeurs sont acres , qui par consequent n'ont pas cette douce humidité qui assoupit les sens.

Il est vray que la langueur & la lassitude le rappellent quelquesfois ; parce que l'ame sçait que la vie ne peut subsister sans luy , & qu'après vne si grande dissipation d'esprits , il est necessaire de les reparer : C'est pourquoy elle les recueille & les arreste. Car bien que cette vapeur humide qui prouoque ordinairement le sommeil , ne se rencontre

pas icy, comme nous venons de dire, il ne faut pas croire aussi que le sommeil ne puisse venir que par son moyen : Il a deux causes naturelles & ordinaires ; la vapeur qui bouche le passage des esprits, & l'ame qui les lie & les arreste : Comme il n'y a donc point icy de vapeur qui puisse produire cet effet, la necessité oblige l'ame d'y travailler toute seule.

Mais ce sommeil est interrompu par les *Songes* qui agitent incessamment l'esprit ; d'autant que l'imagination qui ne perd point en cet estat la liberté d'agir, & qui est toute pleine des Images que la passion luy a suggerées, les remuë continuellement, les confond & les augmente ; en sorte qu'elles luy representent toûjours les choses plus grandes qu'elles ne sont en effet, & forment en suite dans l'appetit de plus puissans mouuemens que ne feroient les objets veritables.

Le souuenir ou l'abord inopiné de la personne aymée, enfle le Cœur & le Pouls ; parce que l'ame dilate les organes pour receuoir le bien & pour enuoyer des esprits à sa rencontre. On propose sur ce subyet vne grande difficulté, à sçauoir *si l'Amour a vne espece de Pouls* qui luy soit propre ; d'autant que quelques-vns se sont vantez d'auoir decouuert cette Passion par le battement des Arteres. Mais sans nous arrester aux contestations qui

qui se sont formées là dessus, nous disons hardiment qu'il n'y a pas plus de raison d'en donner vne qui soit propre à la Cholere & à la Tristesse qu'à l'Amour; que le cœur ne se doit pas moins ressentir de l'émotion que cette passion cause dans l'appetit, que de celle que les autres y excitent; Et que les organes se mouuans conformément à l'intention de l'ame, il faut que cette partie s'agite autrement dans l'Amour que dans les autres passions, puisqu'elle a vn autre dessein que celui qu'elles ont. Il est vray qu'il est bien difficile de reconnoistre exactement cette difference, parce que l'on n'en a point fait de iuste obseruation: Et peut-estre qu'il est impossible de la faire, dautant que le cœur est enfermé au centre du corps, & qu'il peut souffrir des mouuemens qu'il ne communique point aux arteres. Neantmoins parmy les especes de Pouls telles qu'on les a pû remarquer, encore en peut-on trouuer quelqu'une qui conuienne particulièrement à l'Amour. Pour entendre cecy, il faut sçauoir que le cœur a beaucoup de mouuemens qui sont communs à plusieurs passions; car il se dilate dans la ioye, dans l'esperance & dans la cholere; & se resserre dans la tristesse, dans la crainte & dans le desespoir: Aux vnes il va viste & avec violence; aux autres il est tardif & languissant: Et il est certain que ces differences generales ne peuuent toutes seules marquer celles qui sont propres à chaque

passion: Mais comme la Medecine nous apprend qu'il y a vingt especes de Pouls simples, & qu'elles se peuuent mesler diuersement les vnes avec les autres, chaque passion peut trouuer dans cette grande varieté l'espece qui luy est propre. Ainsi le Pouls de la cholere n'est pas seulement grand, ou eleué, ou viste, ou frequent, ou vehement; mais il est composé de toutes ces differences: Celuy de la crainte est viste, dur, inégal & déreglé: Celuy de la ioye est grand, rare & tardif: Celuy de la tristesse est foible, petit, tardif & rare. Et comme on dit que ce sont-là les especes de Pouls qui sont propres à ces passions, on peut aussi en marquer vne de cette sorte qui sera propre à l'Amour. Et de fait, le battement des arteres y est grand, large, inégal & déreglé; il est grand & large, parce que le cœur s'ouure pour receuoir le bien qui se presente, comme nous venons de dire: Et il est inégal & déreglé à cause des diuerses passions dont celle-cy est continuellement trauersée. Car comme nous ne parlons pas icy de cette Amour simple & imparfaite qui n'est encore que dans l'ame; mais de celle qui est complete & acheuée, & qui a desia fait impression sur le corps, il est impossible que le desir & la crainte, la ioye & la douleur ne se confondent à tous momens avec elle, d'où vient en suite le mouuement inégal du cœur & des arteres. Et cecy se remarque principalement dans le souuenir & dans l'a-

bord inopiné de la personne aymée: Car apres ce premier souleuement qui se fait en cette rencontre, il se change en cent façons; il paroist petit & languissant, & retourne incontinent à sa premiere vehemence; de viste & de leger, il deuient lent & pesant, & tout d'un coup il reprend sa premiere viffesse, qu'il reperden vn moment, & passe ainsi d'une difference à l'autre, sans ordre & sans proportion.

Il y a fort peu de Charecteres qui restent à examiner, dont les causes ne soient fort éuidentes: Car *l'inquietude* vient des diuerfes agitations que l'ame ressent: Les *frissons* & *l'ardeur* suivent le flux & le reflux des esprits; dautant que la crainte & la tristesse qui les retirent en dedans, ostent aux parties exterieures la chaleur qu'elles auoient; tout de mesme que la ioye & l'esperance la leur redonnent & l'augmentent. Et à mesure que l'audace ou la cholere ramassent les esprits, la force croist aussi; comme elle se diminuë quand la ioye les dissipe, ou que la tristesse les étouffe.

Il n'y a que les *syncopes* & les *extases* qui arriuent quelquesfois aux Amans où nous puissions trouuer quelque difficulté: Mais nous auons desia montré que l'Amour ne pouuoit toute seule causer les syncopes ny les défaillances, & qu'il falloit que

ce fût la douleur, le defefpoir, ou la ioye.

Pour l'*Extase*, il est vray qu'elle peut venir de l'Amour: Il faut neantmoins remarquer que ce mot a plusieurs significations. Les Medecins le prennent souuent pour vne extrême alienation d'esprit, telle qu'est celle des Phrenetiques & des Maniaques: Quelquesfois pour cette estrange maladie qu'ils appellent *Catoché*, laquelle oste tout d'un coup l'usage des sens & du mouuement, & tient le corps roide & dans la mesme posture où elle l'a surpris. Il y en a qui croient que la vraye extase se fait, quand l'ame ne fait aucune action dans le corps; soit qu'elle y demeure; soit qu'en effet elle en sorte pour quelque temps: Comme il arriue dans les Energumenes & dans ceux qui sont ravis par l'Esprit de Dieu. Mais celle dont nous parlons, n'est rien autre chose qu'un certain rauissement de l'ame, qui oste au corps l'usage des sens extérieurs & du mouuement; l'imagination & l'entendement ne laissant pas d'agir. Ce qui arriue par vne forte attention qui tient l'ame attachée à l'objet aimé, qui luy fait perdre le soin de toutes les fonctions animales, & qui occupant tous les esprits à la pensée, empesche qu'ils ne coulent aux organes des sens & du mouuement. Et ce rauissement peut quelquesfois passer à tel excez que les facultez vitales ne receuront plus l'influence de l'ame, en sorte que la respiration cessera & qu'il

n'y aura que la seule vertu naturelle qui soutienne la vie.

DE LA NATURE DE LA BEAUTE'
en general.

Et

Pourquoy elle se fait aymer.

V. PARTIE.



VOY que les sens ayent esté donnez à l'esprit pour luy ayder à connoistre les choses, il semble neantmoins que celles qui sont les plus sensibles, soient les moins connuës ; Et ie ne sçay si c'est vne grace ou vn artifice de la Nature qui ait voulu approcher de nos sens ce qui deuoit estre le plus éloigné de nostre esprit, & recompenser par cette connoissance exterieure le peu de progres que nous deuions faire dans la veritable & essentielle. Quoy qu'il en soit, il est tres-assuré qu'il n'y a rien au monde de plus sensible que la Beauté, ny rien de plus difficile à connoistre. Les plus grands hommes qui en ont resenty les effets, en ont ignoré les causes ; Et l'on peut dire qu'elle leur a fait perdre la raison, quand ils en ont esté touchez &

quand ils en ont voulu parler. Car les vns ont dit que c'estoit la iuste proportion des parties, les autres que c'estoit la forme des choses, enfin que c'estoit l'éclat & la splendeur de la bonté. Mais cette dernière définition est équivoque & métaphorique, & les autres ne se peuvent appliquer à la Beauté divine, qui est la source & le modèle de toutes les beautés; parce que dans l'unité & la simplicité infinie de Dieu, il n'y peut avoir de proportion ny de forme.

Pour tenir donc une route plus certaine que celle que l'on a prise iusques icy, & pour ne s'esgarer pas en une matière si vaste & si difficile; Il faut considérer que les choses ne sont estimées Belles, qu'entant qu'elles peuvent tomber sous une connoissance bien distincte & bien exacte. C'est pourquoy il n'y a que les objets de l'Entendement, de la Veüe & de l'Oüye à qui on donne la Beauté; parce que de toutes les facultez connoissantes, ce sont celles qui iugent plus parfaitement de leurs objets, & qui s'y trompent le moins. Et ces mêmes objets que l'on iuge estre Beaux, sont encore estimés Bons; car on ne dit pas seulement qu'une ame, une couleur, ou une musique soient belles, elles peuvent encore estre appellées bonnes. Mais les objets des autres sens & de toutes les autres puissances peuvent seulement estre appellés Bons, & ne méritent iamais le nom de Beauté: Car ce seroit une

chose ridicule de dire que la chaleur ou l'humidité, la douceur ou l'amertume fussent belles. De là il faut nécessairement conclurre que tout ce qui est bon, n'est pas beau; mais que tout ce qui est beau, est bon; & partant que le Beau est vne espece de Bon. Or comme le Bon n'est bon qu'entant qu'il est conuenable, il faut, puisque le beau est bon, qu'il soit aussi conuenable à quelque chose: Et partant s'il n'y a que les facultez connoissantes à qui le beau serue d'objet, il faut nécessairement dire que le *Beau est ce qui est conuenable aux facultez connoissantes*, comme le *Bon* est ce qui est conuenable à quoy que ce soit.

Or parce que la connoissance n'a point d'autre objet que l'Essence & la Verité des choses, il faut que la beauté soit de ce genre-là, & que les objets soient plus beaux, où l'essence & la verité est mieux exprimée. C'est pourquoy les ames sont plus belles que les corps, & l'entendement qui connoist l'intérieur des choses, est plus capable de connoistre la Beauté que les sens qui n'en connoissent que l'extérieur. De là vient encore que les bestes sont rarement touchées de la Beauté, parce qu'il n'y a que les sens qui agissent en elles; au lieu que dans l'homme l'entendement concourt à leur action, & penetre dauantage la nature & l'essence de leurs objets. Et nous experimentons en nous mesmes que les choses où nous n'apportons pas grande attention,

& dont nous ne connoissons pas bien la nature ; nous semblent moins belles ; Et qu'il n'y a que les Maistres en quelque Art que ce soit , qui puissent iuger de la beauté d'un ouvrage , parce qu'il n'y a qu'eux qui en ayent la veritable connoissance.

Cen'est pas pourtant à dire que la Beauté consiste en la seule Connoissance , car il s'ensuiuroit que les choses ne seroient belles que lors que l'on les connoistroit ; bien qu'il soit tres-veritable que Dieu ne laisseroit pas d'estre infiniment beau, quand il ne seroit point connu ; Et qu'il y a des choses dont la connoissance est également claire & certaine , qui ne sont pas également belles : Car l'entendement reconnoist des natures plus & moins parfaites ; tout de mesme que les yeux & les oreilles iugent qu'il y a des couleurs & des harmonies qui sont plus belles les vnes que les autres.

Comme donc les choses sont sensibles , non pas à cause que l'on les sent , mais parce qu'elles se peuvent faire sentir ; Et que l'essence n'est pas bonne entant qu'elle se communique , mais parce qu'elle se peut communiquer : Aussi la Bonté n'est pas belle , parce que l'on la connoist , mais parce qu'elle peut estre connue. De sorte que la Beauté n'est autre chose que la Bonté , entant qu'elle a un ordre & un rapport essentiel à la connoissance , c'est à dire qu'elle se peut communiquer aux facultez connoissantes. Et c'est à mon aduis comme il faut entendre

entendre Platon quand il dit que la Beauté est l'éclat & la splendeur de la Bonté : Car comme l'éclat de la Lumière est ce qui la rend visible , l'éclat de la Bonté doit estre aussi ce qui la peut faire connoître , & cet éclat n'est autre chose que l'acte par lequel la bonté resplendit , éclaire & se communique aux facultez connoissantes.

Or parce qu'il y a deux sortes de ces facultez , les intellectuelles & les sensitiues , il faut qu'il y ait aussi deux sortes de *Beauté*, l'une qui est *intelligible* & l'autre qui est *sensible*. Et parce qu'en l'un & l'autre genre il y a des sujets qui sont plus excellens & plus beaux les uns que les autres, il faut sur le fondement que nous venons d'establir, marquer la cause de cette difference. Il est vray que cecy demande vne meditation plus haute, & vn plus long discours que nostre dessein ne peut souffrir : Mais aussi nous n'en toucherons que les Principes, & ce qui sera necessaire pour entendre ce que nous dirons en suite de la Beauté humaine.

Supposé donc que la Beauté n'est rien en effet que la Bonté, autant qu'elle a rapport aux facultez connoissantes ; Et que la Bonté n'est rien aussi que l'estre & la perfection des choses, autant qu'elle se peut communiquer, comme l'Escole enseigne, il faut que les choses soient meilleures, plus parfaites & plus belles qui ont plus d'estre & d'essence : Et l'on reconnoist qu'elles ont plus d'estre, quand elles

ont plus d'vnité, & que dans cette vnité elles ont plus de puissances & de vertus différentes. Ainsi Dieu a vne perfection infinie, parce que dans vne tres-parfaite & tres-simple vnité, il a la puissance de faire toutes choses. Les Intelligences qui sont les plus simples & les plus agissantes de toutes les creatures, sont aussi les plus excellentes. Entre les corps mesmes, les mixtes sont plus parfaits que les simples dont ils sont composez, les animez plus que les naturels, & ceux qui ont l'ame raisonnable, plus que ceux qui n'ont que la sensitive : Parce qu'en comparaison de ceux-cy, ils ont plus de différentes vertus & plus d'actions, & partant plus de diuers degrez d'essence. Voylà pour ce qui regarde la beauté intelligible.

Mais dans les objets sensibles la perfection ne se considere pas absolument comme celle-là ; il faut qu'elle depende non seulement de l'estre qu'ils ont, mais encore des organes des sens qui les recoient, & de la conuenance qu'ils doiuent auoir avec les corps où ils paroissent. Ainsi la lumiere la plus éclatante est plus parfaite que toutes les couleurs ; mais eu égard aux yeux, le verd l'est dauantage, quoy que cette mesme couleur soit desagréable en certains sujets. Or la cause de cette diuersité vient premierement de ce que les sens ayans esté donnez à l'animal pour sa conseruation, il ne faut pas qu'ils le détruisent : Et comme leur action se fait par

l'impression que les objets font dans leurs organes, si cette impression ne leur est proportionnée, leur action sera imparfaite. C'est pourquoy il faut qu'elle soit assez forte pour donner connoissance de la chose; mais qu'elle ne soit pas si violente qu'elle puisse corrompre les organes. De là vient que les sens ne peuvent bien iuger des extremittez de leurs objets, comme les yeux d'une trop grande lumiere, ny des tenebres; l'oreille d'un son trop violent, ny du silence; Et Aristote dit que l'une & l'autre ne sont pas sensibles, parce que celle-cy ne fait point d'impression veritable, & que l'autre détruit les organes; de sorte qu'il n'y a que les objets qui sont entre ces deux extremittez, qui puissent faire l'impression iuste & proportionnée que les sens demandent. Ce n'est pas pourtant que tous ces objets touchent également les sens, il y en a entr'eux qui sont plus parfaits & plus agreables que les autres; le verd est plus beau que le gris ou le noir; l'octave entre les harmonies est plus douce que la quarte: Mais la cause de cette difference est extremement obscure: Si l'on prend neantmoins garde à ce que nous auons dit de la perfection des choses intelligibles, on trouuera qu'elle dépend du mesme principe.

Car il est certain que les couleurs & les harmonies tirent leur beauté des proportions qu'elles ont, & que celles qui les ont plus parfaites, sont aussi les

plus agreables. Or les proportions ont plus de perfection à mesure qu'elles approchent plus de l'vnité, & que dans cette vnité elles sont plus composées. Ainsi le Diapason qui est la plus agreable de toutes les harmonies simples, se fait dans la proportion double, sçauoir est de deux à vn, qui est la plus parfaite de toutes les proportions simples, parce qu'elle est la plus proche de l'vnité, n'y ayant rien si proche de l'vnité que le nombre de deux : Et qu'elle est la plus composée ; car ce qui est deux fois plus, est plus composé que ce qui n'est qu'une fois & demy, ou vne fois & vn tiers, comme sont les autres proportions qui sont le Diapente & le Diatessaron. Il en est de mesme des couleurs ; car les proportions qui sont les harmonies parfaites sont aussi les belles couleurs, comme dit Aristote ; Et partant le verd qui est la plus agreable de toutes, se doit faire dans la mesme proportion que le Diapason ; & le bleu, & le pourpre dans celle du Diapente & du Diatessaron. Mais comme nous auons examiné ces choses en leur lieu, cela suffit pour montrer que la Beauté & la perfection des choses sensibles, se tire du mesme Principe que celle des choses intelligibles, sçauoir est de ce qu'elles ont plus d'vnité, & que dans cette vnité, elles ont plus de puissances, en vn mot de ce qu'elles ont plus de l'estre sensible.

Il est ayzé de voir par ce discours, que la Lumie-

re considérée en soy est la plus belle chose qui se puisse presenter à la veüe; mais que le verd, eu esgard aux organes, est encore plus agreable qu'elle. Il ne reste plus qu'à sçauoir pourquoy cette couleur ne fait pas la beauté en tous les corps où elle se trouue. Pour cela il faut se ressouuenir que les choses n'agissent qu'autant qu'elles ont de puissances, & que ces puissances suiuent les degrez de leur Estre: Or comme il y a des choses qui ne peuuent agir sans la matiere, il est asseuré que cette matiere doit estre ajustée & proportionnée à leurs actions & à leurs puissances; Et cette proportion fait la *Beauté Corporelle*, qui n'est rien qu'un *juste assemblage de toutes les dispositions qui sont necessaires aux corps pour faire les fonctions auxquelles ils sont destinez*. De sorte que toutes les qualitez materielles, pour excellentes qu'elles soient, rendront difformes les sujets où elles se trouueront, si elles ne sont proportionnées à l'essence & à la vertu interieure qu'ils ont. Ainsi la figure Ronde qui est la plus parfaite de toutes, parce qu'elle est la plus simple & qu'elle contient toutes les autres, ne se peut accommoder avec les actions de toutes les parties du corps humain, qui seroit monstrueux & horrible, s'il n'auoit que cette figure. Il en est de mesme des plus belles Couleurs qui n'ont pas de la conformité avec le temperament de l'homme, & qui marqueroient vne extrême al-

teration dans les humeurs, si elles paroissent sur le visage. Le Ton mesme de la voix qui doit estre aux hommes plus fort & plus éclatant, seroit vn defect en vne femme, parce qu'il n'est pas conforme à son temperament qui doit estre proportionné à la puissance naturelle de son sexe. Voilà donc la raison qui monstre que la Beauté des objets Sensibles se tire, non seulement de leur estre absolu & du rapport qu'ils ont avec les organes, mais encore de la conuenance qu'ils doiuent auoir avec leurs sujets.

Ie ne parle pas maintenant des sentimens particuliers que l'on peut auoir de la beauté, ny pourquoy l'vn estime le rouge plus que le verd, le tein brun plus que le vermeil, & les yeux bleus plus que les noirs. Ce n'est pas icy le lieu où nous de-uons examiner ces choses; nous ne touchons qu'aux generales, & nous pensons auoir satisfait à nostre dessein, quand nous aurons encore dit quelque chose de la Beauté Humaine, parce que c'est elle qui cause l'Amour dont nous parlons.

Il y a diuerses sortes ou diuers degrez de Beauté en l'Homme; car il y a premierement l'Intelligible, qui est Essentielle ou Accidentelle; l'Essentielle, se considere dans l'espece & dans le sexe; l'Accidentelle, dans les habitudes & dans les actions; enfin il y a la Beauté Sensible & Corporelle.

La raison de cela est, que l'Espece de chaque

animal a en soy la Beauté, qui n'est rien autre chose que son Estre & son Essence, où sont comprises toutes les puissances & les vertus qui luy sont deuës. Mais parce qu'entre ces puissances, il y en a qui sont destinées pour l'entretien des Especes qui se perdroient avec la vie des animaux, si Dieu ne leur auoit donné la vertu d'engendrer leurs semblables; Et que la Generation ne se peut faire qu'il n'y ait vne Puissance Actiue & vne Puissance Passiue: Il a esté necessaire que chaque Espece fust diuisée en deux, & qu'il y eust deux Sexes à qui ces deux puissances fussent partagées. Et dautant que la Beauté Sensible n'est rien qu'un assemblage de toutes les dispositions corporelles qui sont necessaires aux puissances pour faire leurs fonctions, il faut aussi que chaque sexe ait ces dispositions differentes, puisqu'ils ont des puissances differentes. Et c'est là la source d'où vient la difference de la Beauté masle & femelle, qui ne se trouue pas seulement en quelques parties; mais en tout le corps: Parce que les qualitez premieres estans les principales dispositions de ces deux puissances; & la chaleur & la secheresse qui en sont les plus agissantes, deuant accompagner la puissance actiue, comme la froideur & l'humidité la puissance passiue; Il a fallu que toute la masse des humeurs se ressentît de ces qualitez: De sorte que le temperament du masle deuant estre chaud & sec,

& celuy de la femelle froid & humide, il s'ensuit que toutes les parties de l'un & de l'autre sexe, ont deu auoir des dispositions & des Beutez différentes.

Mais dautant que l'homme a l'entendement & la raison par dessus les animaux, & que cette faculté estant naturellement capable de toutes choses, ne peut auoir sa perfection qu'en les possédant; il faut qu'elle acquiere les dispositions qui sont nécessaires pour arriuer à cette perfection. Et ce sont les habitudes intellectuelles & morales qui font cette beauté accidentelle & acquise, dont nous auons parlé & qui reçoient leur dernier accomplissement dans les actions qu'elles doiuent produire: Car la fin est la dernière perfection, n'y ayant rien d'absolument parfait sans la fin; & l'action estant la fin de toutes choses.

Voylà ce que nous pouuions dire en general de la nature de la Beauté, & ce qu'il falloit sçauoir auparavant que de chercher la cause qui nous, oblige à l'aymer. Car bien que quelques-vns ayent dit que l'on ne deuoit point demander pourquoy la beauté plaist, & que c'estoit autant que si l'on vouloit sçauoir pourquoy le feu échauffe; que c'est sa nature & vne propriété essentielle qu'elle a, dont on ne peut rendre raison. Tous n'ont pourtant pas esté de cet aduis; Platon n'a pas creu que cette recherche

cherche fut indigne de son Socrate, & il n'y a personne qui ne confesse librement que si la connoissance s'en peut trouuer, elle ne doieue estre bien rare & bien excellente. Or quoy que ie ne desapprouue pas tout à fait la pensée de Platon, qui dit que la beauté des choses créées nous rait, parce que c'est vn rayon & vne image de la Beauté Diuine, qui estant souuerainement bonne, inspire necessairement l'Amour quand elle se fait connoistre: Neantmoins comme il y a beaucoup de choses à supposer dans cette opinion que l'Escole d'Aristote ne veut pas receuoir; Et qu'enfin il faut tousiours en reuenir là, de sçauoir pourquoy la Bonté Souueraine est aymable, nous sommes obligez de prendre vn autre chemin qui nous puisse conduire à ces hautes veritez.

Il faut donc dire que ce qui est bon & conuenable à quelque chose, la perfectionne; car il adjoûte ce qui luy manquoit, & augmente ainsi en quelque façon son estre, luy donnant ce qu'elle n'auoit pas, & vnissant ce qui estoit diuisé. Et c'est là le fondement de toutes les inclinations qui se trouuent dans la Nature, & de l'Amour que l'on a pour tout ce qui est veritablement ou apparemment bon.

Or comme dans les facultez connoissantes il n'y a rien de tout ce qu'elles doiuent connoistre; l'entendement & les sens estans à leurs objets ce

que la matiere est aux formes ; quand ces objets s'unissent à ces facultez, ils leur donnent vne perfection qu'elles n'auoient pas & dont elles estoient capables : Et la connoissance qu'elles ont de cette perfection est cause de l'agrément qu'elles y trouvent, qui par apres est suiuy de l'Amour & du plaisir qui forme l'appetit, quand l'entendement & l'imagination luy ont proposé cela, comme vne chose qui leur est bonne & conuenable.

Mais dautant qu'il y a des objets qui donnent plus d'amour & de plaisir que les autres, il faut necessairement qu'ils perfectionnent dauantage les facultez connoissantes : Et ce sont infailliblement ceux qui sont les plus parfaits, c'est à dire qui ont plus d'estre & d'essence, comme nous auons dit; parce qu'ils remplissent dauantage la capacité naturelle que ces facultez ont de connoistre toute l'estenduë de l'estre qui leur sert d'objet. C'est pourquoy il n'y a que Dieu qui puisse remplir l'entendement, & donner à la volonté vne amour & vne ioye parfaite, parce qu'il n'y a que luy seul qui possede tout l'estre : Et en suite les choses qui en ont dauantage, les perfectionnent à proportion, & causent aussi par leur connoissance vne plus grande satisfaction & vn plus grand plaisir. Ce n'est pas que bien souuent les choses les moins parfaites ne contentent dauantage les sens & l'entendement ; mais cela procede de l'erreur que leurs mauuaises

inclinations leur donnent ; lesquelles viennent d'ordinaire du temperament , de la coûtume & de la foiblesse de l'esprit.

Or dautant que la connoissance est vn bien qui ne regarde pas seulement les facultez qui l'exercent ; mais encore toutes les autres à qui elle est vtile : parce que les sens n'ont pas esté donnez à l'animal pour eux-mesmes, mais pour sa conseruation ; Et que la raison est vne lumiere qui ne s'éclaire pas à elle seule , mais à toutes les autres vertus qui sont en l'homme : De là vient que la connoissance que les sens & l'entendement ont des choses qui sont en quelque façon vtils à l'animal , perfectionnent ces facultez ; parce qu'estans destinées à son seruice , elles obtiennent la fin où elles tendent quand elles agissent pour luy ; Et en cét égard elles acquierent vne perfection , qui est en quelque sorte plus excellente que celle qui les regarde seulement , comme estant leur derniere fin & le but que la Nature leur a proposé. C'est ainsi que les yeux trouuent beau tout ce qui fait connoistre la bonté des alimens ; & la couleur du vin ou de l'eau mesme est pour cette raison plus agreable à voir à vn homme qui est alteré , que la plus belle verdure du monde : En vn mot tout ce que l'entendement & l'imagination connoissent par le moyen de la veüe & de l'oüye , pour estre la marque de ce qui nous peut estre vtile ou agreable , est estimé

beau , & perfectionne ces facultez ; dautant que leur perfection consiste à connoistre ce qui nous peut servir. C'est ainsi que la Beauté corporelle nous ravit l'ame & les sens , parce qu'elle est la marque de la puissance interieure qui nous doit rendre plus parfaits : Et c'est principalement en ce sens qu'il est vray de dire , que la Beauté est la fleur & l'éclat de la Bonté.

Mais avant que nous fassions voir comment cette Puissance nous doit rendre plus parfaits , il faut remarquer ce que nous avons desia dit des Puissances : Car il y en a qui regardent la nature de l'homme en general , & d'autres qui sont propres aux sexes. Celles-cy ont leurs dispositions particulieres qui font la Beauté Masculine & Feminine , & qui n'étant autre chose que les instrumens dont elles se doivent servir pour faire leurs fonctions , sont encore les marques qui font connoistre si elles les peuvent bien ou mal faire. Car assurément la Beauté Masculine n'est rien autre chose à nos sens , que la marque de la bonne constitution de la Puissance Active dans la generation ; tout de mesme que la Beauté Feminine est un signe que la Puissance Passive a tout ce qui est nécessaire pour y faire sa fonction. Or comme la Generation est la plus naturelle & la plus excellente de toutes les operations qui sont communes aux animaux , parce que les rendant en quelque façon éternels , elle les approche aussi

en quelque sorte de la perfection Diuine & les rend plus semblables à leur cause & à leur principe ; Il ne faut pas douter que la Nature ne leur en ait imprimé vn tres-puissant desir , & qu'elle ne leur ait aussi donné la connoissance qui pouuoit seruir à cette inclination. Il est vray que cette Connoissance est obscure & cachée , & qu'elle se trouue dans nous mesmes sans l'aide du discours & sans que nous y pensions : Aussi est-elle du mesme ordre que celle que la Nature a inspirée à toutes les choses du monde qui connoissent sans sçauoir ce qui leur est utile. Car dans les actions mesmes des sens & de l'entendement , nous sentons qu'il y a des objets qui nous sont plus agreables que les autres , sans que nous en sçachions la raison : Et l'on ne peut dire autre chose , sinon qu'il y a dans nostre ame vne secrette source d'intelligence , ou plustost que c'est l'Esprit de Dieu qui s'est caché dans ses ouurages & qui pousse les choses à la fin qui leur est necessaire : Car comme l'Artisan conduit l'action des choses naturelles à la fin qu'il pretend , & qu'il faut rapporter tout l'ordre qui paroist dans l'artifice , à sa connoissance & non pas aux choses dont il se sert qui ne le sçauoient connoistre : Aussi dans toutes les choses de la nature où l'on void tant de marques d'une sagesse admirable , il ne faut pas croire que ce soit d'elles qu'elle procede ; mais que c'est l'Esprit de Dieu qui se coule dans leurs effets , qui leur

donne l'ordre & le mouvement, & qui les guide à la fin qu'il leur a prescrite.

Quoy qu'il en soit, c'est par cette connoissance obscure & cachée que la Beauté corporelle se presentant aux sens, l'ame la reconnoist incontinent pour la marque de la puissance naturelle du sexe où elle est; Et en mesme temps ce secret & puissant desir qu'elle a de perpetüer son espece, se réueille en elle & forme l'Amour qui l'agite apres si violemment.

Je sçay bien pourtant qu'une personne laide peut causer le mesme mouvement dans l'ame; qu'il n'est pas tousiours veritable que la Beauté soit une marque certaine de la parfaite disposition des puissances qui seruent à la generation, & qu'en fin elle peut toucher ceux qui sont d'un mesme sexe auxquels ce motif est inutile.

Mais pour ce qui est de la laideur, nous auons montré au traité de l'Amour d'inclination, que bien que cette passion ne semble pas alors tirer son origine de la Beauté, il y a neantmoins dans l'ame une secrette idée de perfection contraire à celle que les sens luy ont présentée qui cause ce charme admirable. Pour les deux autres objections qui restent, il faut dire que la Nature souffre des defaux dans les particuliers, parce qu'elle n'y trouue pas toûjours la matiere obeïssante, d'où vient qu'il y a des parties qui demeurent imparfaites; Et parce que nous abu-

sons souvent des dons qu'elle nous a faits, les employant à des choses qui sont contraires à la fin qu'elle s'estoit proposée.

Il y a vne autre sorte d'Amour entre les hommes, que la Beauté corporelle peut encore exciter; mais dont le motif est different de celuy dont nous venons de parler: Car il ne regarde point le sexe, mais toute l'espece qui deuant auoir ses vertus & ses puissances, doit auoir aussi les dispositions corporelles qui leur peuuent seruir.

Or ces Dispositions sont Naturelles ou Acquises; les Naturelles sont celles qui viennent de la naissance & qui rendent l'homme capable des fonctions de l'Entendement. Car comme tout ce qui est dans l'homme, est destiné pour le service de cette faculté qui est la maistresse de toutes les autres; puis qu'elle ne peut connoistre les choses que par l'entremise des sens, & que les sens ne peuuent agir si leurs organes ne sont bien disposez, il faut de necessité que toutes les parties du corps ayent quelque proportion & conuenance avec l'Entendement: Et pour lors l'ame qui void par ce secret sentiment dont nous auons parlé, que c'est la marque de la perfection humaine, se plaist en cet objet & forme l'amour qui l'vnit au bien qu'elle reconnoist. C'est ainsi que les hommes bien faits sont agreables à voir, parce que la beauté corporelle

qu'ils ont, est vne marque qu'ils sont naturellement propres aux actions les plus parfaites de l'ame; Et la connoissance que nous auons ainsi de leurs vertus, nous les fait aymer comme vn bien excellent qui nous doit rendre plus parfaits. Car il n'y a point de vertu qui ne soit bien-faisante, soit par l'exemple qu'elle nous donne & qui nous oblige de l'imiter; soit par les biens que ses effets apportent à chacun de nous en particulier & à toute la société pour laquelle l'homme est né, & à qui toutes les vertus tant intellectuelles que morales seruent de fondement.

Pour ce qui est des dispositions qui sont acquises, elles marquent aussi les vertus & les puissances acquises, telles que sont les habitudes qui se reconnoissent par les Caractères dont nous traitons icy, c'est à dire par les actions tant intellectuelles que morales, & par l'Air, le Geste & le Maintien du corps qui fait vne partie de la Beauté corporelle: Car comme il y a vne certaine grace qui accompagne les actions des vertus, quand elle paroist à nos yeux elle nous fait croire que les vertus y sont, & forme ainsi l'Amour que nous auons naturellement pour elles.

Ce n'est pas que ces marques ne soient bien souuent trompeuses, & qu'elles ne nous fassent aymer quelquesfois des sujets qui nous deuroient donner

donner de la haine : Mais cela vient de ce que la connoissance qui sert à cet Amour estant obscure & confuse, comme nous auons dit, elle emporte l'appetit auparauant que le discours la puisse examiner, & nous fait ainsi aymer des biens imaginaires. Quelque erreur qu'il y ait pourtant, l'imagination & l'entendement trouuent tousiours leur perfection dans la connoissance que les sens leur donnent, parce qu'ils ne croient pas estre trompez, & qu'ils pensent decouurir par cette Beauté sensible le bien qui la deuoit accompagner, & dont la possession nous pouuoit rendre plus parfaits; c'est pourquoy ils la trouuent agreable, & la proposent à l'appetit comme vn objet digne d'amour & qui peut donner du plaisir.

Voilà les Principes qui nous peuuent donner connoissance de la nature & des effets de la Beauté. Car de vouloir examiner tout ce qui s'en peut dire en particulier, il faudroit des volumes entiers; & ces matieres estans trop releuées lasseroient l'esprit par la longueur du discours, & feroient naistre le degoust d'une chose qui n'en doit iamais donner. Il n'y a qu'une difficulté sur ce sujet que nous n'oserions laisser sans examen & dont la resolution n'est pas aysee à trouuer: Car ceux que l'on estime Beaux en vn climat, ne le sont pas en vn autre; & mesme en quelque lieu que ce soit, vn visage qui semblera

beau aux vns, paroïstra laid à plusieurs : Et de là quelques-vns ont creu que la Beauté n'est pas vne qualité réelle ny veritable, & qu'elle n'est que dans l'opinion. Mais on ne sçauoit desauouer que la proportion des parties & les autres choses qui font la Beauté ne soient réelles & veritables, & que ce ne soient des qualitez qui ennoblissent le sujet où elles sont, & qui contentent l'esprit & 'es yeux. Or puisque la Nature se propose tousiours la perfection, & qu'il n'y a qu'une perfection veritable en chaque ordre des choses, il faut qu'elle ait eu le dessein d'une beauté particuliere en chaque espece, qui doit estre le modelle de toutes celles que les particuliers peuuent auoir : Et comme le corps humain est le plus temperé de tous ceux qui sont dans la Nature, il est vray-semblable qu'il doit rencontrer cette Beauté parfaite dans le climat le plus temperé. Mais d'où vient donc qu'elle n'est pas reconnüe dans les autres Climats, qu'au contraire, on y trouue beau ce qui est estimé laid dans celuy-là ; car les plus noirs chez les Mores, sont estimez les plus beaux, les plus camus chez les Chinois, & ainsi des autres.

De moy ie pense qu'il faut dire que le climat donne vne certaine disposition au corps, & luy fait changer son temperament, & que tel temperament donne telle inclination & telle puissance à l'ame. Or parce que le corps doit estre

proportionné aux puissances, c'est vne suite nécessaire que les corps dans les Climats ayent les marques de ces inclinations : De sorte que la Beauté consistant dans la proportion que les corps ont avec leurs vertus & leurs puissances, & les hommes ayans telles puissances en certains climats, il faut qu'ils estiment beaux ceux qui ont ces marques ; parce que ces inclinations leur sont comme naturelles & communes ; ainsi ils iugent de la Beauté suivant leur inclination naturelle, tout de même que dans les pays temperez, il s'en trouue qui iugent diuersement de la Beauté à cause du temperament particulier qu'ils ont, & qui porte leur iugement à estimer ce qui leur est le plus conforme.





LES CHARACTERES DE LA IOYE.

CHAPITRE III.

QVOY que la Nature semble estre auare du Plaisir & de la Volupté, & qu'en les mellant tousiours avec la douleur, elle fasse croire qu'elle ne les donne qu'à regret & par contrainte; si faut-il auoüer qu'il n'y a point de chose au monde où sa liberalité & sa magnificence paroissent dauantage; & l'on peut dire que tous ces autres presens sont des debtes qu'elle paye; mais que celuy - cy est vne grace & vne faueur toute pure. Car bien qu'elle donne l'estre à chaque chose, qu'elle ait soin de sa conseruation, & qu'elle la conduise à sa fin, elle y est obligée; Et il n'y a rien

dans l'Vniuers qui ne luy puisse demander avec iustice ce qui est necessaire pour la perfection de son estre. Mais comme l'action est la fin & la perfection de toutes choses ; quand elles sont arriuées jusques-là , elles ne peuuent plus rien exiger de la Nature qui s'est acquitée de ce qu'elle leur deuoit ; Et si elle y adjoûte quelque chose , c'est par faueur & non point par obligation. De sorte que faisant toûjours couler la Volupté sur les actions qui luy sont conformes , & les couronnant en quelque façon par elle , on ne peut douter que ce ne soit vn effet singulier de sa munificence , ou pour mieuxdire que ce ne soit le comble de toutes les graces qu'elle scauroit iamais faire.

Aussi sçachant combien elle estoit precieuse , elle ne l'a voulu communiquer qu'aux choses les plus nobles & les plus excellentes : Elle a creu que celles qui n'auoient point de connoissance , en estoient indignes , & qu'il n'y auoit que le sens & la raison qui la peussent meriter : Voire mesme comme si c'eust esté vn bien qui ne se deuoit posseder que dans le Ciel , elle n'a pas voulu qu'elle fût pure & parfaite icy bas : Elle l'a meslée avec les soucis & les peines : Elle l'a detrempée avec les larmes , & a voulu qu'elle commençât ou qu'elle finît toûjours par la douleur.

Mais comme le Soleil ne laisse pas d'estre la plus belle & la plus vtile chose du mode , bien qu'il ait des

taches & qu'il souffre des Eclipses; aussi quelque imparfaite que soit la Volupté, de quelque mélange qu'elle ait esté affoiblie, cela n'empesche pas qu'on ne la doive estimer la plus excellente & la plus desirable de toutes les choses qui peuvent arriver aux hommes: Et veritablement on peut dire que c'est la lumiere de tous les autres biens, & que si on l'ostoit de la vie, on n'y laisseroit que l'horreur & la confusion. En effet ce seroit plutôt vn flux continuel de maux que d'années; les sens seruiroient plutôt de portes à la douleur qu'à la connoissance; la science mesme passeroit pour vne affliction d'esprit, & la vertu pour vne seruitude ennuyeuse. Il n'y a que la Volupté qui donne le prix à toutes ces choses, & qui les rende agreables; pour le moins elles ne paroissent bonnes qu'autant qu'elle se trouve meslée avec elles; Et si l'ame n'esperoit de la rencontrer en tout ce qu'elle fait, elle demeureroit languissante & immobile, elle seroit sans action & sans vigueur, & il ne faudroit plus parler de vie, de bonheur ny de felicité.

Certainement à voir les merueilleux effets qu'elle cause, comme elle est la maistresse & la dispensatrice de tous les biens, qu'elle rappelle ceux qui sont passez, qu'elle fait sentir ceux qui ne sont pas encore, qu'elle rend mesme les chagrins, les larmes & les perils agreables; il faut auoüer que l'on a eu raison de dire que la Nature est vne grande Magi-

cienne, & que la Volupté est le plus puissant charme qu'elle employe à produire ses merueilles. En effet c'est vn charme qui fait disparoistre tous les maux qui nous attaquent, qui nous eleue au dessus de nous mesmes, qui nous change en d'autres hommes, & d'hommes nous transforme en de petits Dieux : Mais, nous en faisons souuent vn poison qui esteint tout ce qu'il y a de diuin en nostre ame, qui abrutit nostre esprit, & qui nous rend semblables, voire mesme inferieurs aux bestes.

Car bien que les Voluptez du corps soient innocentes d'elles mesmes, & qu'elles nous ayent esté données pour seruir d'attrait aux plus necessaires & aux plus nobles actions de la vie, neantmoins quand nous en peruertissons l'vsage, & que nous ne les rendons pas obeïssantes à la raison, elles se rebellent contre elle, l'arrachent du thrône où elle est, la precipitent dans la bouë & dans l'ordure, & y étouffent toutes les semences de vertu & d'intelligence qui sont nées avec elle.

Aussi n'y a-t'il point eu de chose où la Sagesse se soit plus occupée qu'à chercher les moyens pour euitier vn si dangereux ennemy, qui flatte à son entrée & qui met apres le trouble & la confusion par tout; qui remplit l'ame de sang & de flammes, le corps d'infirmité & de douleurs, & qui ne laisse apres luy que le repentir.

Nous ne voulons pas proposer les aduis & les preceptes qu'elle a donnez sur ce sujet : Il faudroit rapporter icy toutes les Loix que la Medecine, la Morale & la Religion ont prescrites, au moins y en a-t'il peu qui n'ayent esté faites pour preuenir ou pour corriger les desordres que la Volupté peut causer : Mais nous pensons pourtant seconder son dessein, en faisant voir la difformité que l'excez de cette passion produit dans l'Ame & sur le Corps.

Le Tableau de la Volupté ne se peut faire qu'il n'y entre beaucoup de figures; car outre qu'il y a des loyes qui n'ont aucun commerce avec le corps, & qui ne se trouuent que dans la plus haute partie de l'Ame, celles des sens sont si differentes entr'elles, qu'autant qu'il y a d'objets agreables qui les peuuent émouuoir, on peut dire qu'il y a aussi autant de diuerfes sortes de plaisir. Et veritablement qui voudroit desseigner le Portrait que nous entreprenons suiuant l'ordre des sens, & dépeindre la Volupté que chacun d'eux peut ressentir en particulier, l'inuention ny l'ordonnance n'en seroient pas mauuaises: Mais nous ne pouuons nous en seruir sans faire tort à d'autres desseins où il faut employer les mesmes traits & les mesmes couleurs que celuy-cy nous demanderoit. Car si nous nous arrestions à exprimer les Charactères du Plaisir qui se
trouue

trouue au Goust & au Toucher, il faudroit necessairement y décrire aussi ceux de la Gourmandise, de l'Yrongnerie, de l'Impudicité, & ainsi des autres dont nous deuons faire des Tableaux particuliers. C'est pourquoy sans venir au détail de toutes ces choses, nous choisirons ce qu'il y a de commun en tous les Plaisirs, diuisant ce Discours en deux Parties, dont l'une traitera de la Ioye serieuse où le ris ne se rencontre point, & l'autre de la Ioye riante & enjouée qui n'est autre que la Passion du ris.

La Ioye n'est pas de ces Passions dont les commencemens sont foibles & les progresz vehemens; elle a toute sa force & sa grandeur dès sa naissance, & le temps ne sert de rien qu'à l'affoiblir ou à la diminuer. Si-tost qu'elle est entrée dans l'ame, elle la transporte & la met hors d'elle-mesme; Et le rauissement qu'elle luy cause, est quelquesfois si violent qu'elle luy oste l'usage des sens, luy fait abandonner les soins de la vie, & la fait perdre bien souvent. Mais quoy qu'elle n'aille pas à cet excez, on reconnoist bien toujours par cette impatience enjouée qui paroist en toutes ses actions, qu'elle a de la peine à se tenir en ses bornes, qu'elle s'échappe & qu'elle tasche de sortir au dehors.

Car on ne sçauroit arrester les pensées ny les paroles d'un homme content; il ne songe qu'à sa bonne fortune, il en parle continuellement, & s'il n'est point interrompu, il n'a rien dans le cœur qu'il ne

Q

porte sur la langue , il découure les plus secrets desseins , & fait ainsi de sa ioye l'ennemy de son repos & de son contentement.

S'il se taist, il ne faut point l'entretenir d'autres discours que de ceux qui fauorisent sa passion: Quelques diuertissans que puissent estre les autres, ils luy sont importuns, il les rompt à tous momens, il y fait tousiours entrer quelque chose de son transport ; ou bien le peu d'attention qu'il leur donne, semble estre vne marque du mépris qu'il en fait, ou vn reproche de ce qu'ils interrompent ses plaisirs.

Mais si on luy parle du sujet qui les fait naistre, si on admire son bon-heur, si on luy témoigne que l'on y prenne part ; alors quelque fascheux & feüere qu'il puisse estre, il deuient complaisant, il carresse, il embrasse, & souuent par des ciuilitéz & des faueurs ridicules, il perd le respect qu'il doit, ou fait perdre celuy qui luy est deu.

Du premier qui l'aborde il en fait son amy & son confident, il en prend le conseil, il en suit les aduis ; Et il se trouue quelquesfois que c'est vn enfant, vn valet, ou vn ennemy à qui il a confié son secret & sa conduite. Dans cét auenglement il approuue tout ce qu'ils luy proposent à l'auantage de sa passion ; de quelques vanitez dont ils la nourrissent, de quelques bons succez dont ils la flattent, il n'y a iamais rien à son aduis qu'il ne doie croire & qu'il ne

puisse esperer : Comme si toutes choses deuoient respecter ses plaisirs, il ne pense pas qu'il y en ait aucune qui oſast les trauerser ; il void le peril qui les enuironne de tous costez, sans s'en émouuoir ; Et par vne confiance aueugle il croit estre en seureté quand sa perte est souuent la plus asſeurée : De sorte qu'on peut dire qu'il n'y a point d'homme si credule avec si peu d'apparence, si hardy avec tant de foiblesse, ny si mal-heureux avec tant de bon-heur.

Il veut faire croire qu'il est content, il se le persuade à luy-mesme, & cependant ses desirs trahissent son dessein & son contentement ; car ils s'irritent par la jouissance, & ne se portans qu'aux biens qu'il n'a pas, ils rendent inutiles ceux qu'il possède, & font de sa ioye mesme le sujet de son inquietude : La volupté a cela de propre, que bien qu'on en jouisse, elle ne laisse pas de se faire desirer, qu'elle ne se contente iamais, & qu'elle est plustost lasſe du bien qui l'entretient, qu'elle n'en est pleinement satisfaite. Mais c'est assez parlé du trouble qu'elle excite dans l'ame, voyons celuy qu'elle fait sur le visage.

Ily a de certains Plaisirs dont on peut dire que l'ame est jalouse, qu'il semble qu'elle veuille posséder en secret & qu'elle n'ose cōmuniquer aux sens : Mais pource que quelque soin qu'elle prenne de les

cacher, elle ne sçauroit si bien faire qu'on n'en reconnoisse quelque chose; sa retraite la rend suspecte, & se voulant celer, c'est lors qu'elle se découure davantage.

Car le regard deuient fixe & arresté, tout le corps est immobile, les sens oublient leurs fonctions, il se fait enfin vne générale suspension de toutes les vertus animales. Et bien que du premier abord on puisse douter si cela procede de l'Estonnement ou de la Tristesse qui produisent souuent les mesmes effets, l'on reconnoist apres par vn certain éclat qui demeure sur le visage, par ie ne sçay quelle douceur qui reste dans les yeux & par vne legere image du souriz qui paroist sur les levres, que ces fascheuses passions n'ont point de part en ce transport, & qu'il vient de cette Ioye interieure dont l'ame est rauie & comme enyurée.

Mais quand le Plaisir a la liberté de se respancre au dehors, que les sens y prennent part, & que l'esprit & le corps semblent r'entrer en commerce & en intelligence; alors il est bien aisé de connoistre l'agitation qui se fait dans l'ame par celle qui paroist en toutes les parties exterieures.

Vous voyez sur le visage vne certaine viuacité gaye, vne inquietude agreable & vne hardiesse riante; le plaisir petille dans les yeux, la douceur en accompagne tous les mouuemens; Et quand ils viennent à pleurer ou qu'ils iettent quelques re-

gards mourans, vous diriez que le riz se confond avec leurs larmes, & que la gayeté se mesle avec leur langueur. Le *Front* y est tranquille & serein, les sourcils n'y esleuent iamais de rides ny de nuages, & il semble qu'il s'ouure & s'étende de tous costez. Les *Levres* y sont rouges & humides, le sourris ne les quitte iamais; Et ce léger tremblement qui leur arriue quelquefois, peut faire croire qu'elles tressaillent d'aise. La *Voix* deuient plus grosse qu'à l'ordinaire, par fois elle se rend éclatante, & elle ne sort iamais qu'avec empressement: Car il n'y a point de passion si babillarde que la Ioye; quelque sterilité qu'il y ait dans l'esprit, quelque pesanteur qui soit sur la langue, elle fait parler continuellement, & il n'y a que sa propre violence qui ferme quelquesfois la bouche, & qui arreste tout à coup la parole. Enfin tout le visage prend un embon-point extraordinaire; Et de pâle, chagrin & seuer qu'il estoit auparauant, il deuient alors vermeil, affable & content.


Le reste du corps se ressent encore de cette alteration; vne chaleur douce & vaporeuse se répand en toutes ses parties qui les enfle & leur donne vne plus viue couleur: elles en deuiennent mesme plus fortes & font leurs actions plus parfaites qu'elles ne faisoient auparauant. En effet de toutes les émotions de l'ame, il n'y en a point qui soit plus amie de la santé que celle-cy, pourueu qu'elle ne soit pas ex-

trême; Elle chasse les maladies, elle purifie le sang & les esprits, & rend, comme dit le Sage, les années fleurissantes. Si-tost qu'elle est entrée dans le *Cœur*, elle le fait enfler par grands battemens, elle élève la poitrine par de longues respirations, elle fait dans les arteres vn pouls large & estendu: Et neantmoins quoy que tous ces mouuemens se fassent lentement & sans vehemence, ceux des autres parties se font avec precipitation & vigueur, la teste & les yeux sont en vne continuelle agitation; les mains se remuent sans cesse: On va, on vient, on saute, on ne sçauroit demeurer en place. Mais il arriue aussi quelquesfois que la violence de cette passion oste tout à fait l'vsage des sens & du mouuement, qu'elle esteint la chaleur naturelle, qu'elle cause des syncopes, & qu'en vn moment elle fait perdre la vie. Voyons donc comment elle peut produire tant d'effets si contraires & si merueilleux.



DE LA NATURE DE LA IOYE.

II. PARTIE.

VEL QV'VN pourroit trouuer estrange de ce que la Ioye qui parle tant d'elle-mesme, n'a point encore dit ce qu'elle est : Mais il y a bien plus de quoy s'étonner de ce que la Philosophie qui nous promet la connoissance de toutes choses, soit demeurée court en celle-cy, quoy qu'il n'y ait rien qui tasche tant à se faire connoistre que le Plaisir : Il penetre jusques au fond de l'ame, il l'environne de tous costez, il la sollicite par toutes ses connoissances ; c'est la fin de tous ses desirs, le couronnement de toutes ses actions ; avec tout cela sa nature luy est inconnuë, & les plus grands esprits qui l'ont recherchée, ne font pas mesme d'accord du genre sous lequel il la faut placer.

Car il y en a qui ont dit que la Volupté n'estoit autre chose que le repos & la tranquillité de l'ame : D'autres que c'estoit vne passion toute pure dans laquelle l'ame n'agissoit point : Et de ceux qui l'ont mise au rang des actions, il y en a qui ont creu qu'elle ne procedoit pas de l'Appetit, mais de la Connoissance : Enfin il s'en est trouué qui n'osans

pas la mettre au rang des autres passions, ont dit que c'en estoit le Principe; d'autres que c'en estoit le genre ou la premiere espece.

Si nous n'auions banny de nostre dessein la Chicane & la Critique de l'Eschole, nous serions obligez d'examiner toutes ces opinions & de chercher dans leurs ruines les fondemens sur lesquels nous deuons bastir la definition & l'Idée de la Volupté; mais puisque nous n'auons pas cette liberté, & que nous rendrions le Plaisir importun & desagreceable, par la longueur des discours qu'il y faudroit employer; sans demander le conseil d'autrui, nous voulons consulter la chose mesme, & voir si elle se decouurira à nous, apres s'estre cachée à tant d'excellens esprits.

Nous disons donc qu'il ne faut point douter que le Plaisir ne soit vn mouuement de l'Ame, & qu'il est impossible de conceuoir le calme & le repos dans la tempeste qu'il excite aux pensées, aux Esprits & aux humeurs. Comme ces choses-là ne se meuuent pas d'elles-mesmes, il faut que l'ame les agite, & qu'elle se donne le mesme branle qu'elle leur imprime: Car il est certain que les effets estans semblables à leurs causes, les mouuemens du corps qui sont les effets de l'ame, doiuent estre les images de l'agitation qu'elle se donne. Je sçay bien que l'Escole ne veut pas appeller ces agitations de veritables mouuemens; mais cela ne nous arreste point;
il

il fuffit qu'ils foient tels que l'ame les peut auoir, & que le Plaiſir en ſoit vn de cét ordre-là.

Touſesfois comme elle a deux parties qui ſe peuvent mouuoir ; on pourroit douter à laquelle des deux appartient le Plaiſir. Car bien que tout le monde auouë que ce ſoit vne paſſion, & par conſequent vn mouuement de l'appetit, il ſemble neantmoins qu'il y en a quelqu'un qui eſt propre à la connoiſſance, veu que les ſens & l'entendement trouuent de la complaiſſance dans les objets qui leur ſont conformes, auparauant meſme que l'appetit ſoit émeu. Mais auſſi comme nous auons deſia montré au diſcours de l'Amour, que cette complaiſſance n'eſt pas vn veritable plaiſir, & que les Demons qui ſont capables de cét agréement, ne peuvent eſtre touchez de la ioye qu'ils deuroient pourtant reſſentir bien parfaite, ſi elle venoit de la ſeule connoiſſance, il faut en demeurer à l'opinion commune, & dire avec elle que le plaiſir eſt vn mouuement de l'appetit, puis que c'eſt le bien qui émeut cette partie de l'ame, & que le plaiſir n'a point d'autre objet que le meſme bien.

Cecy pourtant fait naiſtre vne autre difficulté ; car ſ'il eſt vray que l'ame ceſſe de ſe mouuoir quand elle eſt arriuée au but où elle tendoit ; comme elle ſe meut pour poſſeder le bien, la poſſeſſion doit eſtre la fin & le terme de ſon mouuement ; & par tant il faut que le plaiſir qui vient touſiours apres la

possession, soit plutôt vn repos qu'un mouuement de l'appetit. Neantmoins quand nous serions d'accord que la possession est le but & la fin des mouuemens de l'ame; nous dirions que cela se doit entendre seulement de ceux qu'elle employe pour y arriuer; car bien qu'elle ne se porte plus vers le bien qu'elle possède, cela n'empesche pas qu'elle ne s'agite encore pour le goûter, & qu'elle ne se raiuiffe dans la jouissance qu'elle en a. Mais pour en parler plus exactement, la possession n'est pas la dernière fin que l'ame se propose, c'est la jouissance qui est la perfection & l'accomplissement de la possession: Car il est certain que l'on possède des choses dont on ne jouit pas, & l'on peut dire que le bien se rend maître de l'ame, quand il se presente & s'vnit à elle; mais qu'elle en deuient la maistresse quand elle en jouit. Apres tout il ne faut iamais dire que le repos soit la fin que l'ame se propose, puisque la fin est la perfection des choses, & qu'il y en a qui veulent tousiours estre en action pour estre parfaites: Or l'ame est de ce genre-là, elle ne tend iamais au repos si ce n'est par foiblesse; Et partant il est nécessaire que la Ioye & la jouissance soient dans le mouuement; voyons donc quel il est.

Pour le decouurir il faut remarquer que la Volupté ny la Ioye ne se forment iamais dans l'ame qu'apres que le bien y a inspiré l'Amour: Car comme le premier mouuement de l'appetit vers le

bien est de s'vnir à luy, & que l'Amour consiste en cette vnion, il est impossible de se figurer aucun autre mouuement qui ne soit postérieur à celuy-là; & partant si la Volupté est vne émotion de l'ame vers le bien, elle doit presupposer l'Amour, & venir tousiours apres luy.

Or quoy que l'Amour la precede tousiours, il ne s'ensuit pas qu'il soit tousiours accompagné d'elle; il y peut auoir des obstacles qui empeschent l'appetit de se mouuoir pour former cette passion; & la tristesse peut estre si grande qu'elle occupera toute l'ame, & n'y laissera pas entrer vn seul rayon de ioye. Mais il est certain aussi que s'il n'y a rien qui retienne l'appetit, il ira tousiours de l'Amour jusques au Plaisir; parce que l'ame ne s'vnit au bien que pour en jouir, & qu'il est impossible qu'elle en jouisse que par le Plaisir. Et à dire le vray, la jouissance n'est autre chose que la Volupté qui se trouue dans la possession du bien; Et suiuant que la jouissance est plus parfaite, elle est aussi plus grande & plus excellente.

Quel mouuement peut donc souffrir l'appetit dans le Plaisir & dans la jouissance outre celuy de l'Amour par lequel il s'vnit au bien? Certainement c'est vne chose bien mal-aisée à conceuoir; comme ces actions se passent dans vne puissance qui est toute aueugle & qui est cachée au plus profond de l'ame, elles sont extremement obscures, & quel-

que lumière que l'esprit y puisse porter, elles ne se laissent voir qu'avec bien de la peine.

Neantmoins puisque nous nous sommes engagés à faire voir la difference des passions, par les differences des mouuemens corporels, il faut de necessité pour connoistre quelle est la Joye, trouuer dans les choses sensibles vne sorte de mouuement qui puisse représenter l'agitation que l'ame souffre en cette rencontre.

Comme il arriue donc dans la Passion d'Amour que l'Appetit se porte vers l'objet aymable, qu'il y court & qu'il s'vnit à luy; on peut dire que ce mouuement est semblable à celui des corps fluides qui coulent vers leur centre & qui pensent y trouuer leur repos: Mais parce que lors qu'ils y sont arriuez, ils ne s'arrestent pas pour cela, qu'ils retournent & se respendent sur eux-mesmes, qu'ils s'enflent & se débordent en suite; aussi apres que l'Appetit s'est vny au bien, il ne finit pas-là son mouuement; il retourne sur ses pas, il se respend sur soy-mesme, & se déborde sur les puissances qui luy sont les plus proches. Par cette effusion l'ame se replie sur l'image du bien qu'elle a receuë, se mesle & se confond avec elle, & pense ainsi le posseder dauantage, s'vnissant doublement à luy; voire mesme comme l'Appetit s'enfle & se grossit par ce reflux, il ne peut demeurer dans ses bornes, & est contraint de s'escouler sur la faculté qui luy a

donné la connoissance de cet objet ; luy faisant ainsi part du bien qu'il auoit receu d'elle , & faisant par ce moyen concourir toutes les parties de l'ame à sa possession , où consiste la parfaite Iouissance. Car puisque l'ame n'a point d'autre but que de posséder parfaitement le bien , & que pour le posséder parfaitement il faut qu'elle connoisse qu'elle le possède ; l'Appetit n'ayant point de connoissance , ne peut tout seul la faire iouir de ce qu'elle ayme ; il faut que l'Imagination & l'Entendement y contribuent , & qu'apres qu'ils ont proposé le bien à l'Appetit , & que l'Appetit s'y est vny , il retourne sur l'un & sur l'autre , & leur rende compte de ce qu'il a fait ; afin qu'en vnissant ainsi leurs fonctions , l'ame s'vnisse au bien en toutes ses parties , & qu'elle fasse pour luy ce mouuement Circulaire qui luy est si naturel & où consiste l'accomplissement & la perfection de ses operations , comme enseigne la Philosophie Platonique.

Après tout s'il est vray que l'Ame & les Esprits s'agitent d'une mesme façon dans les passions , on ne scauroit douter que le mouuement que l'Ame souffre dans la Loye , ne soit tel que nous auons dit , puisque celuy des Esprits y est tout à fait semblable : Car apres que l'Amour les a portez vers le bien , ils se respendent & se débordent sur les organes des sens , comme nous allons faire voir : De sorte qu'on ne scauroit manquer , en disant que la

Ioye est vne effusion de l'Appetit par laquelle l'ame se respand sur le bien , pour le posseder plus parfaitement.

Ie sçay bien que la definition qu'Aristote en a donnée , est bien differente de celle-cy ; car il dit que c'est vn mouuement de l'ame qui la met subitement & sensiblement dans vn estat conuenable à la Nature: Mais le lieu où il l'a proposée, montre assez qu'il n'auoit pas dessein de la rendre bien exacte, ne traitant là qu'auiec des Orateurs & non pas avec des Philosophes. Et veritablement qui l'examinera de prez, n'y trouuera rien moins que l'Essence de cette Passion : Combien se rencontrera-t'il de mouuemenstels qu'il les a marquez où le Plaisir ne se trouuera iamais ? Toutes les actions naturelles ne mettent-elles pas l'ame en vn estat conuenable à sa nature , & ne se peuuent-elles pas faire subitement & sensiblement , sans qu'elles soient pour cela delectables ? La passion d'Amour ne se forme-t'elle pas ainsi ; Et n'est-ce pas vn estat bien conuenable à la nature de s'vnir au bien & de le posseder , & cependant le plaisir ne l'accompagne pas toûjours ? Et puis ne peut-on pas dire que ce n'est pas la Ioye qui apporte cet estat conuenable à la Nature , mais plustost que c'est luy qui fait naistre la Ioye ?

De plus qu'est-il besoin de dire que c'est vn mouuement *subit* , puisque l'Appetit n'a point

d'autres mouuemens : Car s'il arriue que l'ame ne s'esmeue pas si promptement en quelques passions, cette paresse ne vient pas de l'Appetit, mais de la faculté qui luy propose le bien avec trop de difficultez, & qui luy commande trop lâchement de le poursuiure : Estant vne puissance aueugle, elle ne marche que comme elle est conduite, & si tost que le commandement luy est fait, elle obeït & s'esmeut en vn instant.

Il est vray que de son costé, il y peut auoir des obstacles qui empeschent qu'il n'obeïsse pas si promptement, comme lors qu'il y a des passions contraires à celles que l'objet deuroit inspirer ; car vne extrême tristesse ne souffrira iamais que la Ioye se forme dans l'Appetit : Mais aussi quand l'empeschement est leué, il s'émeut subitement & produit tousiours en vn moment la passion aussi parfaite qu'est la connoissance & le motif qu'on luy propose. Car si l'Amour a des commencemens foibles, cela vient de ce que le bien est représenté foiblement, & les progresz qu'elle fait, sont de nouveaux mouuemens de l'Appetit qui sont causez par la representation de nouvelles idées & de nouvelles perfections.

En effet l'on peut dire de toute la suite & de tous les accroissemens des passions, qu'il en est comme de la flamme & de la lumiere qui s'entretiennent & qui s'augmentent par vne infinité de

productions répétées de moment en moment ; celle qui paroist n'estant pas celle qui estoit auparavant , & qui sera mesme incontinent suivie d'une nouvelle ; car toutes se succedans ainsi l'une à l'autre sans interruption , semblent n'estre qu'une mesme chose qui s'est conservée & entretenue.

Ainsi en est-il de la Joye & de toutes les autres Passions ; elles se forment tout d'un coup , & passent en un instant ; mais aussi à chaque moment elles se renouvellent , faisant ainsi un flux continuel de plusieurs mouvemens parfaits , qui dure tout autant de temps que la connoissance sollicite l'appetit à se mouvoir.

Il est donc veritable que l'appetit n'a point de mouvemens qui ne soient subits : Que neantmoins il commence à se mouvoir plutôt une fois que l'autre , parce que la faculté qui luy commande , est diligente ou paresseuse , ou parce qu'il y a quelque mouvement contraire qui le retient. Et cela est facile à concevoir par l'exemple des yeux qui voyent les choses en un instant , quoy que pour les voir ils s'ouvrent quelquesfois plus viste ou plus lentement , & que mesme apres estre ouverts ils peuvent avoir quelque indisposition qui les empeschera d'agir.

Je sçay bien que les Medecins semblent se servir de la mesme definition d'Aristote , quand ils disent que le Plaisir est un mouvement prompt & sensible ,

ble, qui met la nature en vn estat qui luy est conuenable; & que si les objets ne font vne prompte & sensible impression sur les sens, ou s'ils ne la font pas proportionnée à la nature, ils ne causeront iamais de plaisir. Mais il est aysé de voir que le mouuement dont ils parlent, n'est pas celuy de l'appetit où consiste le Plaisir, & que ce n'en est que la cause: Car auparauant que l'appetit se meue, il faut que les objets fassent l'impression telle que nous venons de dire; Et pour lors l'ame qui la sent & qui void que ce luy est vn bien, se répand sur luy pour le posséder plus parfaitement, & forme ainsi le Plaisir qui est augmenté par l'effusion des esprits, comme nous dirons tantost. Je ne m'arreste pas à examiner comment la douleur suruient quelques-fois à ce mouuement prompt qui porte la Nature à vn estat qui luy est conuenable; comme quand on approche du feu les mains extremement froides; cela appartient à la passion de la douleur: Il suffira icy de marquer que les objets qui ne font pas cette prompte impression, ne causent point de Plaisir; parce que s'insinuant peu à peu, la Nature s'y accoustume & ne sent pas le changement qui luy arriue: C'est pourquoy ne connoissant pas le bien qu'elle reçoit, l'imagination ne le propose point à l'appetit, qui par consequent n'en est point ému: C'est encore ainsi que l'on se lasse des choses les plus agreables; quand on les a trop long-temps goûtées:

Mais nous parlerons plus amplement de cecy à la fin de ce Discours.

Reprenons le fil de celuy que nous auons laissé, & disons que bien que tous les mouuemens de l'appetit se fassent subitement, il est pourtant veritable que de tous les objets qui excitent les Passions, il n'y en a point dont la presence émeue si-tost & si facilement l'appetit que celuy de la Ioye: Et cela vient, à mon aduis, de ce que l'objet du Plaisir est le bien entant qu'il est desia aymé; car nous auons montré que l'Amour deuançee tousiours la Ioye; de sorte qu'estant desia vny à l'appetit par le moyen de l'Amour, il n'y a plus rien à son égard qui empesche le mouuement que cette puissance doit faire pour le goûter. Mais il n'en va pas ainsi dans les autres Passions dont les objets doiuent estre examinez par la connoissance, auparauant que d'estre proposez à l'appetit: Et comme il n'y a gueres de biens ny de maux qui soient purs, aussi se trouue-t'il tousiours beaucoup de choses qui diminuent leur bonté & leur malice, & qui suspendent le iugement qui s'en doit faire. Mais pour exciter la Ioye cét examen est inutile; l'appetit possédant desia le bien, tous les conseils sont pris, tous les doutes sont leuez, & il doit par necessité s'émouuoir au mesme instant qu'il s'est vny à luy pour en jouir, en quoy consiste la Ioye & le Plaisir.

Mais c'est penetrer trop auant dans les secrets de l'Ame, & s'arrester trop long-temps à des choses qui ne s'arrestent point; laissons ces mouuemens imperceptibles, & voyons si ceux qui se font dans les humeurs & dans les esprits, sont plus aysez à connoistre.

Neantmoins auant que d'entrer en cette recherche, il sera bon de dire quelque chose de l'objet qui émeut cette passion: Car bien que nous ayons desia dit que c'estoit le bien, il faut voir sous quelle consideration il merite cette qualité, estant certain que sous diuers respects il cause diuers mouuemens dans l'ame.

Comme donc le bien entant qu'il est aymable, est l'objet de l'Amour, aussi entant qu'il est delectable, c'est celuy de la Ioye: Et il n'est point efficacement delectable que quand il est aymé, parce que le Plaisir presuppose l'Amour: De sorte que le bien entant qu'il est aymé, doit estre le veritable objet de la Ioye. On dira peut-estre que le desir presuppose aussi l'Amour, & qu'il faut que le bien soit aymé pour estre désiré: Il est vray; mais le desir demande vne autre condition, c'est à sçauoir l'absence qui ne se rencontre iamais dans la Ioye où il faut toujours que le bien soit present: Car quand les choses passées, où celles qui sont à venir, nous delectent, c'est vn effet de l'imagination qui nous les rend pre-

sentes & qui les fait passer pour telles qu'elles sont en nostre pensée.

Au reste par le mot de *Bien*, il ne faut pas seulement concevoir ce qui est véritablement ou apparemment bon ; mais encore les maux que l'on a évitez : C'est ainsi que le souvenir des peines que l'on a souffertes, & des dangers que l'on a courus, est agreable, d'autant que c'est vn bien que d'en estre déliuré : C'est ainsi que la vengeance est si douce, parce qu'en surmontant le mal, on n'en craint plus les attaques : C'est ainsi que les larmes sont quelquesfois délicieuses, parce qu'elles déchargent la nature d'un fardeau inutile, & qu'il semble que la tristesse qui les a excitées, s'escoule & s'en aille avec elles.

Il faut encore remarquer que le bien estant vne chose conuenable à la nature, cela se doit entendre aussi bien de la nature dépravée comme de celle qui est parfaite ; car vn malade prend plaisir à des choses qui luy sont contraires, & les hommes vicieux trouuent du contentement dans leurs débauches, parce qu'elles sont conformes à leur nature corrompue & déreglée.

De vouloir apres cela examiner en détail tout ce qui nous peut donner du plaisir, outre que ce seroit faire tort à nostre dessein & à celuy du Lecteur, qui nous demandent tous deux de la brièveté ; cela est si aysé à cōnoistre que ce seroit perdre

le temps & les paroles que de s'y arrester. Il suffira de dire, que puisque le bien est la source de toutes les douceurs que cette passion fait couler dans l'Ame, & que ce n'est autre chose que ce qui est conuenable à nostre nature & ce qui la perfectionne; il faut que les biens qui nous perfectionnent dauantage, excitent aussi de plus grands & de plus solides Plaisirs. Or comme nous sommes composez de deux parties, del'Esprit & du Corps, & que celle-là est incomparablement plus excellente que celle-cy, il s'ensuit que la perfection qui luy arriue, est aussi la plus excellente; Et partant que les biens qui la causent, sont les plus nobles & les plus delectables.

Mais encore parce que les biens du Corps sont pour la conseruation de l'espece ou de l'indiuidu, & que celle-là est plus considerable à la Nature, comme estant vn bien plus commun & plus general: De là vient que le Plaisir qui l'accompagne, est plus doux & plus sensible que pas vn des autres: Et par la mesme raison les objets du Goust & du Toucher delectent dauantage; parce que ce sont les sens qui sont les plus necessaires à la vie & sans lesquels l'animal ne peut subsister.

Il est vray que les objets de la Veuë & de l'Oüye pourroient contester cét auantage, estans plus nobles que ces qualitez basses & materielles qui touchent les sens inferieurs: Mais si l'on con-

fidere qu'il n'y a presque point d'animaux qui se laissent flatter par la beauté des sons & des couleurs, on confessera que generalement parlant, les objets du Goust & du Toucher sont les plus delectables; Que neantmoins dans l'homme ceux de la Veuë & de l'Oüye le sont dauantage, parce que ces deux sens ayans grande affinité avec l'entendement, & estant principalement destinez à son seruice, leur fin y est aussi plus noble & plus necessaire qu'elle n'est dans les bestes, où ils n'ont point d'autre vsage que pour conseruer la vie animale qu'elles ont.

De toutes ces considerations, il est ayse de tirer les principales differences de la Volupté; car elle est intellectuelle ou sensible, pure ou impure, faulse ou veritable. Les veritables Voluptez sont celles qui sont pures, c'est à dire qui ne sont point attachées ny meslées avec la douleur: Et ce sont celles-là qui conuiennent à l'homme dans l'estat le plus parfait que la Nature luy puisse donner. Tels sont les plaisirs qui se trouuent dans la contemplation, & dans l'exercice des vertus; tels sont ceux qui suivent les actions d'une parfaite santé & les fonctions des sens parfaitement disposez.

Or ces plaisirs ont cela de propre qu'ils sont de longue durée, qu'ils ne lassent iamais, qu'ils se peuvent goster en tout temps, & que la douleur ne les deuance & ne les suit iamais: Car vn homme qui est en vn estat de perfection naturelle, ne s'en-

nuyé iamais de la meditation ny de faire de bonnes actions ; la vie luy est toujours douce & agreable , & ses sens sont toujours disposez à recevoir leurs objets avec plaisir.

On pourroit dire là dessus que le boire & le manger & quelques autres actions naturelles sont conuenables à la nature parfaite de l'homme , qui neantmoins apportent du degoust : Car la musique & la veuë des plus belles choses lasse à la fin les oreilles & les yeux ; & les fleurs les plus douces dont Venus soit couronnée , comme dit Pindare , se rendent enfin importunes & desagreables. Il est vray ; mais aussi faut-il se souuenir que toutes ces choses pour estre conuenables à la nature , doiuent auoir les conditions que la perfection demande ; il faut qu'elles soient moderées dans la quantité & dans la qualité ; que les circonstances du temps , du lieu & des personnes s'y rencontrent : Outre que la plus part ne sont pas conuenables d'elles-mesmes à la nature , mais seulement par accident , c'est à dire qu'elles ne luy conuiennent qu'à cause du déreglement qui les deuance , & auquel elles seruent de remede : Ainsi le boire & le manger guerissent la faim & la soif ; ainsi le repos & le sommeil font cesser le trauail & la lassitude ; en vn mot la pluspart des actions ne donnent du plaisir que parce que la nature se vuide , ou se remplit , & qu'elle corrige l'vn par l'autre : C'est pourquoy la Volupté

qui les suit, n'est pas absolument pure ny veritable, mais seulement par occasion ; d'où vient qu'elle lassé, qu'elle ne dure gueres, & qu'on n'est pas capable de la goûter en tout temps, comme celles qui sont absolument pures.

Mais laissons ces speculations à la Philosophie Morale, & sans nous arrester dauantage à des choses qui sont connuës de tout le monde, cherchons-en de nouuelles; & voyons si la tempeste que cette passion excite, ne nous jettera point en quelques terres inconnuës, & nous pourra faire connoistre le mouuement des esprits, qui sont comme des Estoiles errantes, dont on n'a point encore obserué les routes ny les periodes.



*QUEL EST LE MOUVEMENT
des Esprits dans la Loye.*

III. PARTIE.



N toute sorte de mouuement il faut tousiours se figurer deux termes ; l'un où il doit commencer, & l'autre où il doit finir : Si donc les esprits se meuuent dans la Loye, il semble qu'ils doiuent partir du cœur ; puisque c'en est la source, & que de là ils se portent vers le bien en quelque lieu qu'il se presente à l'Ame. Veritablement si la Loye se pouuoit former toute seule, il faudroit que le mouuement des esprits s'y fist ainsi, & qu'elle les fist sortir du cœur pour aller à la rencontre du bien : Mais parce qu'elle ne vient iamais qu'avec l'Amour qui la doit tousiours deuant, c'est à luy à causer ce mouuement, sans que la Loye y contribuë aucune chose : De sorte qu'il en faut chercher vn autre pour elle qui soit conforme à celui del'Appetit ; en vn mot il faut montrer que les Esprits se respandent en quelque sorte comme luy dans cette Passion.

Cela ne sera pas mal-aysé à conceuoir, apres auoir remarqué que l'Amour les porte vers le bien :

T

Car ne pouuant aller plus auant, il faut, ou qu'ils s'arrestent, ou qu'ils retournent vers leur origine, ou qu'ils se répandent. Ils ne peuuent pas s'arrester, puisqu'ils suiuent l'agitation de l'Ame qui pour lors est émeuë; ils ne peuuent pas aussi retourner vers le cœur, puis qu'il n'y a que la presence du mal qui les y puisse contraindre: il faut donc qu'ils se répandent & qu'ils se débordent. Ioint que l'Ame qui employe les mesmes motifs pour le mouuement des esprits que pour le sien propre, a soin de les faire mouuoir ainsi, afin de les vnir dauantage au bien, comme nous auons dit auparauant: Car par cette effusion ils se dilatent dans les organes, & occupans plus de place, ils pensent toucher le bien qui se presente en plus de parties.

Mais où peuuent-ils se répandre? Pour entendre cecy, il faut se souuenir que le bien ne touche l'Ame que par sa presence, & qu'il n'y a que la connoissance qui le luy rende present: Or cette connoissance se fait par l'entendement & par l'imagination ou par les sens: Et comme l'imagination a son siege dans le cerueau, & que les sens sont dans leurs organes particuliers, il faut aussi que le bien soit en l'un ou en l'autre, & par consequent que l'Amour porte les esprits en ces lieux-là, & que la loye les répande aux mesmes endroits. Car si le bien est seulement dans la phantaisie, & qu'il ne touche point les sens extérieurs, tous les esprits abordent

au siege de l'imagination & se répandent dans le cerueau. Mais s'il y a quelqu'un des sens qui possède le bien, alors les esprits qui y estoient accourus, se répandent aussi sur ses organes, & y apportent la chaleur, la rougeur & la viuacité.

Par cette effusion le plaisir de l'ame s'augmente, à cause de la chaleur douce & tempérée qui coule dans les parties, & qui les flatte & les chatouille: C'est pourquoy les plaisirs qui sont accompagnez de cette agitation corporelle, sont plus grands & plus sensibles que quand elle ne s'y trouue point. Voire mesme apres que l'émotion de l'appetit a cessé, l'agitation des esprits continuant, laisse dans l'Ame vne certaine Ioye confuse, qui ne vient pas de l'objet qui l'auoit auparauant touchée; mais de ce chatouillement que les sens luy ont fait connoistre comme vne chose conforme & conuenable à leur nature.

Et cela me fait croire que toutes ces Ioyes secretes que nous ressentons sans en sçauoir la raison, viennent de la mesme cause, & qu'il faut necessairement qu'il y ait quelque chose qui répande ainsi les esprits, & qui inspire apres le plaisir dans l'ame; soit par la connoissance qu'elle a du chatouillement qui se fait dans les parties; soit que toutes les differences des mouuemens qu'elle employe en chaque passion luy estant conuë, elle void que celle-cy

est propre à la loye, & forme en mesme temps un objet delectable; comme nous auons dit qu'il arrivoit dans l'Amour d'inclination.

On dira peut-estre que cette effusion d'esprits se peut faire bien souuent sans plaisir; que la cholere qui les jette au visage, que la douleur qui les attire aux parties malades, & que la fièvre qui les pousse par tout avec impetuosité, les répandent en suite, & causent la mesme alteration que la loye imprime sur le corps; Et que neantmoins l'ame ne ressent alors aucun plaisir.

Mais nous pouuons répondre à cecy en deux façons: Premièrement s'il est vray que les objets les plus delectables sont souuent empeschez par de petites douleurs de faire impression dans l'ame; ce mouuement d'esprits qui est si secret, & que le sens a peine à decouurir, doit estre beaucoup moins puissant dans les grands obstacles que luy donnent ces fascheuses rencontres.

Mais supposé mesme qu'il excite quelque plaisir, il est si foible & si leger, qu'il est estouffé par la moindre incommodité que l'on puisse ressentir: Car c'est vne chose qu'il faut bien remarquer, qu'encore que l'appetit sensitif semble ne pouuoir souffrir en mesme temps des passions contraires; cela n'est pas absolument veritable, puisque l'on reconnoist manifestement que la langue se plaist en des saueurs agreables, pendant que le cœur est plein

d'amertume & de tristesse. Et la raison de cela est, que l'appetit sensitif n'est pas renfermé dans vne seule partie, comme sont la pluspart des autres facultez; il est répandu dans toutes les organes des sens, & l'on peut dire que son tronc & la racine sont bien dans le cœur; mais que ses rameaux & les branches s'étendent par tout le corps. Car estant vne puissance generale & necessaire à toutes les parties de l'animal, il falloit qu'elle fût presente à toutes, afin que le mouuement ne fût pas éloigné de la connoissance, & que l'ame ne languît pas dans l'attente de posseder le bien, ou de fuir le mal, apres les auoir reconnus; la Nature ayant fait pour l'appetit ce qu'elle a fait pour le poulx, qui a le cœur pour son principal organe, & qui ne laisse pas de se former dans toutes les arteres, où mesme il se trouue quelquesfois different de celuy qui agite le cœur.

Cela estant ainsi, le plaisir peut estre en vn endroit & la douleur en l'autre, bien qu'ils soient incompatibles en vne mesme partie; mais aussi il est vray que quand la passion s'est élevée au centre & en la source de l'appetit, celle qui se fait en ces petits ruisseaux, est bien foible & semble disparoistre; quoy que les esprits ne laissent pas de s'agiter aux lieux où elle s'est formée; d'où viennent en suite ces sentimens secrets de plaisir qui se dérobent souvent à la connoissance de l'entendement & de l'imagination mesme.